


WANTOK

Great Quality
Affordable Price



Niuspepa bilong yumi ol PNG stret!

Wan Wik, Disemba 30, 2004 - Januari 5, 21005 NAMBA 1589 K1 tasol



Pes 8- Stail bilong Politiks long 2004
Pes 23- Stori bilong Raskol kilim polisman

Planti tausen i dai

NAMBA bilong ol manmeri i dai long bikpela guria na solwara i wok long go antap yet abrusim 63,000 long aste. Na ol wokman i mekimsave long painim yet ol bodi long 9-pelea bikpela kantri olgeta insait long saut is Esia.

Indonesia, Tailan, Sri Lanka na India em ol 4-pela kantri we planti tausen manmeri i dai na planti tausen moa i kisim bagarap taim bikpela guria na solwara i kirap na brukim olgeta samting. Planti haus i bruk na ol manmeri i lusim planti samting bilong ol long dispela bagarap.

Dispela i wankain stret long sunami long Aitape long Sandaun provins long 1998. Tasol strong bilong em i bikpela moa na level bilong solwara i bin antap moa.

Long wanpela malolo ples long Tailan em Khao Lak, ripot i tok mak olsem manmeri i dai na planti bilong ol dispela em ol ovasis lain husat i go long dispela hap olsem turis.

Dispela bikpela tait wara i kamap long Sande bikmoning olsem long 3 kilok na pairap bilong em i bikpela tru we i mekim planti manmeri i kirap nogut.

Dispela guria i stat long aninit bilong solwara long Indonesia long hap bilong Sumatra na dispela guria i ron i go olsem long India osen we i bagarapim ol kantri long dispela namel hap bilong solwara na i go bungim tu Afrika.

Eksekutiv Dairekta bilong UNICEF Carol Bellamy i tok planti bilong ol lain i dai bai ol pikinini.

.... Sunami i kilim planti manmeri na pikinini long Saut Is Esia

Wol Helt Ogenaisesen (WHO) i tok bai planti manmeri i sik bikos long ol das na doti na tu smel long ol dai bodi we i pas aninit long ol ain na simen na tu wara bai i no klin, nogat gupela hap bilong slip na arapela moa. Ol dispela samting inap mekim ol manmeri i stap laip bai bungim kainkain sik.

Wanpela saveman bilong wok insuren i tok dispela bagarap bai kos samting olsem \$13 bilien. Na Seketeri bilong Stet (Amerika) Colin Powell i tok ol arapela kantri long wol i mas bungim han na givim helpim we inap kos mak olsem bilien dola long ol kago na saplai.

Indonesia i kisim bikpela bagarap tru long planti manmeri moa i bin dai long dispela birua bilong sunami. Moa long 30,000 ol i kisim namba pinis tasol ol i bilip. moa manmeri i dai i stap hait yet aninit long ol simen na haus we i bruk nabaut na karamapim ol. Dispela em long

hap bilong notwes provins bilong Aceh long het bilong Sumatra.


Long Sri Lanka moa long 25,000 manmeri i dai. Moa long 100 manmeri i bin dai taim ol i ron long tren i kam na solwara i bruk i kam brukim tren ol i ron long en. Dispela em long hap bilong Galle long Kolombo. Dispela tren en ol i kolim Sea Queen.

Dispela kain sunami i bin kilim 36,000 manmeri long yia 1883 long Krakatoa long Indonesia na long Saut Chile long 1782 wankain sunami i bin kilim 40,000 pinis.

Ol bikpela ovasis sapot grup i statim ol wok bilong helpim ol manmeri long dispela 9-pela kantri husat i kisim bagarap na i stap. Red Cross na UNICEF na planti arapela i stat long bungim ol marasin, wara, kolos, blanket na ol samting bilong helpim planti tausen manmeri husat i kisim bagarap na i stap nau we ol tu i nogat haus na ol samting moa.



Antap: Kar i silip wantaim sampela ol kago long Indonesia. Daunbilo: Ol i skelim kaikai long Sri Lanka.



Kantri ol manmeri i dai
Sri Lanka: 18,706 dead
Indonesia: 27,174 dead
India: 4,371 dead
Thailand: 1,516 dead
Maldives: 52 dead
Malaysia: 44 dead
Burma: 30 dead
Bangladesh: 2 dead
Somalia: 100 dead
Kenya: 1 dead
Seychelles: 3 dead
Tanzania: 10 dead

STRONGPELA TRU

Colgate

Toothpaste bilong PNG stret!

Polis Ripot

Nesanel Kapitel Distrik:

OL POLIS insait long Nesanel Kapitel Distrik i karimaut wok painim long wanpela yangpela man Sepik ol bin painim em i dai long Krismas wik.

Polis i tok ol bin painim daibodi bilong yangpela man Sepik i hangamap i kam daun long diwai long bus bilong 8 Mail. Ol i tok daiman em i bilong Yangoru insait long Is Sepik provins. Tripela manki i bin raun long hap bus long 8 Mail na painim dai bodi i hangamap long diwai i stap long Fonde, Disemba 23.

Ol ripot i tok ol haus lain bilong em i wok long painim em long Fonde taim em i no go bek long haus bilong ol long Tokarara.

Ripot i tok moa olsem yangpela man ya i bin go dring wantaim wanpela man tasol em bin go bek long haus long lukim anti bilong em na bihain lusim haus gen. Na taim em i no go kamap long haus, ol hauslain i bin putim ripot olsem manki i lus long Gordons Polis stesen.

Ol ripot i tok taim ol hauslain i no painim em long polis stesen, ol bin go long haus sik mog na tokim ol atoriti olsem ol i luksave long dispela man na tok em dispela pikinini bilong ol ol i painim i stap.

Sauten Rijen:

NESENEL Kapitel Distrik na planti hap bilong Sauten rijen i bin gat kwait taim long Krismas, polis ripot i tok.

Polis bos bilong Nesanel Kapitel na Sentral Provins Tony Wagambie i tok NCD i bin gat kwait krismas bihain long palnti yia na i no bin gat ol bikpela trabel o birua.

Em i tok hevi bilong ol spakman tasol i bin kamapim meknais tasol nogat bikpela trabel i kamap.

Em i tok ol polis man i bin stap long duti o wok i bin stretim dispela hevi.

Polis bos bilong Sauten Rijen John Marru i tok amamas long ol pipel long rijen long selebretim gut Krismas na nogat bikpela birua i kamap.

Em i tok long Westen, na oro provins, ples i bin kwait na likik meknais tasol em long wokim stil pasin.

Wok bai i stap yet

Bustin Anzu long Honiara i raitim

SEKYURITI bilong ol polismanmeri husat iwok long Solomon Ailan em wanpela ki hap we nau Gavman bilong Australia bai i lukluk long en.

Jastis Minista bilong Australia, Senata Chris Ellison, i tok ol soldia i stap pinis long Solomon Ailan na was long ol na ol bai wokim wok bilong gut long pait bilong lo na oda hevi insait long Solomon Ailan.

"Ol ami bai lukautim ol polis long wok bilong ol na long strongim wok sekyuriti na ol i ken skruim wok bilong ol long traim na pait long hevi bilong lo and oda insait long kantri.

"Mipela bai lukluk strong moa long sekyuriti bilong ol wokman na mi ting olsem kamap bilong ol soldia long Solomon Ailan bai helpim.

"Australia Polis i wok long wokim wanpela glasim gen na mipela bai stap na kisim toksave au bai mipela i mekim em kamap," Mista Ellison i tok.

Samting olsem 100 soldia bilong Australia nau i stap long Solomon Ailan bihain long idai bilong Adam Dunning, wanpela polisman bilong Australia, husat ol trabelman i kilim em idai.

Dunning, husat igat 26 krismas idai long Bodalain, wanpela ples insait long Honiara taun, bihain long em i wok nait na

patrolim dispela hap. Katres i kisim tupela taim long baksait bilong em na em i dai stret.

Solomon Ailan Prais Minista Sir Allan Kemakeza i tok yangpela polisman i givim laip bilong em long helpim kantri bilong ol bihain long hevi bilong birua.

"Mipela i no inap long ting lus long em," Sir Allan i tok.

Solomon Ailans Polis Komisina Bill Morrell i tok dispela ol soldia bai sapotim wok bilong RAMSI na toksave long ol komyuniti olsem dispela hevi bilong idai bilong Dunning em i no save kamap olsem olgeta taim.

Foren Minista bilong Australia Alexander Downer i tok dispela narapela 100 spesel Respon Yunit bilong Townsville em long soim sapot bilong ol.

"Mipela mas soim long ol pipel bilong Solomon Ailan olsem mipela i no inap pret o surik long ol dispela pasin bilong ol lain long hia. Ol i no inap pulim mipela i go i kam," em i tok.

Long haus kra i bilong en long Honiara long Fonde, Australia Ples Komisina Mick Keely i tok Mista Dunning i bin dai long kamapim bel isi.

Long Krismas toktok bilong Prais Minista bilong Australia John Howard i tok long ol dispela kain taim olsem em gutpela taim bilong tingim ol lain ino stap wantaim ol.

"Ol ami na polis bilong Australia i wok long mekim gutpela wok na helpim long pait wantaim teroris na korapsen long planti hap graun olsem Irak, Solomon Ailans na planti ol narapela hap kantri tu," em i tok.

"Wanwan em ol wokim gutpela nem bilong mipela Australia. Mipela i mas tingim ol long dispela nau long ol olsem ol i no stap wantaim ol famili bilong ol long dispela Krismas," em i tok.



• Ol ami bai strongim na was long polis long wokim wok insait long Solomon Ailan.

TRAIN FOR SUCCESS! Gain professional skills and accredited qualifications with expert British Training, for a great career. Fees include all you need to succeed! Accredited British Training approved by the Papua New Guinea Ministry of Labour & Employment. Certificates & Diplomas (£130 or US\$260). * Accounts, Hotels, Tourism, Computers * Administration, Office, Insurance, Marketing * English, Secretarial, Purchasing, Stores * Business, Management, Personnel, Trade Advanced, Honours and MBA Diplomas * Business, Finance, Marketing, Personnel. For a FREE Information Book contact: CAMBRIDGE INTERNATIONAL. Box 53, Southampton, SO14 0JY, Britain. Email: info@cambridgetraining.com. Web: www.cambridgecollege.co.uk. Fax: +44 2380337200. Name: Address: Age: Cambridge - your KEY to success!

Rausim Iangalio na IPBC bod - Wenge

Steven Dama i raitim

GAVANA bilong Morobe Luther Wenge i askim Prais Minista Sir Michael Somare long rausim Menesing Dairekta Indipenden Publik Bisnis Koperesen (IPBC) Masket langalio na Bod bilong em bilong wanem ol i no lukautim gut samting bilong publik na laik salim Telikom-PNG Limited.

Mista Wenge i tok pasin bilong Mista langalio na IPBC long salim Telikom i go long Econet i kamapim planti tingting and askim long wanem as na tu long luksave we dispela pasin i bin kamap long wanpela tingting bilong Kantri. Olgeta pipel bilong PNG i paul

...Rausim bilong Dokta Temu em i bin stret.

long Econet i gutpela o nogut.

Mista Wenge tok Mista langalio na IPBC Bod na Minista, Dokta Puka Temu i no bin askim tingting bilong Gavman pastim long salim dispela bikpela Nesanel Aset.

Nesanel Palamen tu i no luksave na tok orati long salim Telikom, Mista Wenge i tok.

Mista Wenge askim Ombudsman Komisn long lukluk i go insait long dispela salim bilong Telikom na painimaut sapos i gat kros long taim bilong salim Telikom i go

long Econet.

Mista Wenge i tok sapos Gavman i laik salim Telikom i go long narapela em i ken kamap insait olsem long "publik flot" o stratejic menesmen bai aut" o ol narapela straksa we bai em mas helpim olgeta pipel, komyuniti, skuil bisnis na kantri.

Sapos dispela nupela senis bai i kamap gutpela bilong olgeta manmeri bilong bus ples na nogat komplek long en, em i tok.

Mista Wenge i tok dispela

rausim bilong Dokta Puka Temu long Minista em i stret.

Em i bilong mekim klia lukluk long salim bilong Telikom i go long Econet.

Gavman i bin pret bai wankain pasin bilong publik long salim bilong PNGBC i no ken kamap. Salim Telikom mas stop inap olgeta manmeri bilong kantri i save na i wanbel.

Gavana Wenge i askim olpela Bod long tokaut stret long wanem kain hevi bilong kot i kam long ol.

Planti kain toktok i bin kamap long salim bilong Telikom na planti manmeri na lida i bin i gat tingting na kros bilong ol yet we ol i pulim i go i kam.



Man givim em yet long ol polis long Honiara

...Kilim polisman bilong Australia

Bustin Anzu long Honiara i raitim

POLIS long Honiara, biktaun bilong Solomon Ailan i sasim pinis wanpela man long kilim dai wanpela polisman bilong Australia Adam Dunning long las wik.

Tasol ol polis i bilip narapela bilong ol dispela trabelman i wok long hait na polis nau i wok long mekim painimaut.

Dunning, husat i gat 26 krismas i bin dai taim ol trabelman i sutim em wantaim gan long baksait bilong en. Na em i dai stret long ples we ol i bin sutim em.

Dispela birua i bin kamap long las wik Trinde long moning taim olsem 3:12 long moning taim em i patrol long nait long wanpela ples ol i kolim long Bodalain insait long Honiara taun.

Trabelman John Hen Ome bilong Green Valley, insait long Honiara i givim em yet igo long han bilong ol polis long las wik Fraide, tupela de bihain long dai bilong Dunning.

Namba tu Komisina bilong Royal Solomon Ailan Polis (RSIP) na Komanda bilong RAMSI Polis (PPF) Sandi Peisley i tok Ome i givim em yet long polis na helpim ol long wok painimaut long dai bilong polisman Dunning.

Long Fraide moning, polis i sasim Ome long dai bilong Dunning na narapela sas long klostu kilim i dai narapela wanwok bilong Dunning.

Komanda Peisley i amamas long dispela wok painimaut.

"Ol plisman i wokim gutpela wok long painimaut long dai bilong wanwok Dunning. Dispela i no bilong mipela of PPF or RSIP,

tasol em bilong mipela olgeta.

"Mipela i laik toksave tu olsem ol pipel bilong Solomon Ailan i mas toksave long mipela long sampela moa stori long dispela hevi na lo i mas mekimsave long ol trabel man," em i tok.

Bihain long dai bilong polisman Dunning, moa long 100 Australian Ami, husat i save bes long Townsville long Australia, i go long Solomon Ailan, long lukautim ol polisman husat i wok aninit long RAMSI misin.

Komanda Peisley i bilip narapela trabelman James Tatau em narapela man husat i stap insait long dispela trabel husat i raun hait yet.

Moa long pes 23.



Krismas em bikpela de tru long yumi kristen tasol sampela i no tingting gut. Tupela papa bilong haus i kalap long kar na tekov taim ol haus lain i lotu na singsing long haus dua bilong ol stret. Song lida i askim tupela sapos singsing bilong ol i gutpela o nogat. Narapela bikman i tok, sori, mi no bin stap long harim. Song lida i kirap nogut olsem ol i wok long singsing long haus nating i stap.

Tupela wokman i no stap long opis taim wanpela poro i ring na askim long tupela. Wanpela meri i bekim telepon na tok, tupela man ya i no stap. Tupela mas lok yet long ausait ya. Poro i harim na tokim meri ya, sik bilong tupela dok ya i no pinis yet?. Tokim tupela olsem enemol dokta i ring.

Niu Yia i kam nau na planti i redim tok promis bilong ol long wanem samting ol bai lusim na wanem samting ol bai mekim. Wanpela poroman i tok em i gat planti samting tumas long tingim na rausim wanwan. Long dispela wik em i wok long kisim tingting bilong planti lain raun. Bikpela samting em i tok long lusim bia na smok. Em tok long buia tu. Olsem na wanem tru bai em rausim, olgeta o tupela. Ating yu tu bai i gat wankain plen long mekim promis bilong yu long nu yia.

Prais bilong buai i go antap tru long Mosbi nau. Prais nau i stap long 60 na 70 toea long wanpela buai. Sampela ol i katim buai i go hap na salim long 30 na 40 toea. Planti lain bilong kaikai buai i stat pilim pen nau. Olsem na ating em i rait taim nau long lusim buai long nu yia sapos prais bilong buai i dia tumas. Olsem tingting tasol.

Wanpela papa em man bilong dai tru long lukim piksa. Las wik ol pikinini i giyanim em olsem ol i gat wanpela naispela piksa bilong soim. Paps ya i sindaun gut tru kisim win gut tru na redi long lukim piksa. Taim CD i stat pilai paps ya i bel kaskas stret long lukim piksa bilong Makoma i kamap na ol singsing na danis. Paps ya i belhat na bikmaus, amas taim bai yumi lukim Makoma long PNG. Yupela i no les. Ol pikinini tok, sori paps, nogat cd olsem na mekim nating long musik cd bilong Makoma.

Wokman bilong mipela husat las wik i bin mekim las minit klinap long haus bilong em bikos meri bilong em bai kam bek gen, nau i gat kus bikos das i no bin isi. Gutpela sait em haus i klin nogut tru, tasol taim meri i bin kam kamap long haus, boi em giyan na i tok, sori mi i no bin klinim haus. Meri i ting, man sapos haus i klin olsem nau na dispela man i ting em i doti, ating em i save lukautim gut moa taim mi i no stap. Giyan tu orait.

Toktok long sik na senis long san na ren long Pot Mosbi i mekim na planti lain i wok long sik. Lukaut gut na raun, sapos san, put hat o karim ambrela, sapos ren, mekim wankain, o stap tasol long haus.

Hariap na NRL ragbi lig sisen i stat gen. Ol sapota bilong ragbi i no inap wet long lukim ken ol tim bilong ol i kisim fil na soim sampela gutpela stail pilai. I luk olsem i bai gat sampela ol nupela pes long ol tim na tu sampela ol olpela pes we yumi i save laikim tru bai sindaun long sailtain.

Planti ol pipel bilong PNG tu i inap pinis long sindaun long sailtain, we ol lida bilong ol i lus tingting long ol. Ol i laikim sampela gutpela luksave i kamap na sampela gutpela senis tu we bai helpim sindaun bilong ol. Tasol tru, long dispela long kamap, ol pipel yet tu i mas traim kirap long sailtain, na wok bung wantaim ol lida long mekim dispela i kamap. Laip bilong yumi wanwan i stap long han bilong yumi yet, na tingting na strong bilong yumi i ken helpim long senisim na kamapim planti samting.

Wantok Niuspepa i laik tok bikpela Hepi Niu yia i go long yupela olgeta sapota na kampani hust i save givim bisnis long stap wantaim em long dispela yia i kam long pinis bilong dispela yia. Bikpela amamas long yupela na lukim yupela gen long 2005. God i blesim yupela olgeta.

Bosim baset bilong Enga gut

Steven Dama i raitim

Gavman bilong Enga Provins i tok orait long Disemba 18, 2004, long skelim K55, 174 100 long wok insait long provins neks yia.

Long las wik Gavana bilong Enga Provins, Peter Ipatas, i tokaut olsem K34, 847 100 i kam long Nesenel Gavman na K20, 327 600 i kam long provins yet.

Em i tok i mas i gat gutpela na stretpela menesmen bilong dispela bikpela mani bilong kamapim wok insait long provins.

Dispela 2005 Enga Provinsel baset i lukluk long kirapim kliia na stretpela samting we olgeta pipel bai i luksave long en, em i tok.

Stretpela pasin na wok i mas kamap long developmen program bilong Enga, Mista Ipatas i tok.

Baset nau i laik luksave long ol risos blong ples na putim igo insait long program na projek bilong em bai i kamap gutpela na bai i karim planti kaikai na stap oltaim long provins, em i tok.

Mista Ipatas i ting dispela baset bai i kamapim balens insait long wanwan hap long distrik na provins.

Em i tok long kamapim gut ol dispela developmen gavman bilong em i lukluk gut long planti gutpela luksave, na wanpela bilong ol i K2.2 milien em i putim long stretim rot bilong provins. Insait long dispela i gat K200,000 bilong pinisim disain bilong Pogera-Tari rot.

Mista Ipatas i tok mekim gut ol rot bai mekim ol pipel bilong provins long go kam isi long maket na mekim ol narapela sevis long kam insait hariap na isi na kamapim gutpela sindaun.

Luksave long ol hevi na wari wantaim

YUMI olgeta manmeri i save slip kirap wantaim hevi na wari olgeta taim. I nogat wanpela man o meri i save stap gut olgeta taim. Dispela em toktok bilong wanpela lida bilong ol Katolik marna grup yut insait long 9 mail setelmen long Mosbi long las wiken.

Margret Kundun i tok tasol yumi ol manmeri i oltaim laik stap amamas tasol olsem na yumi oltaim lukluk long ol gutpela samting tasol. Em i tok em bai olsem wanem nau sapos yumi no kisim dispela samting yumi laikim? Belhevi na kros i kamap long bel na tingting bilong wanwan na isi isi em i gro insait long famili na wantu i kamap bikpela insait long komyuniti na kantri.

Kundun i tok yumi save sapos man i belhat long meri ino kuk long haus na pikinini i hangre, yumi save lukim kros na pait na wantu dispela hevi i save go aut long komyuniti." Tude ol mama i tok strong long ol hevi ol i bungim i kamap hevi bilong kantri. Em i tok yumi i noken sutim tok i go i kam yumi papa na mama, man na meri na ol pikinini mas luksave long famili bilong yumi yet pastaim.

Winim satan wantaim gutpela pasin - Pop

Apostolik Nuncio bilong PNG i tok, Papa Santu (Pop John Paul) i mekim dispela tok long Wol de long 1st Jenuari, 2005. Dispela tok em mekim long tok autim olsem satan i as tru bilong pasin ino stret olsem kros na pait. Papa Santu i tok tu long rot wei man ino inap long brukim. Dispela join i stap insait tru wantaim wanem pasin i gutpela na ino gutpela, o long pasin i stret na karangi. Papa Santu i tok, "wanpela gutpela laik i olsem Santu Pol i tok, "rausim satan na holim pas long wanem i gutpela (Rm 12:9)."

Papa Santu i askim yumi long tingting long gutpela bilong olgeta manmeri long painim na long Kamapim Pis o gutpela sindaun. Olsem yumi ritim long tok bilong em, "Pis em i gutpela long kamapim wantaim gutpela pasin: em i gutpela long yumi wanwan, long famili, kantri na long olgeta manmeri, tasol em i wanpela samting i mas gat lukaut long en taim pipel i mekim tok na mekim samting wantaim gutpela spirit."

Yumi olgeta i gat singaut long lukautim dispela pawa bilong bilip o go het i save holim yumi strong long mekim wok bilong Pis na stretpela pasin, lo na oda olsem yumi ritim long tok bilong Papa Santu: "sin bilong wanwan manmeri na ol komyuniti ino holim yumi bek bikos yu-

mi i gat Hop na dispela i givim yumi strong na pawa long mekim wok bilong Pis, Lo na Oda, na tu em i givim strong long kamapim gut dispela graun."

Papa Santu i tok "save na luksave as bilong stretpela pasin na wokabout na tu long luksave long krangi pasin bilong yumi wanpela pipel bilong dispela graun." Dispela na pasin bilong luksave long gutpela bilong komyuniti i rot tru bilong kamapim pis. Dispela pawa bilong save na kliia long gutpela na karangi pasin na tingting i gutpela lo na pasin bilong wanpela komyuniti olsem em i kirapim gutpela tingting na pasin long bungim ol manmeri bilong kainkain kalsa bilong wanem em i stap laip insait long ol dispela kainkain kalsa na kastom long gro. Na tu em i save gro wantaim ol wanwan man na komyuniti.

Papa Santu tu i kliiam dispela as tingting na i tok long bringim pis na winim pawa bilong satan wantaim gutpela Pasin i mas gat kliia lukluk igo insait long wanem ol samting na pasin i gutpela bilong olgeta man na meri, komyuniti na politiks.

Taim yumi i gat gutpela sindaun i kamap, Pis i kamap tu. Olsem long kamapim gutpela bilong olgeta manmeri i mas i gat pasin bilong soim rispek.

Em i tok long tingting bilong man na meri i olsem oltaim ol laik bai ol gutpela samting i mas kamap long ol. Wanwan i laik stap amamas na i lus tingting long hevi na wari i stap long lek bilong ol.

Man na meri i lukluk long driman bilong ol olsem ol i mas mekim sampela samting long kisim dispela mak. Tingting i pas tru long bihain na i nogat taim long lukluk long nau. Yut lida i tok yum i gat dispela pasin bilong mi yet.

Manmeri i lus tingting long mekim o luksave long samting bilong helpim ol long gro wantaim. Em i autim tok piksa olsem yumi i olsem sampela skul mangi we ol i stadi strong tru long kisim gutpela mak o pas long tes tasol ol i lus tingting long kisim save tru long wanem samting ol lainim bai dispela i helpim ol long laip bilong ol. Wankain samting i save kamap long yumi ol manmeri, em i tok strong.

Yumi manmeri i gat gutpela tingting bilong skelim na glasim ol samting. Yumi mas sindaun isi sampela taim na lukluk long wanem samting i kamap long laip bilong yumi, em i tok.

Gutpela yia tru bilong NGI



Neville Choi
i raitim

OLGETA yia Niugini Ailans rijon i save mekim nem long ol bikpela samting. Long 2004 em i wankain tasol.

I tru olsem Bogenvil yet i bin i gat planti bikpela samting i bin kamap, na bikpela tru em taim gavman i givim luksave long nupela Mama Lo bilong Bogenvil.

Dispela ol samting i kamap long Bogenvil em i namba wan taim long em i kamap insait long PNG, olsem na wanwok bilong mi Veronica Hatutasi i toktok long Bogenvil yet long dispela yia 2004.

Tasol olsem wanem long ol arapela provins insait long Niugini Ailans rijon?

Is Nu Briten

Is Nu Briten provins i bin lukim planti bikpela samting i kamap long dispela yia. Wok bilong ENB Provisel Gavman long traim kisim luksave bilong Gavman long ol i ken lukautim liklik provinsel ikonomi bilong ol yet i bin go strong gen long dispela yia, na Gavana Leo Dion na ol sinia opisa bilong em i bin kam long Pot Mosbi long paitim moa toktok wantaim Gavman long dispela samting long kisim moa pawa long lukautim

mani bilong ol yet.

Tupela bikman bilong provins yet i bin kisim luksave long ol bikpela wok insait long kantri na long ausait tu.

Olpela biknem pablik seven na diplomet, Sir Paulius Matane i bin kisim luksave bilong kamap Gavana Jenerel bilong kantri, na long taim Mamba bilong Palamen (MP), Sir John Kaputin, i bin kisim luksave long holim wok olsem Seketeri Jenerel bilong Afrika, Caribbean na Pasifik Seketeriet.

Long dispela yia tasol, wok bilong Seksuel Openses Skwat bilong Polis long Kokopo i bin lukim kaikai bilong wok aweanes bilong ol long ol skul long pasin bilong bagarapim ol yangpela pikinini.

Inspekta Roland Funmat, man husat i go pas long ol wok aweanes i bin skulim planti yangpela pikinini olsem pasin bilong slip wantaim wanfamili em i no stret.

Dispela i lukim planti yangpela i opim maus na kotim ol wanfamili bilong ol long mekim pasin nogut.

Bikpela ron bilong Air Niugini balus namel long Kokopo na Honiara long Solomon Ailans i bin kamap.

Air Niugini i bin opim dispela ron bilong Air Niugini balus long traim pulim moa manmeri bilong Solomon Ailans long kam long Rabaul.

Tasol i bin i gat asua tu. Sampela lain husat i kalap long dispela ron bilong balus i no wanbel wantaim mak bilong sevis ol i kisim long hap. Ol i tok sevis i mas kamap moabeta.

Wes Nu Briten

Long Wes Nu Briten, bikpela kampani insait long provins, New Britain Palm Oil i bin tokaut olsem ol i mekim gutpela wok bisnis tru insait long provins na ol i opim moa wok bisnis bai i go insait long Wes Nu Briten. Dispela i opim rot bilong moa yangpela manmeri long painim wok insait long provins.

Ol nes insait long provins i bin soim klia pasin marimari bilong ol taim ol i givim wanpela tang wara i go long ol turangu lain i stap long Kabaya Kea Senta insait long Bialla lokal level gavman hap. Kabaya i wanpela kea senta we ol manmeri i ronawe taim Maunten Ulawun i bin pairap. Ol i go stap long hap bihain long graun i bruk long ples bilong ol.

Nu Ailan

Nu Ailan i bin lusim wanpela biknem lida bilong em taim bipo gavana Paul Tohian i bin indai long mun Mei.

Leit Mista Tohian i bin mekim nem bilong em taim em i bin stap wok olsem wanpela polisman long Bogenvil.

Em i bin lusim polis na kamap mamba bilong Kavieng, bihain em i kamap provinsel gavana.

Ol vanilla fama insait long provins i bung wantaim long givim luksave long helpim Nu Ailan Provisel Gavman i givim long vanilla. Taim prais i gutpela, ol manmeri i groim vanilla i amamas tru.

Tasol dispela samting i kamapim ol arapela hevi tu olsem stil pasin namel long ol

yangpela husat i save raun long nait long stilim vanilla bilong salim.

Mamba bilong Namatanai, Byron Chan, i bin go pas long banisim ilektoret bilong em long dispela strongpela sik malaria.

Mista Chan i bin kamapim wanpela program wantaim Rotary International husat i helpim em long kisim ol taunam na arapela marasin bilong tilim i go long wanwan haus insait long wanwan lokal level gavman hap insait long Namatanai.

49 man na wanpela meri i bin pul long kanu raunim ol ailan long Nu Hanova ausait tasol long Kavieng taun.

Ol i bin pul kanu inap long wanpela wik olgeta long luksave long kamap bilong Metodis sios insait long provins.

Manus

Bikpela hevi we i bin painim Manus provins em hevi bilong provinsel redio stesen bilong ol i no wok.

Dispela i givim bikpela hevi long ol manmeri bilong provins bilong wanem ol i no inap kisim toksave long ol samting i kamap insait long provins.

Gavana bilong provins Jacob Jumogot, i tokaut olsem long tupela yia antap, Manua bai lukim moa wok developmen i kamap bilong wanem em i painim pinis mani.

"Long strongim edukesen insait long provins, mi kisim pinis K7.1 milien long AusAID long sanapim tripela hai skul na tripela komyuniti skul," Mista Jumogot i tok.

Bogenvil Mama Lo kisim luksave

Veronica Hatutasi i raitim

DISPELA yia em bin wanpela gutpela yia long Bogenvil we i lukim sampela gutpela kaikai long wok bilong painim gutpela sindaun i kamap. Yia 2004 em i namba 16 yia bihain long Bogenvil hevi i stat tasol nau, yumi wok long lukim lait long narapela sait bilong tanol.

Tru i gat sampela meknais na samting i stap yet olsem ol Mekamui lain bilong Francis Ona, No Go Zone na Noah Musingku wantaim U Vistrak kwik mani bisnis we ol Bogenvil lida, ol olpela paitman, ol sief na komyuniti i mas wok wantaim long kamap im wanbel na stretim. Tasol bikpela samting em wok long rausim ol gan long Bogenvil i mas pinis. Na tu, ol lida na grup we i gat hevi namel long ol i mas kamapim bel isi na sekanj pasin.

Bogenvil i kisim pinis planti samting we em i pait, krai na askim long PNG Gavman long em. Na bihain long planti toktok na wok bilong Gavman, ol intenesenel dona ejensi, helpim bilong ol wansolwara na pren kantri olsem Australia, Nu Silan, Fiji, Vanuatu na Solomon Ailan, piksa i kamap klia olsem Bogenvil i kamap long mak bilong kisim otonomi o nupela gavman bilong em. Dispela i min olsem Bogenvil bai kisim moa pawa long ronim gavman bilong em.

Wanpela bikpela samting i kamap long dispela yia em long Bogenvil i gat Konstitusen o Mama Lo bilong ronim nupela otonomi gavman bilong em. Dispela i kamap long dispela mun tasol bihain long Gavman i tok oraitim namba foa na laspela draf ripot bilong Bogenvil Konstitusen. Dispela i min olsem sapos olgeta narapela samting i orait,

Bogenvil bai go het long kirapim nupela gavman bilong em. Bogenvil Konstitusenel Asembli, ol teknikel opisa bilong Bogenvil Edministresen, Gavman na ol loya na lain bilong Ateni Jenerel i bin wok long kamapim, glasim na skelim na senisim inap ol i kamap wantaim namba 4 ripot we Nesenel Eksekutiv i bin tok oraitim long tupela wik i go pinis

Nau yet, Bogenvil i wetim tasol Gavana Jenerel i givim laspela blesing bilong em na ol bai putim tok orait long Bogenvil Konstitusen na ol bai putim long Gavman

Geset pepa.

Tru, Gavman em inapim pinis planti ol samting long givim Bogenvil ol samting i askim long em, Bogenvil i mas mekim wanpela samting long inapim sait bilong em. Na dispela bai bihainim ol samting i stap aninit long Bogenvil Pis Agrimen na tu, dispela samting bai i ken klarim olgeta rot long Bogenvil i ken holim ileksen long sanapim nupela otonomi gavman. Em long pinisim wok bilong lusim na bagarapim ol gan long ailan.

Liklik meknais i bin kamap i sut long balus bilong man Australia i bin pondaun long olpela Aropa ples balus long Sentral Bogenvil wantaim nogat toksave na dispela i brukim lo bilong Sivil Aviesen bilong PNG long wanem tambu i stap long yusim dispela ples balus. Ripot long balus i pundaun long Aropa em long ol dispela waitman i go lukim Francis Ona na tu, Noah Musingku husat i papa bilong kwik mani bisnis U-Vistrak. Long dispela taim, Musingku i wok long sanapim bek U-Vistrak long Bogenvil tasol i moabeta lo bilong PNG i mas wokim wanpela samting long em bikos em i wok long gaimanin ol pipel na kisim mani bilong ol. Ol dispela kain samting tu em ol i no gutpela bikos ol i ken kamapim hevi long ol gutpela wok long Bogenvil tasol ol Bogenvil lida na komyuniti yet bai wok bung wantaim long stretim ol dispela kain hevi.

Laspela samting i stap nau em long pinisim wok bilong lusim na bagarapim ol gan long olgeta hap bilong Bogenvil pastaim long ailan i ken go het na kirapim otonomi gavman. Taim ol i makim long dispela wok i kamap em long mun Epril neks yia.

Bikpela wok long dispela yia em long kamapim Konstitusen o Mama Lo bilong nupela Bogenvil Gavman. Na stat long dispela yia yet, ol bin kirapim wanpela komiti long Bogenvil ol i kolim long Bogenvil Konstitusenel Komisnin (BCC) we Presiden bilong Bogenvil Pipels Kongres Joseph Kabui i siaman long en. Stat long yia 2002, dispela komiti wantaim Edministresen ol teknikel opisa bilong Bogenvil na Gavman, baipatisen komiti bilong Gavman, Jastis na opis bilong Atoni Jenerel i bin mekim bikpela wok wantaim long kamapim Bogenvil Mama Lo bai stiaim nupela gavman bilong ol pipel



• Bos bilong ECP o polis bilong Australia i wok long PNG, Komanda Barry Turner (baksait) Asisten Komisina bilong polis long PNG, Gary Baki (fran) i kisim welkam taim ol i go long Bogenvil. Foto: ALOYSIUS LAUKAI

bilong Bogenvil.

Stat long yia 2002 yet i kam inap long Gavman i givim tok orait long stat bilong dispela mun, ol bin kamapim namba wan, tu na tri na foa draf ripot we ol grup i bin wokim aweanes i go long olgeta hap bilong Bogenvil long en na kisim tingting bilong ol pipel, bihaini ol i glasim na skelim olgeta wanwan draf ripot na kamapim ol senis.

Inap long laspela na fainel wan we ol bin tok orait long em na ol pipel bilong Bogenvil i bin givim long han bilong man husat i mekim bikpela wok tru long lukim olsem wok long painim gutpela sindaun long Bogenvil i

go het na i no slek em Infa Gavman Minista Sir Peter Barter, insait long bikpela bung long Buin.

Taim Prait Minista Sir Michael Somare i tokaut olsem Gavman i tok oraitim Bogenvil Konstitusen, em i tok dispela em i bikpela samting long rot bilong kirapim otonomi o nupela gavman na tu, long inapim ol samting i stap insait long Bogenvil Pis Agrimen.

Long rot ol samting i go long en, Bogenvil bai gat otonomi gavman long neks yia. Inap long taim dispela i kamap, gutpela amamas long Niu Yia i go long yupela olgeta pipel long Bogenvil.

Taim bilong amamas na belhat



Christine Tony
i raitim

DISPELA em i laspepa niuspepa bilong 2004 na bai yumi lukluk i go bek long ol samting we i bin kamap insait long Momase rijon long dispela yia. Dispela yia i bin lukim planti gutpela samting i kamap long Momase rijon. Olsem long stat bilong yia Gavman bilong Morobe i putim bikpela lukluk long edukesen na ol yangpela bilong Garaina i lusim ol birua samting na traim long kamapim gutpela sindaun namel long komyuniti. Long Madang, Alois Kingsley na Ben Semri i helpim ol sumatin wantaim skul fi na Ramu Nikel main i redi. Is Sepik i amamas long nupela bris long Wara Amuku we Minista bilong Woks na memba bilong Maprik, Gabriel Kapris, i bin opim na tu long Gavman bilong Is Sepik long givim K6 milien long stretim Sepik haiwe. Na long Wes Sepik, Indonesia i bin helpim wanpela ples we i stap long boda bilong PNG na Indonesia wantaim gutpela wara saplai.

Wantaim ol gutpela samting i bin gat tu ol sampela bikpela hevi we i bin bagarapim rijon. Madang i bin wanpela provins long rijon we i kisim bikpela bagarap tru long ol kainkain hevi. Long sait bilong lidasip, gavana bilong provins i mekim ol pipel i tingting planti long lidasip bilong em, taim nem bilong em i kamap planti taim tumas long nuis long ol bikpela rong em i mekim. Usino bris i bin bruk taim bikpela ren na win i kamap na planti asples bilong Manam Ailan i lusim ples bilong ol taim Manam maunten paia i bin pairap.

Morobe Provins

Dispela yia i bin gutpela long Morobe provins bilong wanem planti gutpela samting i bin kamap. Olsem ol bikpela wok long kamapim main long Hidden Veli i pinis na wetim tasol ol operesen long stat neks yia bihain long saining namel long gavman, kampani na ol papagraun. Na gutpela sindaun kamap namel long polis na ol yangpela bilong Garaina bihain long ol yangpela i lusim olgeta birua samting long Febuari.

Edukesen em i wanpela bikpela samting long ai bilong Gavman bilong Morobe olsem na em i givim K1 milien long helpim ol sumatin husat i go long yunivesiti na koles long baim skul fi bilong ol bilong dispela yia.

Angau Memorial Haus Sik i bin bungim sampela hevi long stat long yia taim masin bilong wasim gut na klinim ol samting bilong katim man long operesen i bin bagarap. Tasol dispela i bin stret taim masin i bin orait gen bihain long sotpela taim tasol.

Ol sampela hevi we i bin painim Morobe em taim Makam bris i bin bruk na Gavman



• Garamut na Mambu Festival long Is Sepik provins.

bilong Morobe i wet longpela taim tumas long mani long stretim bris. Dispela bris i mekim na planti bisnis haus i no wok gut long sait bilong Wau Bulolo na Menyamya. Ol pipel bilong ples tu i no go gut long Lae maket na ol i painim hat long mekim mani. Longpela taim bihain na ol i stretim bris.

Dispela yia i lukim wanpela bikpela birua bilong ka i kamap long haiwe rot bilong Wau Bulolo we samting olsem 6-pela manmeri i dai na planti lain i kisim bikpela bagarap. Dispela em wanpela bikpela birua long provins we Morobe Provins Edminstresen i sori tru na baim ol bokis na ol kos bilong salim ol lain i dai i go long ples long planim.

Ol distrik nau i wok long lukim nupela treseri opis i op bai ol pablik seven long wanwan distrik i ken kisim pei bilong ol isi na i no ken ron spit i go tumas long Lae long benk na BMS opis. Dispela tu bai i lukim Bank South Pacific i opim liklik benk bilong em insait long treseri opis bai ol manmeri bilong ples i ken putim mani bilong ol na kisim mani taim ol i laikim. Em i olsem benk seyis i go isi nau long ol pipel bilong ples long Morobe provins.

Madang Provins

Ol manmeri i save tok olsem Madang em i biutiful o stail, tasol dispela yia i no lukim ol gutpela samting i kamap long dispela biutiful ples. Yia 2004 i bringim planti hevi long laip bilong planti manmeri insait long provins.

Ol lida bilong provins i bagarapim nem

bilong Madang taim i gat ripot long ol sampela bikpela asua ol i mekim we i lukim nem bilong ol i kamap long nius planti taim tumas. Ol hevi bilong graun i bringim tudak long Madang taun na mekim ol pipel wari taim Usino bris i bruk long bikpela ren na win long Epril.

Solwara em i bikplea samting long laip bilong planti manmeri long Madang bilong wanem ol i save kisim kaikai na ol planti samting bilong ol long em. Ol papagraun bilong ples we tinpis faktori bilong RD Tuna i stap i laik bai ol i lusim ples bilong ol bilong wanem ol i lukim olsem ol rip i wok long dai na ol i painim hat long kisim pis.

Bikpela hevi tru i bin kamap long Oktoba taim Manam Ailan i bin paia na planti pipel bilong ailan i lusim asples bilong ol long go i stap long Bogia. Dispela i bringim planti moa hevi bilong wanem ol papagraun long Bogia i no wanbel tumas long ol i sindaun long graun bilong ol.

Ramu Nikel maining em bikpela projek Madang provins we gavman i pasim tok pinis wantaim gavman bilong Saina long kamapim. Planti pipel long Madang i bel kirap long dispela projek bikos bai i gat wok na planti samting ol pipel bai mekim olsem ol liklik wok na projek tu. Tasol dispela maining i stap yet na i no stat yet inap gavman yet bai tokaut wanem taim bai projek i stat.

Tasol Madang i wok long winim yet laikim bilong gavman na planti ausait lain long go lukim dispela naispela ples. Olsem na long dispela yia Madang taun i save lukautim ol bikpela bung bilong gavman na tu ol bikpela miting namel long ol arapela ovasis kantri na planti arapela bikpela konfrens i save kamap long Madang. Ol pipel bilong Madang i save lukim kainkain nupela pes bilong ol turis i kamap long hap long ol dispela bikpela bung.

Is Sepik

Yia 2004 i no bin gutpela tumas long asples bilong vanila. Dispela em bilong wanem prais bilong vanila i bin pundaun long stat bilong yia na tu Papindo na ol arapela biknem kampani we i save baim vanila bin i stop long baim moa. Ol i mekim olsem bihain long ol i painimaut olsem ol vanila fama i no salim gutpela vanila bin. Dispela i kamap taim maket long ovasis i luksave long sampela vanila bin we i no stret long ol i baim.

Tasol taim prais bilong vanila i bin go antap, Is Sepik em mani i pulap na kapsait stret long dispela yia. Olgeta hap em ples i pulap long manmeri tasol na bisnis i strong tru. Olgeta hap em ples i smel vanila tasol

inap dispela yia yet dispela hevi bilong kwaliti vanila i bin daunim prais na ol baiya i stop long baim vanila gutpela prais olsem pastaim.

Tasol Is Sepik provins i lukim 2004 bringim ol kain developmen olsem nupela bris long Wara Amuku na gutpela Sepik haiwei bihain long Is Sepik Gavman i givim K6 milien long AusAID long stretim. I gat toktok tu long Wewak bai kisim gutpela pawa saplai na bai ileksen we bin kamap long Yangoru Sausia long Mei i bin ron gut tru. Ating wanpela gutpela nuis stret long dispela yia em toktok long provins long kamapim wanpela grasrut benk.

Ol skul insait long Maprik na Ambunti Drekikia i kisim bikpela helpim tu long ol ovasis helpim wantaim tu ol lida bilong ol yet putim mani bilong stretim gut ol olupela skul i stap na sot long mentenens na tu mani i go long sanapim sampela nupela skul long dispela tupela distrik.

Hevi bilong gavana bilong provins i stap yet we memba bilong Ambunti Drekikia Tony Aimo wantaim Ekting Gavana Peter Ariro i wok long pulim i stap yet.

Sandaun Provins


Dispela yia i bin wanpela isipela yia bilong Sandaun provins. Nogat bikpela hevi tumas i painim ol pipel. Bikpela toktok i bin kamap tasol taim ol pipel bilong Lido i bin bagarapim ol haus na ol arapela samting bilong gavman long Febuari. Hevi i kamap tu taim kot i givim pepa long holim Gavana Carlos Yuni long ol rong em i bin mekim. Dispela i mekim na olupela gavana bilong Sandaun John Tekwei i askim Gavana Yuni long risain.

Tasol sindaun namel long Indonesia na PNG i wok long kamap gut bihain long ol polis i strongim patrol bilong ol long boda bilong wanem ol i painimaut olsem ol man i wok long karim gan na drag i kam insait long kantri.

Indonesia i bin helpim tu wanpela ples klostu long boda wantaim gutpela wara saplai. Olgeta bikpela wok i pinis na klostu taim nau bai ol pipel bilong Wutung i gat wara ron long wanwan haus bilong ol

Long dispela yia tu Gavana Carlos Yuni i tok sampela lida bilong Oposisen i bin laik baim em (braib) long em i ken go joinim Oposisen. Dispela em long traim strongim namba bilong kamapim vot i nogat bilip long Gavman bilong Somare.

Polis i bin holim na sampela wanpela Oposisen memba pinis long dispela toktok bilong Gavana tasol i nogat inap evidens na kot i larim dispela wok i stap yet.



• Hevi bilong Manam long Madang provins i lukim ol manmeri i sindaun olsem, nogat gutpela haus, long Bogia. Foto: MICHAEL NOVINGU

Bikpela yia bilong Hailans



Yakam Kelo
i raitim

BIKPELA bai ileksen i kamap long Simbu rijinol sit, Anglimp Saut Wagí na Wabag Open long dispela yia.

Tripela bai ileksen wantaim i pinis we Peter Launa i win na kamap Gavana bilong Simbu provins bihain long olupela Gavana Leit Pater Louis Ambane i bin dai na sia i stap nating. Jamie Maxtone Graham i winim tu sia bilong Anglimp Saut Wagí na las mun tasol Samuel Abal i winim Wabag Open sia.

Dispela tripela bai ileksen i bihainim nupela sistem bilong vot ol i kolim Preferensel Voting Sistem (LPV). Na dispela vot i bin ron gut tru i nogat planti trabel olsem bipo.

Gavman i bin opim tu nupela balus teminol long Hagen siti long dispela yia we dispela i soim nupela teminol bilong Kagamuga ples balus. Bikpela mani bilong mekim


kamap dispela teminel bilong ples balus i kam long ovasis helpim.

Goroka i bin lukautim bikpela so ol i kolim Kopi Ekspo na dispela i pulim planti manmeri wantaim tu ol bisnis lain i go long stap insait long dispela so. Bihain tasol Goroka i go het na holim kalsarel so bilong em we i mekim Goroka taun na Isten Hailans provins i bin bisi long dispela yia long dispela tupela bikpela so we i pulim planti turis na kainkain pilai wantaim amamas long dispela yia.

Simbu provins i nogat wanpela bikpela samting tumas i kamap long dispela yia. Bikpela samting tasol em bai ileksen. Tasol dispela yia Simbu provins i bin stap aninit long wanpela stadi bilong ol lain i save glasim na stadi long pasin bilong tumbuna na pasin bilong man na laipstail o sindaun bilong ol.

Dispela stadi i soim olsem Simbu provins i gat nem long pasin bilong kilim ol lain ol famili ting i save mekim sanguma. Dispela stadi i soim olsem planti lain i save dai bikos ol manmeri i save kilim ol bikos ol i save sutim tok olsem ol i sanguma lain.

Ol lain long Enga provins nau i bisi long groim rais long sit na i no wetim tasol bikpela



• **Tony Lumbalumba** i soim ol kawiji bilong Goroka. Buai i sot nau long Makam na Morobe provins na ol Goroka i no inap wet moa. Ol i rausim ol kawiji bilong bus i kam long mekim nating pastaim inap buai i kam bek gen.

Poto: JAMES KILA



• **Wok long Porgera Mine.** Poto: FR PHILLIP GIBBS

gol maining ol i gat pinis long Porgera. Planti haus lain i brukim graun pinis na planim rais na i redi long kisim kaikai bilong ol. Bikpela hap olsem long Kendep eria na arapela distrik tu.

Ol savemanmeri bai go long wanwan ples insait long Isten Hailans Provins long toktok long ol pipel long sik nogut HIV AIDS.

"Mipela i makim ol sios grup na ol wokmanmeri bilong provinsel gavman long go toktok long wanwan man na meri husat i komyuniti lida long sik HIV AIDS. Dispela bai mekim ol komyuniti lida senisim tingting bilong ol pipel bilong ol long AIDS," Isten Hailans Provins (EHP) Gavana, Mai Smith

Kela, i tok.

Dispela kain wok bai kamap nau bihain long EHP i putim K200,000 long helpim pait agensim HIV AIDS insait long provins.

EHP Deputi Gavana, Joksy Nakime, i bin makim maus bilong Gavana Smith Kela na mekim ol dispela toktok long taim bilong toktok na brukim Isten Hailans Provinsel Asembli baset long Fraide, Disemba 24.

Gavana Smith Kela i tokim ol memba bilong Provinsel Eksekutiv Kaunsel (PEC) olsem dispela mani em i stat tasol bilong planti moa helpim mani we bai go long mekim dispela wok.

CIC soim gutpela klinpela rekot long 2004

James Kila i raitim

2004 em i wanpela gutpela yia bilong regulatori Bodi bilong Kopi Industri long Papua Niugini. Kopi Industri Koporesen(CIC) long rekot bilong Palamenteri Pablik Akauns Komiti (PAC). Namel long olgeta Statutori Ogenaisesen o gavman dipatmen we i bin go sanap long ai na glasim bilong Pablik Akauns Komiti (PAC), CIC i bin winim ol askim bilong PAC, olsem ol buk na akauns bilong en i gutpela tru.

Siaman bilong PAC na memba bilong Bogia, John Hickey, wantaim ol narapela memba bilong komiti i bin askim CIC insait long glasim bilong ol long mun Oktoba 2004. Bihain long ol askim na bekim bilong ol, siaman bilong CIC, Pugma Kopi na Sief Eksekutiv bilong CIC, ol i bin amamas na tokaut olsem CIC insait long las tupela yia i bin mekim gutpela wok long kamapim ol sevis we i go gut tru wantaim gutpela sait bilong lukautim mani na tu kamapim sevis long Akaunting sistem bilong en.

Insait long ol arapela gutpela developmen i kamap insait long kopi industri em taim ol bod ov

dairektas i bin tok orait long menesmen long kamapim nupela menesmen straksa we i lukim ol i katim daun 4-pela divisen bilong CIC i go kamap tupela. Insait long dispela straksarel sevis, tupela divisen bilong CIC, em Koporet Sevis Divisen wantaim Industri Afes i bung na kamap wantaim wanpela divisen em Industri Operesen Divisen. Narapela tupela divisen we i bin lukim senis na kamap olsem wanpela em taim Kopi Risets Institution (CRI) na Extensen Sevises Divisen (ESD) i bin bung na kamap olsem wanpela ol i kolim nau olsem Risets na Groa Sevises Divisen'(R&GSD).

Nau yet hetkota bilong CIC i stap long Goroka, Isten Hailans Provins. Divisenel hetkota bilong R&GSD i stap long Aiyura na divisenel hetkota bilong IOD i stap long Goroka. Tasol ol wok manmeri save wok long givim sevis bihainim nupela diliveri sistem.

Insait long nupela diliveri sistem bilong CIC, ol wok manmeri bilong CIC bai i no inap wok wantaim wanwan ol fama long bringim ekstensen sevis, olsem bipo sistem bilong "olpela didiman".

Insait long dispela nupela,

ekstensen diliveri sistem ol wokman bilong CIC bai bringim sevis igo bihainim askim bilong ol fama. Ol dispela fama tu mas wok bung wantaim ol grup na ol yet i mas askim long sevis long helpim ol lukim senis o developmen long kopi bisnis bilong ol.

Dispela nupela ekstensen diliveri sistem i bihainim dispela nupela sistem em ol lain fama insait long Isten Hailans na Morobe provins i wok long traim kamapim aninit long Sapot Sevis Kontak Fesiliti o SSCF. Dispela nupela ekstensen sistem em ol i wok long tupela provins tasol CIC i kamapim program bilong en yet long yusim dispela nupela ekstensen sistem long givim gutpela sevis i go long ol fama husat i wok bng wantaim long grup na laikim sevis. Ol CIC wok man meri i bin bung long Aiyura long stat bilong mun Epril 2004 long lukluk na traim yusim dispela ol kain sistem na rot.

Sampela ol lain grup fama em ol wok manmeri i makim pinis na ol i bin wok wantaim ol pinis insait long PRAP program. Ol dispela fama grup ol i makim pinis long wok em ol grup we tenda i op pinis long husat sevis provaida o man husat i save long wok kopi. Ekstensen

long aplai long kontrak na go wok na givim sevis i go long ol fama grup. Ol grup ol i mekim wok PRAP program em long Not Kos long Madang, Timusa long Kainantu distrik long Isten Hailans provins, wanpela long Westen Hailans, o Sentral na wanpela long Is Nu Briten Provins.

Narapela gutpela developmen insait long Bod Polisi bilong CIC em taim ol bod i kamapim nupela CIC 8 poin plen o Objektiv. Dispela nupela 8 poin plen i gutpela plen we i kamapim olgeta wok insait long kopi industri long Papua Niugini na bisnis insait long intenesenel o avasis maket long sait bilong kwaliti.

Kopi Industri i bin lukim tu long dispela yia (2004) sampela gutpela wok long sait bilong Intenesenel Promosen. Long mun Oktoba, wanpela Sinia Kwaliti Kontrola na Laisensing Menesa bilong CIC, David Rumberumba, i bin redim wokabaut bilong sampela lokal PNG ekspota i go long Singapore long Esia Wol Kap Simposiem na Eksibisen. Ol lokal ekspota i bin karim ol piksa bilong ol kopi bilong ol i go soim long dispela bikpela bung bilong ol lain bilong baim kopi na tu ol lain bilong

wokim na salim ol kopi masin na ol arapela samting bilong industri.

Long 2004 tu i bin lukim sampela ovasis lain i mekim lukluk raun bilong ol i go long Hailans rijon long lukim wok bilong kopi industri.

Sampela ol kopi baiya bilong ovasis i bin mekim lukluk raun bilong ol i go long Goroka, tasol bikpela lukluk raun em taim Dokta Hidetaka Hayashi bilong Hayashi Kopi Institiut i bin kam long PNG bihain long wok koporesen o wok bung namel long Invesmen Promosen Atoriti (IPA), Jepen Ekstenol Tred Ogenaisesen (JETRO) na CIC.

Mista Hayashi em wanpela intenesenel saveman husat i save teistim o dringim kopi na givim mak bilong kwaliti long kap kopi.

Em i bin bungim ol lokal ekspota na ol lain long Goroka insait long tupela woksop we i bin kamap long Nesenel Spots Institiut (NSI).

Wanpela gutpela nuis tu bilong industri em olsem klostu 2004 pinis na prais bilong kopi i bin go antap. Dispela bai helpim tru ol manmeri long amamas long niu yia na tu ol papamama i ken redim sku! fil bilong ol long 2005.

Gutpela na nogut bilong yia



William Natera
i raitim

• Long Pot Mosbi long Sentral provins yet, i bin gat bikpela amamas long Hiri Moale Festival we i bin kamap long Independens Wiken. Mary Toua i bin kamap Hiri Kwin 2004 bihain long em i winim dispela resis, long tokples Motu ol i kolim Hiri Hanenamo.

• Membra bilong Saut Flai long Westen provins, Conrad Haoda, long Septemba, i bin tok olsem ol manmeri long hap i wok long wari olsem nogut ol teroris birua i kamap long hap bikos ol i stap klostu long boda wantaim Indonesia.

Em i bin tok olsem dispela boda, longpela bilong em mak olsem 800 kilomita, i nogat wanpela man i was long en.

Mista Haoda i tok tu olsem long dispela as na planti manmeri bilong ol narapela kantri i wok long kam nating insait long PNG.

• Fi bilong daiv long Milen Be provins i bin go antap.

Nau ol turis husat i daiv long ol rip long solwara bilong provins long lukim ol pis na ol arapela laip long hap, i mas baim K2 antap long fi ol i wok long baim pastaim, K3.

Ol papa bilong rip, ol opereta bilong ol bot long karim ol turis i go long ol hap bilong daiv, na ol arapela manmeri husat i stap insait long dispela bisnis, olgeta i bin wanbel long dispela disisen long wanpela bung long Alotau long Mei.

• Wanpela jas bilong Nesenel Kot, Jastis Ambeng Kandakasi, long Mei, i bin tok olsem Noten provins i no wok long develop bikos long dispela tingting 'Oro bilong Oro'.


Em i tok dispela tingting we sampela lida bilong provins i wok long kamapim na bihainim i no helpim provins liklik.

• Nesenel Edukesen Bod i bin bung long Daru long Westen provins long Mas.

Seketeri bilong Edukesen, Peter Baki, i bin tok olsem Bod i bin bung long hap long soim wok bilong Nesenel Gavman long givim bilip na sapot long ol sumatin na manmeri long ol ausait taun, na soim olsem ol i ken helpim developmen bilong kantri tu.

• Wanpela man Papua Niugini husat i bin stap long Australia inap long 3-pela yia pinis, i tok olsem gavman bilong Australia i bin rausim em long hap long wanem em i laik karim Minista bilong Imigresen na Maltikalsarel na Indijines Afeas bilong ol i go long kot.

Jonathan Jay Baure, husat i bin stap long Sydney olsem wanpela pement resident o man husat i gat tok orait long gavman bilong Australia long stap olgeta long hap, i tok tupela Federel plis opisa i bin kam insait long haus bilong em long 3 kilok, Sarere moning, Febuari 28, givim sut long em long



• Yangpela meri soim kala long Hiri Hanenamo long Hiri Moale Festival long Pot Mosbi, Sentral provins.

mekim em i stap isi taim em i traim long stapim ol long holim pasim em, pasim ol han bilong em wantaim hankuf, kisim em i go long ples balus na karim em i kam olgeta long Pot Mosbi.

Mista Baure i tok olsem dispela i bin kamap long wanem em i laik karim minista i go long kot long toktok long rait bilong ol manmeri husat mama i bin karim long Papua bipo long Independens De long Septemba 16, 1975, o husat i bin gat kris-mas aninit long 19, olsem ol i gat rait long stap long Australia na kisim ol gutpela samting we ol sitisen long hap i save kisim.

Hai Komisn bilong Australia long Pot Mosbi, i tok olsem Australia i bin rausim, Mista Baure bikos em i no bin holim visa stret long stap long hap.

Mista Baure i wok long pait yet long ol rait em i bilip long en.

• Ilektoet bilong Mosbi Not Is, long Pot Mosbi, Sentral provins, nau i gat Membra bilong Palamen, bihain long wanpela bai ileksen i bin kamap.

Casper Wollom i nupela membra na i wok long lukluk long karim ol sevis i go long ol pipel na helpim sindaun bilong ol.

Dispela em sampela tasol bilong ol bikpela gutpela na bikpela nogut we i bin kamap long Sauten rijon. I gat planti moa, na wanwan i bin senisim tingting o laip bilong mipela long sampela we, bikpela o liklik.

Yumi mas amamas na lainim long ol dispela gutpela na nogut, na noken lukluk i go bek tumas, bikos nau em i nupela yia, na taim bilong lukluk i go het.

LAIP em i olsem, i gat gutpela na nogut bilong em. Yumi olgeta i laik lukim gutpela bilong em tasol, tasol planti taim, yumi i save bungim nogut bilong em tu.

Na yia 2004 long Sauten rijon, olsem tasol ol narapela yia i go pinis, i olsem. I gat gutpela na nogut wantaim. Yumi lukluk bek long sampela ol bikpela gutpela na bikpela nogut we i bin kamap.

• Gavana bilong Galp provins, Chris Haiveta, i bin tok olsem bikpela kampani we i save katim diwai long salim, Rimbunan Hijau (RH) i bin gat K8 milien dinau long provins.

Long wanpela sindaun bilong Palamen long Septemba, Mista Haiveta i bin tok olsem 200 i go inap 300 bilong ol bikpela masin na ka bilong kampani i wok long ron nating long rot, nogat laisens na insurens long yia 2000 i kam inap nau.

RH, long bekim ol toktok bilong Mista Haiveta, i tok olsem ol i no baim dispela ol fi bikos ol yet i bin mekim ol dispela rot.

Tasol Ektng Provinsal Edministreta bilong Galp provins, Miai Larelake, i tok olsem kampani i mas baim yet ol dispela fi.

RH i bin givim wanpela pepa i go long Nesenel Gavman, we i askim long tok orait long ol bai i no inap baim dispela fi.

• PNG Sustainable Development Limited i givim K250,000 i go long Australian Doctor International long mekim ol taunam we i bin go long Westen provins.

Dispela i bin namba 2 taim PNG Sustainable Development Limited i bin givim kain sapot aninit long Komyuniti Sustenabol Developmen Progam bilong em we ol i bin opim long Septemba.

Nambawan helpim em ol i bin givim long Rimginae Rurel Haus Sik long Westen provins long stretim haus sik.

• Long Jun ol nius ripot i bin tok olsem raskol pasin i wok long kamap bikpela long Pot Mosbi, Sentral provins.

Polis wankain taim ol ripot i bin tok olsem ol polis i wok long wok strong long daunim ol dispela pasin.

Long dispela taim, Polis Komanda bilong Nesenel Kapitel Distrik (NCD)/Sentral, Tony Wagambie, i bin givim tok lukaut long ol raskol olsem ol polis bai sut long gan long kilim tasol.

Safe Festive Motoring



KELLA Driving Lights
5627/100 Lamp Kit
2 X DRIVING LAMPS
1 X WIRING KIT
2 X PROTECTIVE COVERS

100 Watts of Power

PRICE INCLUDES GST.

CHRISTMAS SPECIAL
K222⁵⁹

**AVAILABLE NATIONWIDE...
HURRY WHILE STOCKS LAST!**

OFFER EXPIRES: 03rd JAN. 2005.

PORT MORESBY PH 3229400 • LAE 4781800 • KOKOPO 9829100 • MADANG 522188 GOROKA 7321844 • MT HAGEN 5421888 • WEWAK 8562255
KAVIENG 9842788 • KIMBE 9835155 • TABUBIL 5489060 • VANIMO 8571254 • IJGERA 5479367 • BUKA 9739915 • LIHIR 9864099 • ALOTAU 6410100



Passenger & Commercial
TYRES
16580R13B80
FOR CARS AND LIGHT
VEHICLE TYRES

FROM AS LOW AS
K99⁵⁰

PRICE INCLUDES GST.

Quality System

Quality Endorsed Company

ASQC 30 JAN 2005
Sydney, Australia

www.elamotors.com.pg

Vot i nogat bilip



Oposisen i bin traim ol rot bilong kamapim vot i nogat bilip long Gavman bilong Sir Michael Somare long mun Epril tasol hariap tru Gavman i bin kamapim wangepa lo bilong surukim taim bilong vot i nogat bilip i go long tripela krismas long i mas kamap.

Ol i laik senisim 18 mun we vot i gat bilip i ken kamap bihain long Gavman i kamap. Insait long dispela senis tu em sapos husat man i kamapim vot i nogat bilip na i winim muv bilong vot i kamap, orait palamen bai i go bek long ileksen.

Dispela i kamapim kinkain tok pait na toktok nabaut long pasin na rot dispela nupela to i kamap long en.

Tasol dispela lo i no kamap yet na i hangamap yet long palamen wangepa taim bai tasim gen.

Bikos Gavman i bin kamapim wangepa longpela holide stret long mun Ogas i kam inap long mun Novemba.

Long dispela taim em olgeta memba i go malolo na taim ol i kam bek, ol i gat bikpela wok bilong redim baset bilong ol bikos em i taim bilong Gavman i pasim baset bilong 2005.

Olsem na i nogat taim long arapela bisnis olsem vot i nogat bilip, arapela bisnis olsem kamapim sampela nupela lo na arapela moa. Olsem na bai Oposisen i lukluk gen long traim gen long Februari 2004. Bai ol i gat namba o nogat.

Pipels Progres Pati (PPP)

Memba bilong Pomio Paul Tiensten wantaim arapela memba olsem Dokta Allan Marat bilong Rabaul na arapela i holim wangepa eksen we ol i rausim memba bilong Makam Andrew Baing olsem lida bilong Pipels Progres Pati (PPP).

Tasol salens long lidasip bilong PPP i kamap taim Somare i rausim Andrew Baing olsem Deputi Prarim Minista na minista bilong Fiseris. Em nau PPP i go long Oposisen tasol Paul Tiensten i stap yet olsem Minista na em wantaim arapela PPP i stap bek long Gavman na ol i kamap wantaim dispela senis long lidasip bilong pati.

Tasol Andrew Baing i go long kot na kot i luksave long Andrew Baing olsem pati lida. Long nau yet ol PPP i stap bruk we Andrew Baing wantaim memba bilong Namatanai Byron Chan na memba bilong Finsafen Guao Zurenuoc i stap long Oposisen.

Dispela muv bilong PPP i bin stat bilong ol arapela pati tu i bin bruk wankain olsem.

Pangu Pati

Pangu Pati bin stap gut wantaim Gavman i kam inap pati lida Chris Haiveta i wok long sindaun long namel sia na toktok wantaim Oposisen lain i stap.

Chris Haiveta i bin go long Oposisen wantaim Conrad Haoda bilong Saut Flai tasol arapela olsem Sir Rabbie Namaliu, Ian Ling - Stuckey na Martin Aini, Amiteng Buhupe i stap yet wantaim Gavman.

Wankain pasin olsem PPP i bin mekim, ol i laik senisim lidasip bilong pati na makim Sir Rabbie Namaliu olsem pati lida.

Stail bilong politiks long 2004

Yakam Kelo i raitim

GAVMAN bilong Praim Minista Sir Michael Somare i bin sanap antap long bikpela het tok bilong kirapim bisnis na pulim mani i kam long kantri we i stat long 2002 i kam.

Long dispela yia ol i bin ron antap long K4.3 bilien baset bilong ranim kantri we bikpela wok i sut long strongim ol wok didiman o agrikalsa.

Dispela taim Gavman i paitim bros olsem dispela polisi bilong ol i wok bikos kantri i stat long mekim mani we bikpela benk bilong Papua Niugini ol i kolim Sentrel Benk i tokaut olsem ol i gat mani long risev nau mak olsem K300 milien.

Dispela em gutpela nius bilong kantri bikos taim strong bilong kina i bin pundaun nau dispela risev i holim strong bilong kina i sanap long wangepa gutpela level we i lukim ol bisnis i stat long kisim win na strong gen. Tasol moa kopi beg, kakao na

kopra i wok long go yet long ovasis maket na tu prais bilong oil i sut i go antap tu insait long wol maket we i lukim PNG i mekim gutpela mani long dispela yia.

Planti memba bilong palamen long sait bilong Gavman i bin tokaut strong olsem ekonomi na kantri i wok long ron gut nau na maski long ol kinkain tingting nabaut bilong traim salensim Gavman long ol vot i nogat bilip.

Larim Gavman i stap na pinisim olgeta wok na polisi bilong em taim kantri i wok long lukim ol gutpela senis i kamap nau.



•Praim Minista Sir Michael Somare na ol minista i bung long rot projek long Lufa distrik.

Bai Ileksen na nupela vot (LPV) i kamap

Tripela bai ileksen i bin kamap long dispela yia 2004. Namba wan bai ileksen em long Yangoru Sausia bihain long kot bilong lidasip traibunel i rausim olpela memba Bernard Hagoria long asua bilong mani i pau.

Dispela bai ileksen em ol i bihainim nupela sistem bilong vot. Abau ilektoret long Sentrel provins i bin namba wan ilektoret long karimaut Limited Preferensel Voting (LPV) sistem long 2003 we Dokta Puka Temu i bin winim.

Dispela bai ileksen bilong Yangoru Sausia i bin kamap gut wantaim dispela nupela sistem bilong vot o LPV.

Bihain long dispela Simbu rijinol na Anglimp Saut Wagi bai ileksen i kamap bihainim dispela LPV na i bin kamap gut tru we i no olsem bipo olpela sistem we



kinkain pasin bilong baim vot na mekim nabaut long pretim ol manmeri long vot i save kamap. Dispela bai ileksen i kamap long wangepa de tasol na i nogat bikpela nois long en. Peter Lauma i winim Simbu rijinol na Jamie Maxtone Graham i winim Anglimp Saut Wagi.

Bihain long dispela tripela ilektoret ol i pinisim long Mosbi Not Is na Wabag bai ileksen bihainim dispela nupela sistem we ripot bilong polis i tok dispela i bin kamap gut tru bikos ol polis i mekim wok bilong ol gut tru na i nogat trabel o hevi i kamap long bagarapim ron bilong ol dispela bai ileksen. Caspar Wollom i winim Mosbi Not Is na Samuel Tei Abel i winim Wabag open sit bai ileksen.

Dispela nupela stail bilong vot o LPV em bai yu makim tripela man yu laik makim. Namba wan long kendidet yu ting em i namba wan.

Makim namba tu long kendidet yu ting em i namba tu long save na tingting bilong yu na namba tri long kendidet yu ting em namba tri long tupela kendidet yu makim pinis.

Pipels Nesanel Kongres (PNC)

Pipels Nesanel Kongres pati bin strongpela sapota bilong dispela gavman bilong Somare. Olpela lida bilong PNC em Bill Skate na em i bin go pas long strongim namba bilong ol memba na ol i winim gavman.

Em i holim wok bilong Spika bilong palamen inap sampela kain tok paul i raun olsem PNC i wok long pasim tok wantaim Pipels Eksen Pati (PAP) na PNG Pati long Oposisen long senisim gavman. Olsem na Bill Skate bin kirap nogut taim em i sainim pepa bilong ol PNC memba bilong em long Gavman Haus taim Gavman i senisim ol nupela minista.

Bill Skate i bin eking Gavana Jenerel long dispela taim (Julai Ogas) bikos i nogat Gavana Jenerel bilong kantri long dispela taim. Dispela taim ol memba bilong PNC olsem Peter O'Niell, Kappa Yakka na arapela PNC memba i lusim wok bilong ol olsem minista. Peter O'Niell i tokaut olsem em i stret em pawa bilong Praim Minista long mekim olsem na ol bai go long Oposisen.

Bihain long dispela palamen i kamapim vot na rausim Bill Skate long sia bilong Spika na makim namba tu bilong em Jeffery Nape olsem Spika bilong Palamen.

Mista Nape em memba bilong Nesanel Alaens (NA) pati we Praim Minista Sir Michael Somare i go pas long en na tu i go pas long ranim Gavman.

PNG Pati

Taim ol pati i bin go insait na join wantaim Oposisen, olpela Oposisen lida Sir Mekere Morauta wantaim pati bilong em PNG Pati i kirap na lusim Oposisen na joinim Gavman. Sir Mekere i tokaut olsem em i no egensim pasin bilong kamapim vot i nogat bilip long senisim Gavman bilong Somare. Tasol em i laikim i mas gat gutpela as tru bilong senisim gavman na husat lida tru inap kamap Praim Minista sapos Oposisen i senisim Gavman long vot i nogat bilip. Long dispela as em i strong long noken senisim Gavman na em wantaim ol PNG Pati i go joinim Gavman long strongim namba. Taim ol i go, tripela memba bilong ol em Jacob Jumagat bilong Manus, John Muingepe bilong Bulolo Hami Yawari bilong Sauten Hailans i bin stap bek long Oposisen. Tasol las mun tasol ol tripela igo join wantaim ol lain bilong ol. Sir Mekere Morauta husat i bin olpela Praim Minista long bipo i lida bilong ol dispela lain.

Nesanel Alaens (NA)

Dispela em wangepa bikpela pati insait long kantri we i go pas long gavman nau. Praim Minista Sir Michael Somare yet i go pas long en na ol i bin kamapim Gavman long 2002.

Wangepa memba bilong ol em memba bilong Menyamy Geoka Teka i bin lusim ol bikos em i tok Gavman i no harim wari bilong em long ol projek bilong em long Menyamy. Las mun tasol nrapela memba bilong NA yet em memba bilong Angoram Arthur Somare i kirap tanim bek na salensim disisen bilong pati bilong em na gavman we em i stap long en. Em i salensim ol long toktok bilong salim Telikom PNG Limited i go long wangepa kampani bilong Afrika. Long dispela as ol toktok pait kamap na Praim Minista yet i kirap na rausim wangepa sinia memba bilong NA yet em Dokta Puka Temu long wok bilong em olsem Minista bikos long dispela toktok bilong salim Telikom.

Glasing wok bilong ol meri long 2004



Lukluk bek long 2004 wantaim Veronica Hatutasi

LONG dispela yia, bikpela luksave i bin kamap long skruim wok bilong ol meri long 5-pela eria we inap long helpim ol meri long PNG i go hetim laip na sindaun na long wankain taim tu, kontribuit long ol wok developmen bilong kantri.

Wantok i glasing na skelim 4-pela eria olsem **Violence Against Women o Daunim pasin bilong paitim na bagarapim ol Meri, HIV/AIDS na Poverty Reduction o Daunim Pasin Trangu, Gender Equality na Acceleration of Girls Education o Sapotim Skul bilong Pikinini Meri na Ol Wok Kamap we ol meri grup i bin kamapim long eria bilong ol long dispela yia.**

Yumi ken brukim ol meri na mama grup long: Ol profesenel na bisnis meri, ol wokmeri, ol meri insait long Provinsel Kaunsil bilong ol Meri, ol meri insait long ol sios grup long ples, taun na setelmen na ol sumatin meri. Tasol Wantok i glasing olsem long planti taim ol meri na mama grup long ol sios, setelmen, ples na taun i save stap insait long ol planti samting i karamapim wok bilong ol meri. Wantok i lukim olsem long planti yia nau, ol wokmeri i no save kamap long stap insait long ol selebresen we i luksave long ol bikpela samting sut long ol meri.

Violence Against Women o daunim pasin bilong paitim na bagarapim ol meri.

Bikpela toktok na aweanes i kamap long daunim dispela pasin bilong kamapim hevi long ol meri, ol mama na ol susa insait long famili, wokples na sosaiti. PNG i gat nem long wol long dispela pasin na dispela i no kamapim gutpela piksa. Na em i moabeta long luksave long dispela na ol PNG man i ken senisim pasin na daunim dispela hevi na mekim ol meri ol gutpela poroman bilong ol. Kalsa o pasin tumbuna em i wanpela samting we i strongim yet dispela pasin bikos ol man i baim ol meri na ol i tukim olsem ol propeti bilong ol long mekim wanem samtign ol i laikim. Tu, pasin bilong bagarapim ol pikinini meri i wok long go bikpela.

"Domestik vailens i wok long kamap long planti rot long ol meri long PNG, maski ol i gat bikpela skul na wok olsem ol grasrut meri/mama. Long ripot bilong Wol Heit Ogenaisesen long Mas 2002, PNG i bin kamap namba tu long wol long gat bikpela mak long paitim na mekim nogut long ol meri", Intenesenel Angliken Famili Network i tok.

Mosbi Saut na Sosel Developmen Minista Ledi Carol Kidu i mas gat ol "niuej" man husat i givim gutpela laip na sans long ol meri na wok patna wantaim ol long wokples na haus we i fri long vailens na pasin bilong mekim nogut na bagarapim ol. Namba

wan meri jas long PNG Cathy Davani i tokaut olsem dispela hevi bilong paitim meri i olsem wanpela kensa we i wok long bagarapim ol famili. Em i tok ol lo i stsap long lukautim dispela eria em ol i bilong bipo yet na i no gutpela long stap bilong tude. Na kot i mas wok klostu wantaim ol polis na welfea long helpim ol meri i kisim hevi.

Wanpela gutpela sainmak i kamap olsem sampela man i luksave long hevi ol meri/mama i bungim na ol i mekim samting long sapotim ol meri. Long namba wan taim tru, 9-pela man na yut grup long Pot Mosbi i bin bung wantaim long go pas long redim na go insait long program bilong "Violence Against Womens Day" long stat bilong dispela mun. Pater John Glyn husat i go pas long Yut Egensim Korapsen, Siti Misin na ol arapela yut na man grup insait long siti i bin mas i go long Sir John Guise Stadium na stap insait long ol toktok na ektiviti i bin kamap long Disemba 7 bilong makim dispela de bilong ol meri. Pablik Prosekyuta Kronox Manek i bin skruim tok bilong ol man na yut



Bessie em yangpela meri PNG i wok wantaim Nesenel AIDS Kaunsel i bin winim intenesenel awod long wok em i mekim long daunim HIV/AIDS long PNG.

grup na tok "Toktok pastaim na stretim long maus" i gutpela rot long stretim hevi. Na bikpela toktok i bin kamap tu long dispela de na ol arapela taim olsem ol man i mas senisim pasin na luksave na sapotim ol meri olsem ol gutpela poroman long kamapim gut famili, komyuniti, sisaiti na kantri.

HIV/AIDS na Poverty Reduction o daunim pasin long sot long samting

Maski em i no rong bilong ol, planti mama na meri i wok long kisim bagarap long HIV/AIDS. Planti em ol man paul raun na kisim na gviim i goi long mama na bebi we i stap long bel. Tu bikpela mak long wol long ol dispela i stap trangu em ol meri.

Bikpela samting we ol meri grup, ol helt atoriti na ol NGO na ol sios grup i mekim em long karimaut aweanes na ol meri/mama i ken kisim save na strong long abrusim dispela sik nogut we i biruaim planti mama na pikinini long PNG.

Mak bilong ol meri na mama i kisim dispela sik i bikpela. Olsem na ol dona ejensi i gviim sapot wantaim mani long ranim ol wok-sop na aweanes bilong HIV/AIDS na tu, givim skul na trening long ol meri na ol i ken wokim ol samting long kisim mani na helpim ol yet, famili na komyuniti. Aninit long dispela, planti grasrut na ol arapela meri tu long siti, ples na ol setelmen i sindaun long ol somap, kuk, hospitality, mekim henkraf na ol kain trening kos olsem.

Accelerating Girl Child's Education/Gender Equality

Dispela em bin wanpela bikpela samting Edukesen Dipatmen i bin kamapim long dispela yia taim em bin lonsim o opim program "Plen ov Eksen bilong Hariapim na Strongim skul bilong ol Pikinini meri" long kantri long mun Epril bilong dispela yia. Bikpela luksave i stap olsem taim yu gviim skul long pikinini meri, yu givim skul long kantri.

Edukesen Minista Michael Laimo i bin salensim pablik na olgeta grup long kantri long wok bung wantaim na go hetim eksen plen bilong sapotim skul bilong ol meri.

We UNICEF i givim ful sapot long em. Ol i kirapim pinis wanpela komiti we bai go hetim ol wok i stap long plen. Em i bin tok as long mak bilong ol pikinini meri i stap long skul i daunbilo long mak bitong ol man em bikos long pasin kastam bilong PNG we ol meri i stap daunbilo long ol man. Olsem na planti famili i save holim bek ol pikinini meri long ples na salim ol pikinini man i go long skul. Minista i bin tok dispela i no gutpela pasin na i mas senis. Em i tok planti meri i save mekim gut long skul na ol i koen helpim long kamapim gut ol wok developmen long kantri, famili na komyuniti. Bihainim dispela, em bin salensim olgeta grup long komyuniti long sapotim Edukesen Dipatmen na wok wantaim long go hetim plen bilong kamapim gut skul bilong ol meri.

Long wankain taim tu, singaut na wok i kamap long givim wankain luksave long ol meri olsem ol man long ol wok ol i mekim bikos tupela wantaim i wok long kamapim developmen na wok ol i mekim i stap long wankain level.

Trening/Ol wok kamap bilong ol wan wan meri grup

Trening na ol woksop em wanpela bikpela eria planti meri grup na meri i bin sindaun long em long skruim save bilong ol long ol eria ol i karimaut wok long en.

Goroka meri grup

Ol meri Goroka i kamap top stret long ol meri long PNG long karimaut ol trening na wok long sait bilong ol meri na long mun Oktoba, Polis Minista Bire Kimisop i givim luksave taim em i katim K900,000



Ol Katolik meri long Kavieng Daiosis i soim ol henkraf ol bin mekim. Narapela piksa i soim wanpela grup i laik redi long kwaia resis. Piksa: Veronica Hatutasi

long kirapim 9-pela risos senta bilong ol meri.

Ol meri grup long Goroka i bin askim Sosel Developmen Minista Ledi Carol Kidu long stap insait long wanpela wik woksop bilong ol. Dispela em ol meri long Okiufa na Faniufa eria.

Angliken Madas grup: Angliken Madas Yunien i bin makim nupela presiden. Ann Mota i bin kisim vot na bikpela toktok em bin mekim em i bin strongim ol mama long strongim na kirapim Kristen pasin insait long famili na marit. Tu, em bin toktok long lainim ol pikinini long gutpela Kristen pasin na ol i ken kamap ol gutpela manmeri long famili, komyuniti, sosaiti na kantri. Em bin toktok long ol memba bilong Madas Yunien i strongim wok long HIV/AIDS autris, kaunseling, lukaut long ol HIV/AIDS lain na ol mama wantaim famili na marit hevi.

ELC/PNG- Ol Luteran Sios meri grup memba i bin holim nesenel womens konferens bilong ol. Na long mun Septemba, namba 9 konferens bilong ol ELC/PNG meri i bin kamap long Kimbe, Wes Nu Briten na long dispela taim tu, ol bin opim Decade to Overcome Violence Against Women.

Ol Bogenvil meri: Gavman bilong Japan i gviim ol helpim long kirapim risis na trening senta long Buka. Long mun Septemba, ol

Intenesenel De bilong ol meri, Presiden bilong Manus Pihl Asosiesen na meri lida Nahau Rooney i bin askim strong ol meri long lusim tingting long sait ol i sapotim na wok bung wantaim long kamapim senis long famili, sosaiti na kantri.

Long mun Ogas, ol Katolik mama na meri grup bilong Kavieng Daiosis i bin selebretim bikpela bilong ol na putim kamap ol samting long luksave long dispela de we i bin pondaun long Sande Ogas 15. Bikpela toktok long dispela de em askim long wok bung gut wantaim.

Long mun Septemba, AusAID i bin givim K6.6 milien long sapotim trening bilong ol meri long ol wok bai helpim long skruim wok developmen long kantri.

Long Wol AIDS De long Disemba 1, Ledi Kaludia Matane i binsalensim ol meri long lukautim bodin bilong ol na tu, tok long olgeta manmeri i mas pas wantaim wanpela patna bikos sik HIV/AIDS i wok long go olsem waipaia. Toktok i bin sut tru long ol yangpela manmeri long kantri we dispela siki i wok long kisim ol gut tru.

Na long dispela mun, ol meri grup i karamapim Famili na Wimens Seksuela Eksen Komiti i bin tok strong long han bilong em long Madang wantaim tu polis long Madang long go het long gutpela wok inap kot i pinisim olgeta wok



Ol meri i lainim long wokim henkraf na ol basket.

meri Buin long saut Bogenvil i bin bung na ol i toktok long laik bilong ol olsem i mas gat meri long makim ol long nupela gavman. Long mun Oktoba, wanpela TV grup bilong Fiji i bin raun i go long Bogenvil long wokim TV Dokumenteri bilong ol meri na dispela i sut long ol hevi na stap bilong ol long taim bilong Bogenvilo pait. Long dispela taim tu, ol mama we ol man bilong ol em ol bin kilim ol long Bogenvil pait i autim wari bilong ol long hevi bilong skul fi mani na ol i laikim helpim. Ol meri Bogenvil i laikim tu trening na sapot long katrimaut ol wok i sut long jastis, kamapim bel isi pasin na lidasip.

Nesen: Long makim

long kot bilong Gavana James Yali husat i bin slip wantaim liklik tambu skul meri we krismas bilong em i stap aninit long 18 yias. Lo i lukautim ol pikinini we krismas i stap aninit long 18 yias i slip wantaim ol lain i gat bikpela luksave em ol i mas kalabus long 15 krisams.

Dispela em sampela long ol samting i bin kamap long sait bilong ol meri long 2004. Yumi putim han wantaim na wok bilong ol meri i ken go gut long neks yia, 2005.

Meri Wantok i salim bikpela amamas long nupela yia i go long yupela ol rida na askim yupela long sapot bilong yupela gen long dispela nupela yia i kam.

Meri Wantok i laik save sapos yupela i save laikim ol stori mipela i save printim. Rait i kam long Meri Wantok, Word Publishing Company, PO Box 1982, Boroko, NCD o ring i kam long telipon 325 2500 na toktok long Veronica Hatutasi. Yu ken salim ol stori tu long

Sios givim bikpela helpim



Veronica Hatutasi i raitim

YUMI kam gen long pinis bilong yia 2004, na liklik taim nau bai yumi tok welkam long nupela yia 2005.

Tasol bipo yumi kalapim nupela yia, yumi lukluk bek long sampela ol bikpela samting i bin kamap long sios insait long Papua Niugini long dispela yia.

Ol Sios long kantri i mekim bikpela wok long sevim pipel long spirituel sait, long sait bilong kisim ol bikpela sevis olsem helt na edukesen i go long ol pipel na long sait bilong givim save na man i ken gat strong na pawa long kamap gut, luksave long ol rait bilong ol na ol i ken wok long kamapim gut laip na sindaun long ol. Na tu long mekim wok long sevim kantri.

Long sait bilong givim sevis long helt na edukesen, ol sios na moayet ol bikpela sios olsem Katolik Sios, Evanjelikel Luteran Sios bilong PNG (ELC/PNG), Angliken Sios na Yunaitet Sios, i mekim bikpela wok long kisim ol sevis i go long ol pipel insait long ol rurel komyniti. Long ol bus ples we gavman sevis i no save go long en, ol sios i stap. Ol sios i save stap klostu tru long ol pipel na wanem hevi i kamap, maski em i long sait bilong politiks, sosel, wok mani, hevi long ol bagarap bilong guria, graun i bruk, taiswara i pundaun, solwara i solap na planti arapela moa, ol sios em ol namba wan lain i save helpim ol pipel.

Wok poroman namel long gavman na sios

Long dispela yia, wok poroman namel long ol sios na gavman long skruim ol wok bilong ol helt na edukesen sevis i bin wanpela bikpela samting.

Long planti yia nau, gavman i givim luksave long ol sios na em i kirapim wok pren wantaim ol long strongim wok bilong kisim helt na edukesen sevis i go long ol pipel.

Katolik, Luteran, Angliken, Yunaitet, Seven De Etventis na Salvesen Ami em 6-pela long ol bikpela sios we i gat gutpela wok bung wantaim Nesenel Gavman long karim helt na edukesen sevis i go long ol pipel.

Ol ovasis dona ejensi tu, we wanpela long ol em AusAID, i luksave tu long gutpela wok ol sios i mekim na ol i givim helpim mani long sapotim ol helt, edukesen na humen developmen projek bilong ol sios.

Bilong strongim olsem dispela wok bung wantaim long ron gut, Dipatmen bilong Edukesen, Nesenel Gavman, na ol sios i



• Ol sios lida i toktok wantaim Anna Awasa (namel) long EMTV program *Insait* long AIDS aweanes kempen.

bin bung long dispela mun yet na toktok wantaim long stretim wanem hevi i stap namel long ol, glasim na skelim ol hap we ol i ken helpim wanpela narapela insait long wok poroman na ol arapela bikpela samting moa. Sampela long ol samting we ol sios edukesen mausman i bin toktok strong long ol em long ol sios i mas gat toktok long givim mekim ave long ol tisa i wokim bikhet pasin na ol arapela samting moa.

Oraitim luksave na wok poroman gavman bilong PNG na Australia na tu ol arapela ovasis helpim grup i gat long ol sios i bin kamap long ples klia klostu long mun Novemba taim Gavman bilong Australia, aninit long PNG Sios Patnasip Program, i bin givim K7 milien long sapotim ol helt na edukesen program bilong ol sios. Na dispela em i namba wan hap bilong 5-pela yia program Gavman bilong Australia i givim.

Dairekta Jenerel bilong AusAID long Australia, Bruce Davis, i bin opim program na givim namba wan hap mani bilong projek we ol lida bilong 7-pela sios nem bilong ol i stap antap.

"Luksave i stap olsem ol sios i mekim bikpela wok long kisim ol helt na edukesen na narapela sevis i go long ol pipel long dispela kantri. Dispela program i luksave olsem ol sios i laikim sapot long strongim ol long kisim ol sevis i go long pipel i stap long ol longwe hap na stap insait long wok developmen na gutpela sindaun insait long kantri.

"Ol sios i gat longpela histri long sapotim developmen insait long PNG na lukautim gut mani. Na em i gat gutpela hanwok long ol ples i stap long ol bus. Na planti taim, gavman i save lukluk long ol sios long givim ol sevis long ol longwe bus ples," Mista Davis i bin tok.

Long namba wan yia, program bai i strongim ol bikpela eria olsem: Strongim ol institusen olsem trening, fainensei na kontrol sistem menesmen. Aninit long dispela, Salvesen Ami bai opim bek nening trening skul long Westen Hailans provins.

HIV AIDS em i wanpela bikpela hap we dispela helpim i karamapim

Aninit long dispela program, Katolik sios bai kirapim ol HIV AIDS senta. Namba wan ples we bai ol i kirapim dispela em long Westen Hailans provins bikos mak bilong ol pipel wantaim dispela sik long hap i bikpela tumas.

Angliken Sios tu em i go insait strong long daunim HIV AIDS wantaim Anglikea StopAIDS ogenesesen we wok bilong en em long kisim aweanes na trening i go long ol "peer" grup, komyniti na setelmen na tu long ol wokples.

Asbisop James Ayong, Hetman bilong Angliken Sios long PNG, i bin tok em i tok welkam long dispela program bikos ol 7-pela sios i stap insait long program bai wok bung wantaim long sait bilong

trening, wok bung long ol hap we ol risos i sot long helpim ol pipel bilong ol.

Ol sios go insait strong long HIV AIDS aweanes

Long wankain taim tu, ol sios i bin strong long dispela yia long go insait long wok bilong pait egensim sik AIDS. Pianti sios long PNG i bin stap isi, tasol long dispela yia ol tu i bin luksave long bagarap na hevi we AIDS i kamapim na ol i strongim ol wok aweanes long ol pipel, moa yet long ol yangpela.

Long EMTV program ol i kolim long *Insait*, 4-pela sios lida bilong Katolik, Yunaitet, Angliken na Asembli ov God i bin tok olsem nau ol famili i mas toktok long HIV AIDS na i no moa samting bilong haitim. Dispela ol lida i bin tok nau ol famili i mas toktok long HIV/AIDS na i no moa samting bilong haitim, ol papamama i mas toktok long ol pikinini bilong ol long seksualiti o pasin bilong wokim pren namel long ol yangpela pipel, marit na wok bung wantaim namel long ol sios we ol i ken serim tu ol risos long daunim HIV AIDS. Nesenel HIV AIDS projek na Nesenel AIDS Kaunsel i sapotim dispela program we Anna Awasa i bin go pas long en long EMTV.

Bikos PNG em i wanpela Kristen kantri, ol bin wanbel olsem ol sios i gat bikpela wok insait long ol komyniti na sosaiti long PNG na rot we kantri i laik painim long daunim HIV AIDS.

Long strongim yet wok bilong daunim HIV AIDS, ol sios i bin kamapim wanpela ogenesesen tu we ol i kolim Faith Based Organisation (FBO).

Opim bilong dispela ogenesesen i bin kamap long Seven De Etventis Sios long Korobosea long Pot Mosbi.

Gavana Jenerel Sir Paulias Matane i bin tok amamas long ol sios lida i wok bung wantaim long daunim sik nogut.

"Yupela em ol lain husat i save stap, wok wantaim na save gut long komyniti bilong yupela. Kantri i amamas tru long kisim yupela i kam insait long HIV AIDS pait," Sir Paulias i bin tok.

Long dispela yia tu, Gospel grup bilong Afrika, Makoma, i bin kam long PNG long autim strong ol stia toktok na kamap olsem gutpela piksa long daunim HIV AIDS bilong ol yangpela pipel long PNG.

Jenerel Asembli bilong Katolik Sios

Long dispela yia, tupela bikpela samting i bin kamap long Katolik Sios na Luteran Sios.

Long wanpela wik i stat long Julai 5 inap long Julai 10, Katolik Sios long PNG i bin holim bung long pasim Jenerel Asembli.

Dispela i bin wanpela bikpela samting insait long Katolik Sios we moa long 200 manmeri i makim ol 19 daiosis long kantri

we i bin gat long en ol bisop, pater, ol sista, ol lei pipel, ol meri na yut lida, husat i bin bung long Vunapope, hetkota bilong Katolik Sios long Rabaul Asdaiosis long paitim toktok, glasim, skelim ol samting long sios na kamap wantaim plen na visen we bai stiaim sios insait long ol yia i kam.

Ol wok long Jenerel Asembli i bin stat long namel bilong yia 2002 na long dispela taim, olgeta daiosis i bin kamapim ol komiti long glasim na skelim wok bilong sios na mekim sios i kamap olsem sios bilong ol PNG pipel tru, we ol asples pipel wantaim tu ol leiman i go pas long ol wok bilong sios.

Nesenel Siaman bilong Jenerel Asembli Bisop Douglas Young taim em tok tenkyu long ol lain i bin stap long bung, Asbisop Karl Hesse na ol Katolik pipel long Rabaul Asdaiosis long lukautim dispela bikpela bung we i bin go gut stret, i bin tok Katolik Sios i wok long lukim senis long pastaim em i bin "misinari sios" i go long "self reliant" o sios i lukautim em yet na em i go insait strong long wok bilong evanjelisesen na tu kamap moa sios bilong ol PNG pipel we moa lei pipel i go pas long ol wok.

Asbisop Hesse i bin wanbel long ol dispela toktok. *Visen o driman we sios bai bihain insait long ol wanwan daiosis em: "Mipela Katolik Sios long PNG i stap laip long Krai na lukim laik pasin bilong Bikpela long wol. Misin: Long bihainim singaut bilong Papa na Santu Spiritu i salim, mipela i sevim long apim Kingdom bilong God long kamap witness long Gutnius, gro long pasin santu na skruim strong wok bilong sios long kamapim senis long wol. Na ol Prairiti o ol bikpela samting we Asembli i bin kamap wantaim bihainim prisentesen bilong ol wanwan daiosis na long inapim ol, ol i mas kamapim wanpela Nesenel Plen we i karamapim ol bikpela samting sios aninit long ol daiosis i mas lukluk long ol en em: Famili Laip, Yut, Katekis, trening na Fomesen long olgeta level, Jastis na Pis na lukautim ol samting Bikman i wokim, Helt na Edukesen na ol arapela moa."*

Bung i bin lukluk tu long ol hevi na trabel kantri i bungim na i bin singaut long ol politisen na lida bilong kantri long lusim pasin bilong pait long pawa na lukluk long wari bilong ol pipel.

Ol i bin tok bikpela samting ol lida i mas wokim em long mekim gut ol rot, givim gutpela helt na edukesen sevis na tu wokim samting long dispela AIDS hevi we i kamap bikpela long kantri.

Bisop Young i bin toktok strong tu long wok poroman namel long gavman na ol sios long bringim sevis i go long ol pipel i go olgeta long ol bus.

I go long pes 11.



"Man i bihainim lo bilong God"

Olsem wanem na yangpela i ken wokabaut long klinpela pasin? Em i mas bihainim tok bilong yu na bai em i stap klin. Yu helpim mi na mi no ken lusim ol lo bilong yu. Mi putim tok bilong yu i stap long bel na tingting bilong mi. Olsem na bai mi no ken mekim sin long yu. Bikpela, mi litimapim nem bilong yu. Yu mas lainim mi long ol stretpela lo bilong yu. Mi save tokim ol manmeri long olgeta lo yu bin autim long mipela. Mi save amamas tru long bihainim tok bilong yu. Na mi no save amamas long planti mani na bilas samting. Mi save tingting gut long ol samting yu laik mi mekim, na mi save skelim ol tok yu bin givim mipela. Mi laikim tumas ol lo bilong yu. Mi no ken lus tingting long dispela tok.

Buk Song 119: 6-16

Sios givim bikpela helpim

I kam long pes 10.

Seketeri bilong Luteran Wol Federesen raun long PNG

LUTERAN em i namba tu bikpela Kristen sios long Papua Niugini na long mun Julai dispela yia, taim Katolik Sios i stap insait long Jenerel Asembli bung bilong ol, bikman bilong Luteran Wol Federesen, Jenerel Seketeri Dokta Ishmael Noko, na lain bilong em, i bin mekim wanpela bikpela raun i kam long PNG long lukim ol memba bilong Luteran Sios insait long kantri na stap wantaim ol, 118 krismas bihain long namba wan misinari i bin krugutim PNG na kirapim sios.

Dokta Noko i mekim namba 84 wokabaut bilong em insait long wol i kam kamap long PNG long Julai 3 na go antap stret long Enga provins.

Wantaim em i bin Eria Seketeri bilong Esia Reveren Ginda Harahap. Em tu i save wok long bikpela opis bilong Geneva wantaim Dokta Noko.

Long Enga provins Dokta Noko i mekim wokabaut i go long Tsak hap long Wapenamanda distrik we em i bungim moa long 4000 manmeri bilong dispela hap. Enga em hap bilong Gutnius Luteran Sios we Bisop David Piso i go pas long en.

Ol manmeri bilong Tsak Veli i bin bung wanpela wik pastaim long wanpela kem inap Sarere taim Dokta Noko i kamap na ol i amamas na lotu wantaim.

Mak olsem 45 pikinini na ol bikpela pikinini i bin kisim baptisim we Dokta Noko i baptisim ol. Reveren Harahap tu i helpim long baptisim ol pikinini.

20 manmeri i bin kisim konfemesen na 9-pela bikpela manmeri i makim provins long holim wok bilong sios. Dispela i bin wanpela bikpela de tru long ol manmeri long hap.

Dokta Noko i tok olsem em i amamas tru long kamap long Papua Niugini. Em i ting em bai lukim narakain skin olsem ol waitman o ol kongkong tasol em i kirap nogut long lukim ol blak skin manmeri olsem em yet. Dokta Noko em bilong Zimbabwe long Afrika.

Bihain long Enga provins em i kam bungim ol Luteran bilong Hagen Distrik we em i autim tok long ol long Kwins Pak oval na strongim ol Kristen manmeri long Hagen.

Dokta Noko na Reveren Harahap i bin bungim tu ol Kristen manmeri bilong Melpa Luteran Sios long Maunt Hagen na toktok



• Karamap bilong wanpela kaset bilong ol Hillsong Singers.



• Dokta Noko i givim baptismo long wanpela pikinini long Tsak Veli.

Foto: YAKAM KELO

wantaim ol long belhevi ol i gat long sios. Het Bisop bilong Evanjelikel Luteran Sios bilong Papua Niugini (ELC/PNG) Reveren Dokta Wesley Kigasung tu i bin stap long dispela bung long Maunt Hagen.

Bihain long tripela de long Maunt Hagen, ol Luteran Wol Federesen bikman i kamap gen long Lae, Morobe provins, na go olsem long Finsafen we ol i bung na lotu na strongim ol Kristen manmeri long hap.

Ol i sindaun toktok wantaim ol seminari bilong Elsberg na go lukim tu namba wan haus lotu long ples Simbang we namba wan misinari John Friel i bin kamap long en long 1886.

Bihain long en Dokta Noko i holim bikpela lotu wantaim ol Kristen manmeri long Lae long Sir Ignatius Kilage Stadium long makim 118 krismas bilong Luteran Sios insait long Papua Niugini.

Long Mande Julai 13 em i bung wantaim ol Luteran long Pot Mosbi na holim las bung wantaim ol long Sir John Guise Stadium na Tunde, Julai 14, Dokta Noko i lusim Pot Mosbi na go bek long Geneva. Reveren Harahap i bihainim em long Julai 15.

Tupela intanesenel Gospel musik grup kam long PNG

Long dispela yia tu, PNG i bin lukim tupela ovasis gospel o lotu grup i kam pairapim musik bilong ol na givim sampela gutpela tingting long yumi olgeta.

Em Makoma, husat i bin kam long skruim toktok na givim sampela stia ok long ol

yangpela na pipel bilong PNG long HIV AIDS.

Makoma em wanpela Gospel famili musik grup bilong Congo, Afrika, tasol ol i save stap long kantri Holland insait long Yurop.

Planti yangpela em ol i laikim tru Natalie Makoma, meri husat i save go pas long singsing long dispela grup.

Narapela grup i bin kam long strongim Gutnius na givim sampela gutpela tingting long ol pipel long kantri wantaim ol gutpela singsing na toktok bilong ol em ol Hillsong Singers.

Sir John Guise i bin pulap gut tru taim ol i bin putim kamap ol progrem bilong ol long hap long tripela nait.

Dispela grup we planti Kristen manmeri i save lukim long T.V tasol na harim long ol kaset na radio, i kirapim skin bilong ol long sanap strong wanpela God, na wokabaut long we we i gutpela na i soim laik pasin long ol narapela, na helpim long kamapim gutpela sindaun.

I bin wanpela yia we planti samting i bin kamap long ol sios.

Tasol dispela wok em ol sios i save mekim olgeta taim, olgeta yia, na i gutpela long lukim olsem long namba wan taim, Gavman i wok long luksave gut long dispela wok ol sios i save mekim.

Planti manmeri long kantri i bikpela long han bilong sios, sampela long sait bilong lotu, sampela long sait bilong skul, na samepla long wok, na i gutpela olsem ol tu i mas putim han long helpim sios long helpim ol narapela.

Ol senis long helt na edukesen

Desney Koimo i raitim

YIA 2004 i kamap nau long pinis bilong en na yumi lukluk i go bek long ol bikipela samting we i bin kamap long sait bilong edukesen. Edukesen i wanpela rot we planti pikinini i save kisim save na bihain painim wok. Long dispela yia tu Dipatmen bilong Edukesen i tokaut long ol bikipela samting olsem ol rifom o senis em i mekim insait long ol skul na edukesen sistem, toktok strong tu long ol skul i mas kamap self rilient o lukautim ol yet na i no long wetim Gavman tasol long givim mani long ronim skul.

Bikipela toktok tu em long strongim ol pikinini meri long go long skul na strongim na givim wankain sans long ol pikinini meri long skul.

2004 i bin lukim tu planti wok bung wantaim o poroman i kamap namel long Dipatmen bilong Edukesen na ol arapela ogenaesen olsem sios na ol dona patna long wok bung wantaim na kisim sevis i go long olgeta pipel na tu, givim gutpela save i go long ol pikinini insait long olgeta hap bilong PNG.

Edukesen rifom

Dispela yia i bin lukim tu planti bikipela ol rifom i kamap long ol skul sistem insait long ol skul bikos namba bilong ol pikinini insait long kantri i go bikipela na planti i wok long go long skul long kisim save. Long Nesenel Edukesen Plen bilong 1995 i kam inap long 2004 i laik lukim olsem olgeta skul i mas kisim rifom we pikinini i gat 6-pela krismas i mas go long skul. Long dispela yia mipela i ken lukim bikipela senis i kamap insait long ol skul. Ol pikinini i wok long statim skul bilong ol long elementeri prep na bihain ol i go long praimer skul we ol i wokim gret 3 i go inap long 6. Bihain long dispela em ol i go long sekenderi skul we ol i wokim gret 10 i go inap long gret 12.

Rifom i bin lukluk tu long strongim ol skul long sanap long lek bilong ol yet. Dispela i bihainim wanpela het tok 'Prosperity through Self Reliance' we Dipatmen bilong Edukesen i bin putim long lukim ol skul i wokim ol liklik projek bilong bringim mani i kam insait long skul na i no wetim ol long givim subsidi mani olgeta taim.

Skul fi

Wanpela polisi o lo bilong Gavman long dispela yia 2004 em long helpim ol papamama long baim skul fi. Tasol long Febuari bilong dispela yia Gavman i bin katim K40 milien long skul fi subsidi.

Skul fi i bikipela samting long wanem dispela i save bringim mani i kam insait long ronim skul. Long pinis bilong 2004 skul yia planti ol skul insait long kantri i wok long askim yet ol papamama long baim na pinisim ol hap skul fi bilong dispela yia. Planti

pikinini em skul i bin larim ol i skul i go inap long pinis bilong yia bikos long subsidi mani ol i kisim long Gavman.

Tasol planti papamama i no mekim wok bilong ol long baim hap skul olsem Gavman i bin tokaut long polisi bilong em. Sampela skul klostu i bin pas long wanem i no gat mani long go het na ronim skul.

Wanpela bilong dispela kain skul em insait long Sauten Hailans provins we klostu ol pikinini i no go bek long tem tri bilong skul yia long wanem mani i bin sot.

Long las bung bilong planti skul (insait long Nesenel Kaptel Distrik) long 2004 skul yia i tokaut pinis long ol papamama olsem taim nupela skul yia i kam ol pikinini bai go insait long klasrum taim ol i soim risit bilong skul fi olsem ol i baim olgeta autstending wantaim tu olgeta skul fi bilong nupela yia. Bikipela toktok i wok long pairap nau em ol papamama i mas redim skul fi nau bilong neks yia we i no stap longwe. Skul i no fri moa na em i wok bilong ol papamama long peim skul fi long ol pikinini bilong ol Gavman i save helpim long baim subsidi fi.

Ol tisa

2004 i bin wanpela gutpela yia bilong olgeta tisa insait long kantri. Long dispela yia Dipatmen bilong Edukesen i bin wok bung wantaim ol arapela ogenaesen long bringim gutpela sevis i go long ol tisa insait long kantri.

Long stat bilong dispela yia i bin lukim ol tisa i kamapim sevis na lons sosaiti bilong ol we i lukim pinis planti tisa i memba long en. Ol i bin kamapim bikipela kros taim ol i painimaut olsem dipatmen i laik opim dispela sosaiti long ol arapela pablik seven.

Klostu long pinis bilong dispela yia yumi lukim gen Dipatmen bilong Edukesen i mekim inap promis bilong em na bin apim pe bilong ol tisa i go antap. Tasol planti ol tisa i painim wankain hevi we i lukim ol i no inap long go wantaim olgeta famili bilong ol long as ples bilong ol long Krismas malolo.

Wok poroman

Long dispela yia tu, wok poroman namel long sios na Gavman em bin wanpela bikipela samting. Ol sios long PNG i save lukautim bikipela eria long sevis ol pipel long PNG wantaim helt na edukesen sevis. Mak long sevis ol i save bringim we ol i skruim i go long ol bus hap we i hat long gavman i go insait i winim hap.

Na nau, Gavman na ol ovasis dona ejensi i luksave long dispela wok na ol sios em ol i mekim gutpela wok na lukautim na yusim gut mani long karimaut dispela wok. Taim sampela helt senta long ol taun na rurel eria i pas, ol sios i save traim hat na skruim sevis bilong ol wantaim wanem marasin na mani ol i gat. Ol i save mekim wok sakrifais long



• Pinis bilong yia em i bikipela taim bilong ol sumatin. Dispela em ol gret 8 meri i bin greduet long Hahela Praimer skul long Buka Ailan olsem tasol planti ol wantaim bilong ol long ol provins long PNG. Foto: ALOYSIUS LAUKAI

sevim ol pipel pastaim na tingting long ol yet bihain. Long planti ol bung long dispela yia, gavman i bin luksave na tok strong long wok patna o poroman namel long ol na sios. Klostu long pinis bilong mun Novemba na stat bilong mun Disemba, Gavman bilong Australia i bin givim K7 milien i go long sios insait long kantri bilong sapotim em wantaim ol helt na edukesen projek.

Long helt, em i givim bikipela lukluk long daunim HIV AIDS long PNG. Ol sios i stap anit long dispela Patnasip Projek we bai go het long 5-pela yia, em long Katolik, Anglikan, Luteran, Yunaitet, SDA na Salvesen Ami. Dispela K7 milien em namba wan hap manimak tasol.

Long dispela mun tu, ol bikman i makim ol dispela sios i bin bung wantaim ol bikman long Dipatmen bilong Edukesen long toktok, glasim, skelim na strongim wok poroman wantaim nesenel gavman. Gutpela wok bung, wok poroman na luksave na stretim ol hevi i stap namel long ol bai mekim wok poroman i go gut na ol sumatin, ol tisa na ol pipel bilong PNG i ken kisim gutpela edukesen na helt sevis.

Helt

Helt em i wanpela bikipela samting insait long laip bilong olgeta manmeri na i ken kamapim birua sapos mipela i no was gut.

Taim mipela lukluk i go bek long 2004, bai mipela lukim planti bikipela samting i kamap we nau i wok long ronim laip bilong mipela na mipela i mas pait strong long daunim.

Planti sik insait long PNG em i gat

marasin long stopim tasol mipela i save ting i samting nating na mipela i save bagarapim laip bilong mipela yet.

Long dispela yia 2004 mipela i lukim planti sik i wok long kilim ol man i dai na planti wok painimaut tu i wok long kamap long painim rot bilong stretim dispela samting.

Sampela bikipela samting we i kamap long dispela yia em:

HIV AIDS

HIV AIDS insait long kantri i wanpela bikipela samting na i kilim pinis planti manmeri. Mipela olgeta i save pinis olsem i nogat marasin bilong oraitim dispela sik tasol planti i wok long mekim nating na namba bilong ol manmeri wantaim dispela sik i wok long surik i go antap yet.

Dispela i lukim planti ol Gavman na non gavman ogenaesen (NGO) i wok strong tru long daunim dispela sik.

Long 2004 tasol i lukim klostu olsem 20 000 pipel i stap nau wantaim dispela sik. Mak long ol lain we Dipatmen bilong Helt i gat ripot long ol taim ol i save go sekap taim ol i gat ol kain sik long ol haus sik na ol i painimaut olsem ol i gat HIV AIDS long PNG em klostu long 10,000 nau.

Arapela bikipela hap bilong ol manmeri husat i gat HIV AIDS na i no go long haus sik i stap hait yet.

Long stat bilong dispela yia Nesenel Aids Kaunsel (NAC) na ol arapela ogenaesen i wok strong long bringim aweanes i go long ol pipel long olgeta provins long luksave long birua dispela sik i ken bringim i go insait long famili.

Planti ol skul tu insait long ol provins i wok long mekim wok aweanes insait long ol komyuniti bilong ol. NAC tu long dispela yia i putim aut namba tri hap bilong kampen stretiji bilong en long rot yu inap na i no inap long kisim HIV AIDS.

Banis sut

Long stat bilong dispela yia Dipatmen bilong Helt i toktok strong rot bilong lukautim helt bilong mama na nupela bebi. Dipatmen i bin putim aut ol toksave long ol lain i mas i go long haus sik na kisim immunization o banis sut long wanem i fri long olgeta klinik.

Dispela i save banisim bebi long sik na mama tu taim em i karim yet bebi long bel. Dispela i lukim bikipela namba bilong ol bebi husat i bon i stap laip.

Sampela ol arapela bikipela samting i bin kamap long sait bilong helt long dispela yia em long Helt Ekspo long Jun na Nesenel Helt Symposium o kibung we i bin kamap long Yunivesiti bilong Papua Niugini long Septemba.



• Helt Ekspo o so i save kamap long olgeta yia long Pot Mosbi long pulim planti manmeri long lukim na save long ol bikipela samting i kamap long sait bilong helt bilong ol, famili, komyuniti na kantri. Ol lain i go lukluk long AIDS tebol long Sir John Guise Stadium we ekspo i bin kamap long Jun. FAIL POTO

Gutpela amamas bilong nupela yia i go long yupela olgeta.

Lukim nupela lait bilong niu yia



TOK PISIN
wantaim
PETER MAIME

...Gläsim sindaun bilong yia 2004

YIA i save pinis isi olsem em i save kam. Yumi nau kam arere long 2004 na bai yumi bungim 2005 long dispela Sarere, taim kilok i sanap 1 minit i abrusim 12 kilok. Long dispela minit bai belo i pairap na ol manmeri i singsing.

Taim yumi lukluk bek long dispela yia, planti samting i bin kamap long laip bilong yumi.

Olgeta yia em yumi save bungim amamas, birua, belpen, wari na sore long ol ples na ol lain mipela i stap long en, olsem long asples, taun na siti.

Nau yumi lukluk bek long sampela samting i bin kamap long 2004.

Hevi bilong mani i kisim ol pipel

Planti lain long ples i bungim hat taim long sindaun bilong ol. Rot bilong painim mani i go hat na prais bilong ol kaikai long stua i go antap. Ol prais bilong kopi, kakao na kopra tu i go daun. Ol lain long ples, wanwan taim i gat rais, tin pis, suga na ti long haus.

Sapos ol i gat dispela kain hevi, ol bai painim skul fi olsem wanem na putim ol pikinini bilong ol long skul. Skul fi long komyuniti na hai skul i go antap pinis. Seketeri bilong Edukesen, Peter Baki, i tokaut pinis olsem neks yia, skul fi long elementeri 1 na 2 em K100.

Nogat rot na bris long pulim mani

Planti hap long Papua Niugini i nogat rot na bris long pulim mani i go long ples. I gat ol kaikai long ples olsem ol gaden kaikai na ol kes krop olsem kopi, kakao na kopra tasol sapos i no gat rot na bris, bai ol i go olsem wanem long haiwe o taun na salim.

Ol pipel bilong Goilala long Sentral provins i ken amamas bikos Gavana bilong ol, Alphonse Moroi, i opim gen Louis Mona Haiwe i go long Tapini.

Nau ol pipel bilong Goilala i ken go salim ol kaikai bilong ol long Pot Mosbi na tu ol ken baim liklik kaikai long stua na ron isi i go long ples.

Ol lain long Boroi long Bogia distrik long Madang provins tu i ken amamas bikos ol i kisim nupela ain bris bilong ol.

Stori i kam olsem ol pipel long hap i save bungim hevi long brukim wara long kam long taun. Nau ol mama na ol pikinini i ken amamas. Ol lain Boroi i gat sans nau long pulim moa mani i go long ples bilong ol.

Ol politikel tida na Gavman bilong yumi i mas skruim moayet ol dispela gutpela kain wok bilong kirapim sindaun bilong ol pipel.

Sik HIV AIDS i go bikpela

Sik HIV AIDS i go bikpela long kantri. Planti manmeri na ol pikinini i kisim dispela sik pinis. Na planti manmeri na ol pikinini tu i bin dai pinis.

Long dispela wol, ol save manmeri long daunim ol kainkain sik i no panim wanpela marasin bilong dispela sik yet.

Long Papua Niugini, gavman, ol sios na ol sapot grup i mekim bikpela wok long putim aut toksave i go long pablik long ol manmeri long lukaut long dispela sik.

Wanpela ripot i no long taim i go pinis i tok olsem, long Saut Pasifik, namba bilong ol manmeri i gat dispela sik, PNG i go pas.

Dispela sik i no bilong ol sin manmeri olsem planti i save ting. Ol liklik bebi i stap long bel bilong mama i no mekim sin tasol em i kisim dispela sik.

Dispela sik em i ken kisim yumi, sapos yumi i no lukautim laip bilong yumi.



• Laip i hat tasol ol manmeri, olsem dispela yangpela manki husat i wok long salim smok long maket long Tari, i painim we long helpim sindaun bilong ol na amamas liklik. Foto: FR PHILLIP GIBBS

Ol yangpela tu i no isi long kisim drag

Narapela bikpela birua i kisim pinis dispela kantri em drag. Long narapela kantri long baim drag long amamasim bodi em traipela mani. Tasol long PNG, ol manmeri yet i ken planim na kisim. Wanpela bikpela gras nogut yumi gat long kantri em mariwana na i save gro gut long ol kol ples olsem hailans.

Dispela gras em yu ken painim long planti hap long kantri. Prais bilong em liklik tu. Ating K1 o 50t long wanpela rol.

Lo i tambuim ol manmeri long kisim drag na sapos lo i panim ol, i gat sas bilong en tu. Tasol bikpela samting em ol manmeri i mas tingim laip bilong ol. Yumi i save olsem husat i kisim tumas dispela mariwana i ken bagarapim kru na tingting bilong en.

Tasol i luk olsem samting ya i no inap stop. Hamas taim polis i save bungim ol lain i lodim beg marijuana long balus na sip na mekim save, tasol ol i ron yet.

Manam volkano i pairap

Long PNG, yumi save bungim ol hevi long graun i bruk na kilim ol manmeri, ol solwara i solap na bagarapim ol hauslain na ol volkano i pairap na kilim ol manmeri na ol ples.

Dispela yia, volkano o mauntain paia long Manam Ailan long Madang provins i pairap na kilim sampela manmeri, bagarapim ol haus, gaden na wara bilong dring.

Gavman bilong yumi i helpim ol lain i kisim bagarap na kisim i go long ol bikples long Bogia na putim ol long kea senta. Ol lain long Manam i lusim tu ol haus, gaden na wara na nau i stap long ol kea senta. Ripot i tok olsem gavman i lukautim ol long haus, kaikai na wara bilong dring.

Dispela em wanpela bikpela hevi, ol pipel bilong Manam i karim.

Bogenvil stap long rot long

kirapim gutpela sindaun

I gutpela long lukim Bogenvil i wokabaut i go long painim bel isi na gutpela sindaun. I gutpela

moa long lukim ol lida bilong Bogenvil i go pas long bungim ol pipel bilong ol, paitim toktok na kisim tingting bilong ol, long kisim belisi i kam bek long ailan.

Gavana bilong Bogenvil, John Momis, na ol arapela lida olsem Joseph Kabui i mekim gutpela wok wantaim helpim bilong Nesenel Gavman, Yunaitet Nesens Obseva Grup na ol narapela sapot grup.

I gutpela long harim long maus bilong ol

pipel yet long Bogenvil olsem belisi na gutpela sindaun bai kam long "mipela" yet na i no long ol narapela lain o grup.

Nupela lait bilong niu yia

Long Krismas, Bikpela i sori long yumi na i kam daun long yumi. Em i bringim lait long yumi husat i stap long tudak. Yumi husat i gat pen, wari, sore na kros, Krismas i gat gutpela as long yumi. Hepi niu yia.



**MIPELA I LAIK TOK MERI KRISMAS
NA HEPI NIU YIA LONG OLGETA
KASTOMA BILONG MIPELA.**

**PLIS YUSIM PAWA GUT
NA ABRUSIM BIRUA LONG
DISPELA TAIM BILONG HAMAMAS.**

- 1: No ken baim Krismas lait i gat ol liklik o bun waia, baim lait i gat bikpela o fatpela waia.
- 2: No ken go antap long mango, kokonas o ol narapela diwai i gro go insait long ol pawa lain.
- 3: No ken go klostu long pawa lain i bruk na i stap long graun.
- 4: No ken siso o hangamap long ol stei waia i holim ol pawa pos i go long graun.
- 5: No ken holim ol pawa poin sapos han bilong yu i gat wara long en.

**LUKAUTIM YUPELA YET NA HAMAMAS
WANTAIM EASIPAY LONG 2005
TAIM EM I KAMAP LONG HAP BILONG YU.**

Toksave i kam long Pablik Rilesens Seksen

Wewak Taun i pulap stret long ol setelmen

Dia Edita,

Bikpela bagarap stret bai painim ol pipel bilong Sepik insait long 2005 sapos ol planti setelmen i wok long kirap yet. Nesenel Gavman i no painim sampela we long stopim na salim ol pipel go bek long ples bilong ol. Long Wewak Taun, dispela senta bilong olgeta Sepik manmeri long Papua Niugini i wok long givim baksait na larim ol setelmen i gro long laik bilong em.

Hamas tausien pipel i slip long ol setelmen long Wewak Taun na wanem taim stret bai Nesenel Gavman i rausim sampela pipel i nogat wok i go bek long ol asples bilong ol. Dispela taun i mas senis na gro i go kamap wanpela siti na ol setelmen i mas klia pastaim. Neks yia 2005 em i mas kamap olsem wok bilong Nesenel Gavman long rausim olgeta setelmen long taun.

**JOHN KRISOAKI
WEWAK
IS SEPIK PROVINS**

Noken paolim ol toktok long Baibel

Dia Edita,

Mi ritim long wanpela pas bilong brata John Lumbu long Lae long Wantok Niuspepa bilong 11-17 long mun Novemba 2004, em i bin toktok long de Sabat na Sande. Insait long pas bilong en, namba 2 lain em tok olsem ol i bihainim Sabat bai i go long Heven. Brata, mi laik tokim yu stret. Yu no inap painim wanpela hap teks insait long Baibel long buk Genesis inap Revelesen bai toktok long dispela, nogat tru. Olsem yu bin tok long (Matyu 5.8) Jisas bai lukluk tasol long bel bilong manmeri na ol i gat pasin bilong Jisas o bel bilong ol klin, em tasol bai go long Heven. Yu no ken toktok baksait long arapela sios, bilip bilong yumi tasol bai skelim. Namba 3 lain bilong brata John Lumbu i givim sampela Baibel teks olsem, Matyu 12:1-8, 9-14; Mak 2:23-28, 3:1-6; Luk 6:1-11.

Brata, i luk olsem yu yet i no save ritim ol dispela Baibel teks gut. Sapos yu sindaun na ritim gut, yu inap long luksave. Yu ritim gut long ves 7-8 bilong Matyu 12. Jisas i tokim klia olsem em yet em God bilong Sabat.

Long klaim tingting bilong yu long Buk Kolosians 2:16-23 Jisas olgeta taim i save stap long rait sait o save rait na fea olgeta taim. Olsem na ol peresi traime bes long painim asua o rong long Jisas. Yumi no ken paolim ol manmeri wantaim gia-

man toktok o tanim tok na tu ol peresi i no bin ronim Jisas, nogat tru. Plis inap yu tokim wanem hap long Baibel i toktok long ol peresi i ronim Jisas. Narapela, yu tok olsem dai bilong Jisas em i pinisim Sabat na wokim nupela kontrak na yu tok olsem Sande em nupela Kontrak bilong Jisas na tu yu tok God salim Jisas i kam daun long pinisim olpela kontrak na putim nupela kontrak.

Brata, i luk olsem tru tru yu no save ritim Baibel gut o pasta bilong yu i haitim tok tru long yu. Inap yu lusim dispela ples nau yu stap long en na mi laikim yu prea wantaim bel bilong yu long God na God bai givim yu spirit bilong rit na save long Baibel na em bai givim yu dispela tingting bilong luksave.

Plis yu ritim dispela teks Matyu 5:17-19 na em bai givim yu klia tingting long nupela na olpela kontrak yu bin toktok long en. Narapela, dai bilong Jisas em i no brukim laplap long tempel i kam daun long graun olsem yu bin tok. Matyu 15:38 i tok olsem laplap hangamap long tempel i bruk namel. Laspela, yumi no ken paolim ol manmeri bilong God bikos Baibel i tokim yumi klia olsem wanem yumi planim em bai yumi kisim.

**KOIS KAUPA
YONKI
ISTEN HAILANS
PROVINS**

Peter O'Neill i stap we?

Dia Edita,

Mi wanpela manki bilong Kirene insait long lalibu Pangia ilektoret na i laik autim wari bilong mi long olsem. Mamba bilong mi long Palamen, em Peter O'Neill, tasol mi no save long wok bilong em long ilektoret bilong em olsem na mi laik askim.

Mi save harim nem bilong em save pairap long nius tasol wok bilong em i no pairap long lalibu Pangia olsem na em stap long wanem hap mipela i no save.

Tupela yia i go pinis na narapela tupela yia i kam em bai mipela vot na bai yu kam na kempen tu o nogat?

Sapos yu kam mipela save long yu pinis. Yu em mamba bilong mipela na yu kam na stap wantaim mipela long ples na harim hevi bilong mipela long kaikai, hevi bilong slip na hevi bilong wokabaut. Yu i gat wanem kain wok long Pot Mosbi na yu save lok stret long hap? Yu bin wokim traipela longpela na naispela haus long Pangia Stesen, em husat bai slip long en? Ating dispela haus em yu laik gia-

manim mipela long kisim vot na yu mekim.

Olpela mamba bilong lalibu Pangia, Roy Yaki, em i save stap wantaim ol pipel long ples, maski em i no kisim sevis i kam tu em save karim hevi wantaim pipel long ples na em i save stap wanwan taim long ples. Tasol nupela mamba bilong lalibu Pangia mipela i no save em i stap we nau.

Mipela votim yu bilong i go na kisim mani i kam bilong givim sevis long mipela na i no bilong yu go na mekim kainkain samting moa. Bihain bai yu kam bek long lalibu Pangia na kempen o nogat?

Mipela bai save olsem sapos yu kam aut long Pot Mosbi long 2006 na giaman toktok na lap amamas wantaim ol save pes bilong yu yet long ples, em bikos em taim bilong kempen nau. Mi gat moa toktok tasol em inap long hia pastaim.

**DOMINIC AWAPE
KIRENE,
IALIBU KEWABI**

Singaut long wantok

Dia Edita,
Mi laik putim tok-save bilong mi long Wantok Niuspepa olsem mi laik singautim Tom Kule long kam long Goroka long ples Samaga Lufa distrik. Mi yet em Jim Urebe.

Mi painim wanpela wok bilong yu pinis, taim yu kam lukim mi long ples na bai mi tokim yu long wanem wok bai yu mekim.

Sapos nogat mani long kam plis dinau mani long ol wantok bilong yu na kam bai mi bekim long ol. Yu wok yu rait na toksave long mi long dispela adres. Tim Urebe, P.O. Box 1226, Goroka EHP.

**JIM UREBE
GOROKA
ISTEN HAILANS
PROVINS**



Garamut manki...Dispela liklik manki Manus i bin mekimsave long paitim garamut na danis long amamasim namba 10 bonde pati bilong redio stesen Nau FM long Port Moresby Country Club. Foto: NEVILLE CHOI

Ol meri seksek long maritman tasol

Dia Edita,

Mi laik raitim dispela pas na askim ol yangpela meri long ol i save gat ai tu long lukim ol gutpela man o nogat?

Olsem wanem na ai bilong ol i save luksave tasol long ol drag bodi, ol lapun na ol maritman olgeta taim?

Taim ol i pren wantaim ol maritman nau, ol meri bilong ol i painimaut na ol i save mekim bikpela pait long pablik ples.

Mi laik askim yupela ol yangpela meri, yupela i save sem tu long pait wantaim ol maritmeri long pablik ples tu o nogat?

Luksave gut long ol man na tromoi ai long ol.

I gat planti gutpela man i wokabaut raun i stap olsem sampela em ol bikman na planti em ol yangpela man na ol i no save mekim kainkain eksen nabaut tasol ol i wet tasol sapos ol i

gat sans long bungim yupela ol gutpela yangpela meri.

Mi lukim long Kimbe ol meri Hailans i kam pulap tru na salim buia lus smok arere long stua na as bilong mango nabaut na kaikai buai na sindaun long fom bilong putim kaikai long en long maket na mekim kainkain stail.

Tasol taim ol maritman na drag bodi i saitim ol liklik, wantu tasol ol i kalap i go pinis.

Sapos ol i sindaun isi bai gutpela man i kamap bungim ol na prenim ol gut.

Em tasol liklik toktok na husat i laik bekim em laik tasol.

**ALPET TONNY
KIMBE,
WES NU BRITEN PROVINS**

Strongim lo bilong stopim bagarapim bilong ol meri

Dia Edita,

Mi amamas long dispela lo we meri wantok i bin putim long banisim ol mama na ol yangpela meri long pasin bilong reip. Dispela lo i gutpela tru long wanem insait long PNG pasin bilong reipim ol mama na ol yangpela meri na ol krismas bilong ol aninit long 14 na 13 na 12 em i bikpela tru insait long PNG. Olsem na mi wanpela lida insait long ples mi laik askim yupela long inap bai yupela i ken helpim mi long raitim ol lo na sas bilong ol bagarapim ol mama na ol yangpela meri na ol wanwan seksen bilong reip na salim i kam na mi wok long en long ples? Mi laikim tru dispela lo bai mi sanap long en long wanem planti man ol i save strongim sait bilong ol na daunim ol meri.

**RUBEN LEKSON
UTKUMBU SEKSEN
KANDRIAN, WES NU BRITEN PROVINS**

OL PAS
Salim pas i kam long
WANTOK
Niuspepa
P.O. Box 1982
Boroko, PNG

WANTOK

KOMENTRI


Narakain bagarap tru long Esia

BIKPELA guria na solwara i pinisim laip bilong planti tausien manmeri long hap bilong Esia long dispela wik Sande. Dispela em wanpela kain bikpela birua tru we solwara na guria i kamapim we i kilim moa long 63,000 manmeri. Tasol dispela namba inap go antap moa bikos planti bodi i pas yet insait long ol haus na simen we i bruk kam daun.

Dispela i wankain long sunami long Aitape long 1998 tasol yumi long Aitape tasol na i no olgeta hap bilong PNG. Sori tru long 9-pela kantri olgeta we wanpela solwara na guria tasol i pinisim planti tausien manmeri long wanpela taim tasol.

Gutpela long Praim Minista bilong Papua Niugini i salim bikpela sori na wari bilong yumi ol pipel bilong Papua Niugini i go long ol famili na lain bilong ol husat ilusim laip bilong ol lain bilong ol na husat nau i stap long haus sik wantaim bagarap long bodi na skin.

Bikpela samting yumi ken mekim nau em long tingim ol dispela lain brata na susa long prea bilong yumi long Papa God i ken givim ol bel isi na strongim ol long dispela taim bilong birua. Mipela olsem kristen kantri i mas tingim ol long prea bilong yumi. Dispela i no liklik samting na yumi i laki olsem dispela birua i no kisim yumi. Yumi bin prea long bipo long ol brata susa bilong yumi long Aitape, olsem na wankain rot yumi ken soim tu long ol dispela 9-pela kantri.



JADA 30/12/04

Yumi gat pes long lukim 2005

Krismas em taim bilong amamas. Ol famili husat i stap long longwe hap i save go na bung wantaim. Ol famili long wanwan haus tu i save bung na putim liklik kaikai na dring long sindaun na amamas.

Tasol i gutpela moa long lukim olsem sampela taim i tingim narapela long dispela krismas selebresen. Dispela lain i soim pes long ol narapela famili olsem ol tu i mas amamas long lukim nupela yia 2005.

Long Madang, Inta Gavman Relisens Minista, Sir Peter Barter na Asbisop bilong Madang, Willian Kurtz i go soim pes long ol kea senta long Bogia we ol lain i kisim bagarap long Manam volkano. Tupela i go lukim na harim wari bilong ol lain i stap long ol kea senta. Ripot i tok olsem planti ol manmeri na pikinini i kisim bagarap long ol sik, ol kaikai, wara bilong drink, ples bilong toilet, sot long ol marasin na ples bilong putim ol pikinini i



TOK PISIN wantaim PETER MAIME

go skul taim skul-yia i stat. Sir Peter wantaim Asbisop Kurtz bai i no inap stretim olgeta samting, tasol mi save ol pipel long ol kea senta i amamas long lukim tupela wasman bilong provins.

Long krismas de stret, Gavana Jenerel, Sir Paulias Matane, i go lukim ol kalabus manmeri long Bomana Haus Kalabus. Toktok em i mekim long dispela taim em "Yumi mas traim long sensim pasin bilong yumi long nu yia na mekim kantri bilong yumi i kamap naispela ples long stap."

Tu krismas em i no bilong ol bikpela manmeri tasol. Em bilong ol pikinini tu. Long Pot Mosbi, Sosel Woka husat i save

wok wantaim ol manmeri i gat sik HIV/AIDS, Tessie Soi, na ol pikinini bilong em i kukim ol switpela kek, na go givim long ol sik pikinini long Pot Mosbi Jenerel Haus sik.

Tu ol sik pikinini long Rabaul na Vunapope Haus sik long Is Niu Briten i kisim ol kainkain presen long han bilong Rotari Klab bilong Rabaul na ol wok manmeri long PNG Diabetic Senta.

Long ol narapela hap bilong kantri, sampela manmeri, ol famili na grup i mas tingim ol narapela lain long dispela krismas.

Tenkyu long yu soim pes ol narapela lain long dispela krismas bikos Bikpela i tingim yu na i kam long dispela taim.

Jisas i soim pes long yumi, yumi soim pes long ol narapela, dispela pes i ken kisim yumi i go long nupela yia, 2005.

Hepi nu yia long yu.

WANTOK

Published Weekly, Wednesday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: 325 2500

Fax: 325 2579

Email: word@global.net.pg

Pe bilong wanpela yia 52 niuspepa

Ples:	Air:
PNG	K140.00
AUSTRALIA	US\$100.00
ASIA PACIFIC na JAPAN	US\$80.00
AMERICA na EUROPE	US\$150.00

General Manager Justin Hansu Kili

Editor Yakam Kelo

Word Publishing Company Limited is owned by the four major churches of Papua New Guinea: Catholics 50%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Published by Jeremy Burgess and printed by Pacific Star, P.O. Box 6817 Boroko NCD at allotment 13 section 38 Waigani drive, Port Moresby

Lida i gat bikpela wok

Dispela tok i tru olgeta. sapos man i laik i stap lida bilong sios na kantri em i laikim gutpela wok 1 Timoti 3: 1.


Dispela tok, Lida na Pasin bilong lida, i gat bikpela mining long tude.

Kantri bilong yumi i kisim pinis independens na wok bilong ol lida i bikpela samting tru.

Sapos yumi kisim ol gutpela lida orait bai ol inap stiaim kantri bilong yumi i go het gut.

Tasol sapos ol lida i no gutpela, ol bai i bagarapim kantri bilong yumi.

Sapos ol lida i tingting long kisim mani samting bilong ol yet o ol i laik bosim nogut ol



OL PRINSIPOL BILONG GUTPELA LIDA

wantaim.

Pastor na Evangelist OHARE JABERE

pipel, o sapos ol i laik kisim gris mani long mekim pasin nogut, orait kantri bilong yumi bai i bagarap.

Olgeta yumi save pasin bilong independens i no as bilong stretpela pasin na i no save kirapim ol manmeri long bihainim stretpela pasin.

Na sapos yu givim namba long wanpela man na makim em lida, orait i no olsem yu mekim dispela man long

kamap gutpela man bilong bihainim gutpela pasin tasol.

Na i wankain long ol sios bilong yunmi. Planti gutpela man i bin kamap lida tasol sampela i bin bikhet na pun-daun long (sin) hevi. Na sampela lida i tingting long bikpela namba bilong ol na ol i save bosim nogut ol manmeri.

Sampela i ting smat tru long winim ol bikskul na ol i gat planti save na ol i wok long

litimapim nem bilong ol yet long ai bilong ol manmeri.

Dispela pasin i save mekim sampela lida i bel nogut tru long ol na ol i no bihainim tok bilong ol dispela lida.

Tasol sampela lida long kantri na long sios bilong yumi i save bihainim gut wok bilong lida na ol i laik bai sampela saveman i helpim ol long mekim wok bilong ol i kamap gutpela tru.

Tasol nau ol dispela gutpela lida i gat kainkain hevi na wari long wok bilong ol. Na ol i pilim nogut long dispela samting.

Mi laik tok, noken wari. Sanap olsem Krai yet.

1 Korin 15: 58

WANTOK

i kamaut long paia



Edita - Yakam Kelo i lukluk bek long Wantok long dispela yia

BEL bilong bolgeta wokmanmeri bilong Wantok Niuspepa i bin bruk nogut tru long Mande moning Februari 2, 2004.

Wantok opis i no olsem bipo moa. Paia i bin kukim opis long Sarere nait long Jenuari 31, 2004.

Bel i wari nogut tru bikos em i ples mipela i save wok long en nau bai mipela i wok we bikos olgeta masin olsem kompyuta, ol pepa na ol samting bilong wok wantaim i paia pinis. Liklik kona bilong opis tasol i stap gut em laibri na opis bilong akauns.

Planti wokmanmeri i bin kam olsem yangpela manmeri na kamap papamama long dispela opis na ol i pilim olsem em i haus bilong ol na ol i kra i long bel na tingting.

Sampela i belhat wantaim na tok, nogat

mani long dispela opis, olsem wanem, ol i laik stilim ol niuspepa a?. I gat luksave olsem sampela trabel lain i bin kalapim banis na i go insait long banis na brukim lok long bikpela dua long sait bilong fektori na kam insait gen na brukim dua i go long opis wantaim bikpela hap simen. Taim ol go insait long opis ol slekim paia long hap. I gat planti niuspepa na pepa i stap nabaut na taim paia i kisim em yumi ken save olsem paia bai i no inap westim taim long kirap.

Jenerel Menesa bilong Wantok long dispela taim em wanpela man Britis nem bilong em Jeremy Burgess. Turangu tu i kam nupela long wok na i no longtaim dispela hevi i kamap na em i karim dispela hevi wantaim gut yet long ronim kampani na dispela hevi i kamap.

Tasol bikpela samting i kamap taim Jeremy i tokim mipela long go sindaun long haus bilong em na mipela holim miting pastaim. Insait long dispela miting em Jeremy i tokaut olsem em i pasim tok pinis wantaim National Newspaper long mipela i ken go long moning na yusim masin bilong ol na mekim wok bilong mipela na pinisim long 3 kilok na kam bek long haus bilong em. Dispela rot i givim bel isi liklik bikos mipela i ken wok yet na Wantok Niuspepa bai kam aut yet long Fonde. Dispela em wanpela bikpela helpim na sapot tru National Newspaper i mekim long strongim Wantok Niuspepa long dispela taim bilong hevi.

Long Fonde Februari 5, 2004 Wantok Niuspepa i kam aut wantaim piksa bilong paia i kukim em long fran pes. Niuspepa i ron na planti tok sori i kam.

Namba wan helpim i kam nau long wanpela Katolik grup ol i kolim ol svd. Ol i olsem papa bilong Wantok Niuspepa tu na ol i salim K10,000 i kam. I gat wanpela helpim mani tu i kam long ovasis long helpim Wantok long dispela taim nogut.

Klostu foapela mun olgeta mipela i wok long yusim opis bilong National Newspaper long mekim wok bilong mipela long putim aut Wantok long olgeta Fonde i kam. Long dispela Wantok i salim bikpela tok tenkyu i go long menesmen na ol wokman bilong National Newspaper long olgeta sapot na helpim bilong ol long dispela taim.

• Long mun Mei niusmeri bilong Wantok Veronica Hatutasi i bin winim wanpela bikpela luksave insait long

Papua Niugini. Veronica i kisim luksave olsem niusmeri bilong PNG insait long bikpela de bilong Wol Media Freedom Day. Em i bin go long Divine Word University long kisim awod na prais bilong em.

• Long Jun 8 Wantok i lusim haus bilong Jeremy na go insait long nupela opis bilong em. Dispela nupela opis em long bikrot tasol long hapsait bilong BSP benk long rot i kam long Boroko i go long Waigani. Dispela taim Praim Minista bilong Papua Niugini Sir Michael Somare yet i bin kamap na opim dispela nupela opis bilong Wantok na Oksilari Bisop bilong Mosbi Asdaiosis Cherubim Dambui i prea na blesim opis. Praim Minista Sir Michael Somare i tok amamas long Wantok Niuspepa i stap laip yet na tokaut long givim K50,000 long helpim Wantok Niuspepa long go het wantaim wok bilong em long raitim tok pisin nius i go long ol pipel bilong Papua Niugini.


Em nau Wantok i gat opis, ol kompyuta na ol samting bilong mekim wok wantaim na olgeta samting i stat long ron gut i go.

Mipela i save raitim olgeta nius na putim ol piksa long en na stretim olgeta pes pinis long masin orait mipela i kukim wanwan pes i go long wanpela cd masin na wanpela wokman i save karim dispela liklik masin na i go long opis bilong National Newspaper na opim gen long wanpela kompyuta long hap na salim i go long prin we masin bai primum niuspepa bilong mipela i kamaut. Mipela i save mekim olsem long olge-

ta Trinde i kam inap nau. As bilong dispela em bikos mipela i nogat print masin bilong primum niuspepa. Mipela i save primum niuspepa wantaim National Newspaper olgeta Trinde bihainim kontrak bilong Wantok na National.

• Mipela stat long kisim bel isi na amamas na wok i kam inap long mun Ogas 13 Fraide Wantok i bungim wanpela bikpela hevi gen. Wanpela sinia wokman bilong mipela i lusim laip long dispela taim. Em Jocko Oberleuter. Jocko i bin kisim wanpela sik longpela taim i kam inap em i lusim laip long haus sik long dispela taim na i dai. Leit Jocko em wanpela sinia selsmen bilong Wantok na em i bin stap wantaim Wantok olsem tripela yia samting. Mipela ol wokmanmeri bilong Wantok i bel bruk gen long dispela hevi i kamap.

• Klostu long pinis bilong mun Septemba Wantok i lusim gen wanpela olpela wokmanmeri bilong em. Em i no lusim laip tasol em i go long nupela wok. Em Barbara Tommy na em i bin wok wantaim Wantok klostu 13 krismas olgeta. Em i bin



• Ol bos bilong Wantok. Justin Kili 2004, Jeremy Burgess pinis long 2004, Anna Solomon pinis long 2002.



• Praim Minista Sir Michael Somare tu i save sapotim Wantok Niuspepa. Em i bin opim nupela opis bilong Wantok long Jun 2004.

pinis skul stret long Divine Word Institute (nau yunivesiti) long skul bilong Journalism na kam wok olsem niusmeri wantaim Wantok inap em i pinis long dispela yia 2004.

• Long Oktoba 12, 2004 Wantok i lusim bos bilong en Jeremy Burgess. Em i lusim Wantok na go bek long kantri bilong em long Briten. Long dispela taim mipela i gat nupela bos i kam pinis na kisim opis long mun Ogas 23 long Mande. Nupela bosman em Justin Kili. Em wanpela biknem redio man long NBC redio na Yumi FM we planti manmeri long Papua Niugini i save long em. Em i stap nau olsem bos bilong Wantok Niuspepa.

• Long Sarere Disemba 4, 2004, Wantok i joinim ol arapela nius kampani olsem ol redio, televisen na niuspepa long wanpela bikpela bung bilong media insait long kantri. Long dispela nait Wantok i mekim nem long winim tupela bikpela awod long luksave long tupela wokman bilong Wantok long wok bilong tupela. Em Frederica Siwin na Jada Wilson we PNG Media Council i luksave

long wok bilong tupela na givim awod na MRDC i givim prais mani long tupela. Wankain tu long ol arapela media lain. Frederica kisim prais bilong wok sapot long menesmen na Jada kisim prais long ol katun na disain wok bilong em long niuspepa na arapela komyniti wok em i save droim ol katun na piksa long sapotim ol.

• Long Disemba 18 olgeta wokmanmeri bilong Wantok wantaim famili bilong ol i bin bung long haus bilong bos bilong ol na amamas krismas pati bilong kampani. Ol i tingim taim nogut ol i kam long en tasol strong bilong wok i stap yet long bun bilong ol wokmanmeri yet. Maski taim nogut, mipela bai holim han na go het yet.

• Bikpela tok amamas na tenkyu i go olgeta sapota i save baim Wantok na ritim long olgeta wik na ol bisnis na kampani husat i save mekim bisnis wantaim Wantok na stap klostu wantaim mipela long dispela taim bilong hevi i kam. Mipela i amamas na tok bikpela tenkyu tru i go long yupela na God i ken blesim yupela moa yet.



• Wantok winim awod. Atis bilong Wantok Jada Wilson (lephan) i winim awod long ol wok bilong em. Em i kisim awod long Ekting Menesing Dairekta bilong MRDC, Reuben Pokanau.

Meri Krismas na Hepi Niu Yia!!

WOL NIUS



Man nogut kilim mama na stilim bebi long bel bilong em

Yunaitet Stets ov Amerika:

Ol polis long Missouri long Yunaitet Stets ov Amerika (U.S.A) i banisim haus bilong Zeb na Bobbie Jo Stinnet long Disemba 21. Ol i mekim olsem bihain long ol i painim bodi bilong Bobbie Jo, husat i dai insait long haus, taim ol man nogut i tanim nek bilong em na katim na opim bel bilong em. Ol polis i painimaut tu olsem Bobbie Jo i bin gat bel long 8-pela mun pinis tasol bebi i no bin stap long bel bilong em.



Yukrein i gat nupela presiden

Yukrein:

Ol sapota bilong nupela Presiden bilong Yukrein, Viktor Yushchenko, i amamas long wanpela reli long Kiev long Disemba 26. Olpela oposisen lida bilong Yukrein i kamap presiden bihain long em i winim sia taim ol pipel i vot gen long painim nupela presiden.



Polisman bilong Australia dai long Honiara

Australia:

Dispela foto i soim opisa bilong Australian Federal Polis Protektiv Sevis, Adam Dunning, husat i bin dai long Honiara long Disemba 22. Em i nambawan man bilong Australia husat i dai aninit long nupela sekyuriti polisi bilong Saut Pasifik. Dunning i dai bihain long ol birua man i banisim ka bilong em na sutim het bilong em tupela taim.

Indonesia na Is Timor laikim gutpela sindaun

Indonesia:

Foren Minista bilong Indonesia, Hasan Wirayuda (raithan), i toktok long ol niustain bihain long wanpela kibung bilong em wantaim Foren Minista bilong Is Timor, Jose Ramos-Horta (lephan) long 2003. Dispela tupela minista i askim ol lain bilong ol arapela kantri long helpim ol kamapim wanpela Komisn long Trut na Prensip. Ol i laik mekim olsem long kamapim gutpela sindaun namel long kantri bilong ol.



Pope kamapim nupela grup long daunim sik nogut

Rome:


Pope John Paul II i givim 100, 000 Yuro long helpim kamapim wanpela nupela Katolik grup bilong helpim ol manmeri husat i gat sik HIV AIDS.



Ileksen bai kamap long neks mun

Irak:


Wanpela meri Irak i wokabaut arere long ol posta i toktok long ileksen we bai kamap neks mun long Begded. Yunaitet Stets ov Amerika (USA) i toktok long ol bikman bilong Irak long ol we mekim ol Sunni Muslim long stap tu long resis long kamapim nupela gavman bilong Irak.



Bikpela solwara bagarapim Esia

India:

Poto i soim Marina nambis long Madras, India, bihain long taidol wev o bikpela solwara wantaim guria i bagarapim Esia rijon long Sande, Disemba 27. Wanpela strongpela guria i bin kamap long namel bilong solwara we i kamapim dispela bikpela solwara. Em i bagarapim ol ples long Sri Lanka, India, Indonesia na Thailan we i lukim moa long 11, 300 pipel i lusim laip bilong ol.



Amamas bilong Krismas i stap yet long Irak

Irak:

Ol Kristen meri Irak i singsing ol Krismas singsing long Chaldean Katolik Sios long Basra Siti. Sampela handred manmeri i go lotu long Krismas long haus lotu we ol sekyuriti opisa i sekim ol taim ol i go insait na kam ausait long haus lotu. Wanpela meri Irak i wokabaut arere long ol posta i toktok long ileksen we bai kamap neks mun long Begded. Yunaitet Stets ov Amerika (USA) i toktok long ol bikman bilong Irak long ol we mekim ol Sunni Muslim long stap tu long resis long kamapim nupela gavman bilong Irak.

Ol pikinini kisim bagarap long HIV AIDS

Afrika:

Mak olsem 1.9 milien pikinini aninit long 15 krismas i stap wantaim sik HIV AIDS insait long ol kantri bilong Afrika. Ol dispela toktok i kam long Yunaitet Nesens (UN) long wanpela ripot bilong ol long sindaun bilong ol pikinini bilong wol. Ol i tok moa olsem long yia 2010 bai moa long 18 milien pikinini bilong Afrika bai lusim papamama bilong ol long dispela sik nogut sapos ol man i no mekim wanpela samting long stopim. Dispela foto i soim wanpela liklik meri wantaim sik AIDS, husat papamama bilong em i dai pinis, sindaun klostu long botol susu bilong em long Nairobi long Disemba 13. Ples we em i stap i gat 94 pikinini wankain olsem em i stap.



Wanem laik bilong yu long yia 2005?

...Bai yu mekim sampela senis long laip bilong yu?

Ol taim nupela yia i kam ol manmeri i save gat ol nupela tingting ol laik bihainim. Dispela ol tingting o pasin em long tok Inglis ol i tok ol resolusen i tok promis long bihain tingting. Na olsem em i no abrus taim sampela man i tok ol i laik long stop long painim meri, dring bia, raun raun nating o i laik go moa long lotu. Hia Paul Zuvani i raun na kisim tingting bilong sampela lain.



Tela John

Tela John (12) i bilong Lufa, Isten Hailans provins, tasol nau i stap long Gaden Hill setelmen. John i bin mekim gret 3 long 2002 tasol i lusim skul taim papa bilong em i nogat mani long baim skul fi. Tingting bilong em long 2005 em long go long skul gen. Papa na mama bilong em i save wok tasol mani ol i kisim i no inap long helpim long baim skul fi na ol narapela samting i go wantaim skul. "Mi bin mekim gret 3 taim mama bilong mi i no inap long pinisim skul fi na olsem mi lusim skul. Mi gat laik long go bek skul tasol sapos papa na mama bilong mi i inap long baim skul fi mi bai go bek long skul. Nau yet mi stap tasol long haus."

Peterson Way i bilong Hela, Sauten Hailans provins. Em i mekim yia wan long Sonoma Adventis Koles long Is Niu Britan. 2004 skul yia i pinis na Way i kam raun long Pot Mosbi taim Wantok Niuspepa i bungim em na kisim tingting bilong em. "Mi stap long misin skul tasol dring bia em mi save hait na dring bia yet. Taim 2005 i kam mi laik long lusim bia. Mi laik long kamap Kristen taim mi kisim baptais long 2005 na bihain pasin lotu."



Andy Philip

Andy Philip i bilong Hela, Sauten Hailans provins na em i mekim seken yia long Goroka Yunivesiti. Em i tok: "Tru mi stap long pablik skul we i nogat planti tambu long laik bilong ol manmeri i stap. Tasol mi traim long lukautim mi yet gut. Mi no man bilong kaikai buai o smok na olsem mi nogat planti toktok long mekim long dispela sait. Tasol long 2005 mi laik long putim moa taim long ol stadi bilong mi. Mi laik long mekim gut long skul bilong mi. Na olsem sapos mi pinis skul mi laik long stap olsem tru tru profesinol tisa. Wantaim wok bilong mi mi laik long strongim bilip bilong mi na i laik pas moa long lotu na ol pasin bilong lotu."



Ezekiel Togola

Ezekiel Togola i bilong Hela, Sauten Hailans provins na em i wok wantaim Jay's Real Estate. Tingting bilong Togola em i olsem em i laik long yusim gut taim. "Mi bai lusim pasin bilong raun nating na lusim nating taim. Mi laik long yusim gut taim gen. Mi no laik long yusim taim wantaim ol strik manki. Mi laik long senis pasin tu na go moa long lotu."



Wilson Towe

Wilson Towe i bilong Mendi, Sauten Hailans provins. Em i bin wok wantaim Total Hadwe long Pot Mosbi tasol i lusim na go bek long ples long 1996. Nau em i bungim mani na i kam raun long Pot Mosbi taim Wantok i bungim em na kisim tingting bilong em. "Nau long



Peterson Way

dispela taim mi lukim laip i hat moa long taim mi bin stap long Pot Mosbi. Tru mi gat ol brata i stap we bipo mipela i save bung planti na lukluk long yumi gut. Nau nogat. Tingting bilong mi long 2005 em long go bek long ples na i no ken traim long painim wok nabaut long Pot Mosbi. Laip long ples i isi tru. Olgeta samting i stap fri na olsem yu bai i no inap go hangre. I nogat wanpela man bai tokim yu long wanem samting yu mas mekim. Mi mekim liklik gaden bilong mi we mi salim ol samting, kisim na bungim mani na mi baim balus long kam. Mani mi kisim i kam em mi wok long kaikai long em i stap. Taim dispela mani klostu i laik pinis bai mi go bek long ples. Mi laik long tokim ol manmeri husat i nogat samting long mekim long go bek ples bilong stap long gutpela laip."



Stanley Jack

Stanley Jack i hap Kerema na Galp provins na em wok wantaim Theodist Supamakot long Waigani. Em i tok: "Niu yia resolusen bilong mi em long stopim ol wokabout bilong ol nait klab na dring bia. Nau laip i hat na mani yumi save kisim i bikpela samting. I no olsem long bipo we yu tromoi mani na i no inap tingting planti long wanem yu gat mani yet. Nau nogat. Taim yu tromoi em mani bilong yu i pinis nau. Na olsem mi lukim mi save tromoi nating mani long bia na ol nait klab na olsem mi no lukim wanpela gutpela senis long sindaun bilong mi. Mi laik staim nupela laip na go moa long lotu."



John Arifeai Mirou

John Arifeai Mirou i bilong Lelefiru, Kerema Galp provins na em i stap tasol long Pot Mosbi. Em i tok olsem long 2005. "Mi man bilong dring bia na olsem mi laik long stop long dring bia. Dispela long wanem planti taim mi kisim mani dispela i save lus long bia. Mi tromoi planti mani moa long bia na kaikai nogat. Nau laip i hat em i no moa isi olsem mi bin lukim bipo. Na givim nating mani long ol man nau tu i hat. Bipo yu lukim memba bilong famili o poroman em isi long yu givim em mani. Nau yu lukim olsem dispela mani em yu stap long strong bilong em. Sapos yu givim dispela mani long narapela man o meri yu yet bai nogat. Long dispela as mi ken tok laip i go hat tumas."



Mathew Povaro

Mathew Povaro i bilong Goroka, Isten Hailans provins. Em i bin traim long painim wok tasol ol i no kisim em long wanpela wok. "Mi salim buai na mi save strongim mi yet. Mi laik long stopim long kaikai buai na smuk. Sapos God i laik em i ken strongim mi long go lotu. Mi save gat tingting bilong lotu tasol mi nogat bikpea bilip. Mi putim mi yet long han bilong em. Mi yet mi nogat mani long maolol. Mi yet bai sapatim ol lukim raun bilong yu long 2004."

Ronald Tuanim i bilong Tangu, Madang provins na em i kam raun taim Wantok i bungim em na kisim tingting bilong em. Em i tok olsem: "Mi man bilong raun planti long ol pati long ples. Wanem hap pati i stap mi save go maski em i longwe ples. Mi bai lusim meri pikinini i stap na mi go. Taim mi bungim wantaim ol poroman bilong mi mipela i save bungim mani we mipela i save baim bia na dring. tasol mi lukim dispela pasin i no gutpela na olsem na i no stret. Niu yia resolusen bilong mi em long stopim dispela ol pasin na sindaun isi wantaim famili bilong mi. Mi no man bilong lotu tumas tasol sapos ol manmeri i helpim mi mi laik long lotu tu."

CATHOLIC RADIO schedule

Fonde		Tunde	
6:00	ANGELUS	6:05	SUNDAY EUCHARIST (replay)
6:05	MEDITATION/INSPIRATIONAL MUSIC	7:00	HOLY ROSARY
7:00	VATICAN RADIO WORLD NEWS	7:30	CATHOLIC INSIGHT
7:15	VATICAN ENGLISH PROGRAM	8:00	VATICAN WORLD NEWS
7:35	NON-STOP GOSPEL MUSIC	8:15	VATICAN ENGLISH PROGRAM
8:00	JOURNEY HOME (EWTN)	8:40	IN THE LORD'S VINEYARD
9:00	VATICAN RADIO WORLD NEWS	10:00	NON-STOP GOSPEL MUSIC
9:15	VATICAN ENGLISH PROGRAM	Papatu	
9:40	KIDS SING-ALONG	6:08	ANGELUS
10:00	CATHOLIC JUKEBOX	6:05	MEDITATION / INSPIRATIONAL MUSIC
10:30	GOSPEL MUSIC	7:00	VATICAN WORLD NEWS
11:00	NON-STOP GOSPEL MUSIC	7:15	VATICAN ENGLISH PROGRAM
12:00	ANGELUS	7:35	NON-STOP MUSIC
12:05	VATICAN WORLD NEWS	8:00	BEST OF JOURNEY HOME
12:20	VATICAN ENGLISH PROGRAM	9:00	VATICAN WORLD NEWS
12:40	REFLECTION MUSIC	9:15	VATICAN ENGLISH PROGRAM
1:00	LAMB'S SUPPER WITH DR. SCHOTT HAHN	9:35	KIDS SING ALONG
2:00	MUSIC	10:00	CATHOLIC JUKEBOX (EWTN)
3:00	CHAPLET OF DIVINE MERCY	10:30	NON-STOP GOSPEL MUSIC
3:30	NON-STOP GOSPEL MUSIC	12:00	ANGELUS
4:00	CATHOLIC JUKEBOX (ENCORE)	12:05	VATICAN WORLD NEWS
4:30	NON-STOP GOSPEL MUSIC	12:20	VATICAN ENGLISH PROGRAM
5:00	JOURNEY HOME	12:40	AFTERNOON REFLECTION MUSIC
6:00	ANGELUS	1:00	THE WAY TO FOLLOW JESUS
6:05	MADANG LOCAL NEWS	1:30	GOSPEL MUSIC
6:10	VATICAN ENGLISH PROGRAM	3:00	CHAPLET OF DIVINE MERCY
6:30	LAMB'S SUPPER WITH DR. SCHOTT HAHN	3:20	NON-STOP GOSPEL MUSIC
7:00	HOLY ROSARY	4:00	CATHOLIC JUKEBOX (EWTN)
7:30	CATHOLIC INSIGHT	4:30	NON-STOP GOSPEL MUSIC
8:00	VATICAN WORLD NEWS	5:00	MESSAGE IN MUSIC
8:15	MADANG LOCAL NEWS	6:00	ANGELUS
8:30	VATICAN ENGLISH PROGRAM	6:05	VATICAN ENGLISH PROGRAM
9:00	TOK STREET LONG HWARDS	6:30	MANY FACES OF MARY
9:30	VATICAN ENGLISH PROGRAM	7:00	HOLY ROSARY
10:30	NON-STOP GOSPEL MUSIC	7:30	BENEDICTION
6:00	ANGELUS	8:00	VATICAN WORLD NEWS
6:05	MEDITATION/INSPIRATIONAL MUSIC	8:15	CRN LOCAL NEWS
7:00	VATICAN WORLD NEWS	8:30	VATICAN ENGLISH PROGRAM
7:15	VATICAN ENGLISH PROGRAM	9:00	BEST OF JOURNEY HOME
7:35	NON-STOP GOSPEL MUSIC	10:00	CATHOLIC JUKEBOX (EWTN)
8:00	RADIO ST. JOSEPH PRESENTS	10:30	VATICAN ENGLISH PROGRAM
9:00	VATICAN WORLD NEWS	11:00	NON-STOP GOSPEL MUSIC
9:15	ENGLISH PROGRAM	Tunde	
9:35	KIDS SING-ALONG	6:00	ANGELUS
10:00	CATHOLIC JUKEBOX	6:05	MEDITATION/INSPIRATIONAL MUSIC
10:30	NON-STOP GOSPEL MUSIC	7:00	VATICAN WORLD NEWS
12:00	ANGELUS	7:15	VATICAN ENGLISH PROGRAM
12:05	VATICAN WORLD NEWS	7:35	NON-STOP MUSIC
12:20	VATICAN ENGLISH PROGRAM	8:00	RADIO ST. JOSEPH PRESENTS
12:40	REFLECTION MUSIC	9:00	VATICAN RADIO WORLD NEWS
1:00	OUR FATHER'S PLAN	9:15	VATICAN ENGLISH PROGRAM
1:30	AFTERNOON GOSPEL MUSIC	9:40	KIDS SING-ALONG
3:00	CHAPLET OF DIVINE MERCY	10:00	CATHOLIC JUKEBOX
3:20	NON-STOP GOSPEL MUSIC	10:30	GOSPEL MUSIC
4:00	CATHOLIC JUKEBOX (EWTN)	12:00	ANGELUS
4:30	NON-STOP GOSPEL MUSIC	12:05	VATICAN WORLD NEWS
5:00	WAVE FACTOR (EWTN)	12:20	VATICAN ENGLISH PROGRAM
6:00	ANGELUS	12:40	REFLECTION MUSIC
6:05	VATICAN ENGLISH PROGRAM	1:00	SUPER SAINTS
6:30	FATIMA	1:30	GOSPEL MUSIC
7:00	HOLY ROSARY	3:00	CHAPLET OF DIVINE MERCY
7:30	STATIONS OF THE CROSS	3:20	NON-STOP GOSPEL MUSIC
8:00	VATICAN WORLD NEWS	4:00	CATHOLIC JUKEBOX
8:15	CRN LOCAL NEWS	4:30	NON-STOP GOSPEL MUSIC
8:30	VATICAN ENGLISH PROGRAM	5:00	RADIO ST. JOSEPH PRESENTS
9:00	TOK STREET LONG HWARDS	6:00	ANGELUS
10:00	CATHOLIC JUKEBOX	6:05	ATAPE LOCAL NEWS
10:30	VATICAN ENGLISH PROGRAM	6:10	VATICAN ENGLISH PROGRAM
11:00	NON-STOP GOSPEL MUSIC	6:30	MOTHER OF REDEMPTION
6:00	ANGELUS	7:00	HOLY ROSARY
6:05	MEDITATION/INSPIRATIONAL MUSIC	7:30	SUPER SAINTS
7:00	OUR FATHER'S PLAN	8:00	VATICAN WORLD NEWS
7:30	CROSSROADS (EWTN)	8:15	ATAPE LOCAL NEWS
8:00	VATICAN WORLD NEWS	8:20	VATICAN ENGLISH PROGRAM
8:15	VATICAN PROGRAM	9:00	TOK STREET ABOUT HWARDS WITH FR. JUDE (ENGLISH)
8:35	MUSIC	10:00	CATHOLIC JUKEBOX
9:30	BACKSTAGE (EWTN)	10:30	VATICAN ENGLISH PROGRAMME
10:00	WAVE FACTOR	10:50	NON-STOP GOSPEL MUSIC
11:00	NON-STOP GOSPEL MUSIC	Papatu	
12:00	ANGELUS	6:00	ANGELUS
12:05	VATICAN WORLD NEWS	6:05	MEDITATION/INSPIRATIONAL MUSIC
12:20	VATICAN ENGLISH PROGRAMME	7:00	VATICAN WORLD NEWS
12:40	GOSPEL MUSIC	7:15	VATICAN ENGLISH PROGRAM
3:00	CHAPLET OF DIVINE MERCY	7:35	NON-STOP GOSPEL MUSIC
3:20	GOSPEL MUSIC	8:00	SCRIPTURE MATTERS WITH DR. SCHOTT HAHN (EWTN)
4:00	BACKSTAGE	9:00	VATICAN WORLD NEWS
4:30	NON-STOP GOSPEL MUSIC	9:15	VATICAN ENGLISH PROGRAM
5:00	WORLD OVER NEWS	9:35	KIDS SING ALONG
6:00	ANGELUS	10:00	CATHOLIC JUKEBOX
6:05	VATICAN ENGLISH PROGRAMME	10:30	NON-STOP GOSPEL MUSIC
6:30	MIRACLES OF THE CROSS	12:00	ANGELUS
7:00	HOLY ROSARY	12:05	VATICAN WORLD NEWS
7:30	CROSSROADS	12:20	VATICAN ENGLISH PROGRAM
8:00	VATICAN WORLD NEWS	12:40	REFLECTION MUSIC
8:15	VATICAN ENGLISH PROGRAM	1:00	FIRST COMES LOVE DR. SCHOTT HAHN (EWTN)
9:00	WORLD OVER NEWS (EWTN)	1:30	AFTERNOON GOSPEL MUSIC
10:00	BACKSTAGE	3:00	CHAPLET OF DIVINE MERCY
10:30	VATICAN ENGLISH PROGRAMME	3:20	NON-STOP GOSPEL MUSIC
10:50	NON-STOP GOSPEL MUSIC	4:00	CATHOLIC JUKEBOX
6:00	ANGELUS	4:30	NON-STOP GOSPEL MUSIC
6:05	MEDITATION/INSPIRATIONAL MUSIC	5:00	SCRIPTURE MATTERS
8:00	VATICAN WORLD NEWS	6:00	ANGELUS
8:15	VATICAN ENGLISH PROGRAM	6:05	VANIMO LOCAL NEWS
8:35	NON-STOP GOSPEL MUSIC	6:10	VATICAN ENGLISH PROGRAM
9:00	SUNDAY EUCHARIST LIVE	6:30	FATIMA, HEAVEN'S PEACE PLAN
9:30	NON-STOP GOSPEL MUSIC	7:00	HOLY ROSARY
10:00	IN THE LORD'S VINEYARD	7:30	DOCTORS OF THE CHURCH
11:00	ANGELUS	8:00	VATICAN WORLD NEWS
12:00	VATICAN WORLD NEWS	8:15	VANIMO LOCAL NEWS
12:05	VATICAN ENGLISH PROGRAM	8:20	VATICAN ENGLISH PROGRAM
12:20	VATICAN ENGLISH PROGRAM	9:00	TOK STREET ABOUT HWARDS WITH FR. JUDE
12:40	GOSPEL MUSIC	10:00	CATHOLIC JUKEBOX
3:00	CHAPLET OF DIVINE MERCY	10:30	VATICAN ENGLISH PROGRAM
3:20	GOSPEL MUSIC	10:50	NON-STOP GOSPEL MUSIC
5:00	SIGNS OF THE TIMES (RTA)		
6:00	ANGELUS		



• Julius Moab

Strongpela yia bilong PNG musik

...Lukluk bek long 2004

Neville Choi i raitim

LONG dispela yia, i gat planti nupela samting i bin kamap long musik industri insait long kantri.

Sampela nupela musik ben i bin kamap wantaim ol nupela stail PNG musik, sampela musik atis bilong PNG yet i bin gat sans long go pilai na singsing wantaim ol musik sta bilong ol arapela kantri insait long Saut Pasifik, na tu i bin i gat ol nupela stail musik na singsing i kam long ol biknem musik atis bilong yumi.

Tasol gospel musik insait long PNG i bin kamap tupela bikpela samting tru insait long PNG.

I stat long pinis bilong las yia yet, Vanessa Quai, angelo bilong Vanuatu gospel musik i bin kam raun long Pot Mosbi.

Vanessa em i wanpela biknem gospel musik atis bilong Vanuatu. Las yia em i bin raun i go long planti long ol kantri insait long Pasifik.

Na taim em i kam long PNG, planti yangpela na lapun tu i bin go harim na lukim em i singsing.

Dispela i bin statim groa bilong gospel musik insait long kantri long dispela yia.

Taim Vanessa i bin kam pilai long Mosbi siti las yia, em i kirap nogut long wanpela yangpela gospel musik grup bilong yumi yet, Soul Harmony.

Em i tok ol yangpela bilong Lavaiaamat famili i bin lainim em planti samting long sait bilong tanim stail bilong gospel musik bai em i ken pairap olsem musik bilong ol yangpela tete.

Tru tumas, Soul Harmony em i wanpela gospel musik grup hia insait long PNG husat i wok long kamapim ol kain nupela stail musik na danis bilong musik ol i save yusim long apim nem bilong bikman antap.

Wok bung namel long Soul Harmony na Vanessa Quai i karim wanpela albam ol i kolim 'Promise' we i bin kamaut long mun Novemba.

Dispela i bin kamap bihain long Vanessa i bin sainim wanpela rekoding kontrak wantaim Chin H Meen Supersound Studios. Dispela kontrak i lukim Baine na Radlee Lavaiaamat bilong Soul Harmony i helpim long stretim musik bilong albam bilong ol.

Bihain long Vanessa i bin kam raun long PNG las yia, musik insait long kantri yet i bin stat isi isi wantaim

nupela musik i bin kamap long han bilong ol manki Buka long Niu Age Ben.

Niu Age i bin rilisim namba wan musik albam bilong ol aninit long nem bilong CHM na Cyclone Studios las yia tu, tasol strong bilong ol bikpela singsing bilong ol olsem 'Tsomi Alia' na 'Gutsomi' i lukim ol i strong inap long namel bilong yia.

I bin i gat ol arapela yangpela musik atis i bin mekim nem bilong ol long dispela yia.

Manki Popondeta, bipo i bin go pas long Bad Mix Souls, Slim Buda i bin mekim namba wan solo albam bilong em na kamautim sampela nupela stail PNG regei musik.

Na Manki Raikos yet, Julius Moab i bin tromoi kum katim tok pisin bilong em long bikpela solo musik albam bilong em 'Zero Balance'. Dispela manki Siuwit i bin kukim stret wantaim tok pisin em i tromoi insait long ol singsing bilong em.

Albam bilong em i bin sindaun long namba wan posisen inap wanpela mun olgeta wantaim ol singsing 'Candle City', 'Sikul Sepik' na 'Zero Balance' yet.

Dispela yia i soim nupela stail bilong ol nupela solo musik atis insait long kantri, na ol i soim tu strong bilong ol biknem musik atis bilong yumi.

Manki Finch ya, Oshen i bin rilisim nupela albam bilong em 'Kanaka Pasifika' - we em i soim strong bilong em long singsing long ol kain kain tok ples bilong PNG na Pasifik wantaim.

Long sait bilong promotim PNG insait long Pasifik, Oshen yet i wok long strong. Tasol i gat wanpela arapela musik atis bilong PNG husat i wok long kirapim das long ol wan wan kantri insait long Pasifik.

Dispela musik atis em Straky. Em nau, Straky i bin go pilai wantaim Vanessa Quai long Vanuatu long tupela mun i go pinis.

Dispela raun bilong en i go long Port Vila em Vanessa na Papa bilong em yet i bin askim em long go na pilai musik wantaim Vanessa long ol musik konset bilong em.

Namel long ol arapela nupela musik rilis bilong dispela yia, Moses Tau i rilisim 'Volume 2' albam bilong em, Mari Ellingson i rilisim 'Lohia Tauna' na Keiss Garona yet i kamap

wantaim 'Volume 3' bilong em.

Long namel bilong yia, Hausboi, tripela manki husat i bin stat insait long wanpela liklik hausboi long Lae siti i bin rausim namba tu albam bilong ol 'Diriman'.

Wanpela bikpela singsing bilong ol we ol i kolim 'Melanesia' i bin kamap long CHM Supersound Video Hits long EMTV pas-taim long ol i bin rilisim albam.

Dispela em i kamap long askim bilong man i go pas long Hausboi, John Faunt yet.

Maketing na Advetaising Menesa bilong CHM, Aaron Chin yet i bin tokim Wantok olsem John yet i save laik plenim gut ol rilis bilong ol.

Musik klip bilong 'Melanesia' ol i mekim long Manus yet, na i soim ol naispela nambis, solwara na bush bilong Manus.

Dispela singsing i tromoi wanpela bikpela singaut i go long ol pipel bilong PNG long luksave na strongim ol solwara, graun na bus bilong ples bilong yumi na strongim pasin kalsa bilong yumi ol PNG yet.

Dispela naispela musik klip na ol toktok bilong ol i bin pulim laik bilong planti manmeri long musik bilong ol.

Strong bilong 'Diriman' i bin stap wantaim ol toktok ol i putim i go insait long ol singsing na stail bilong PNG regei yet i go insait wantaim musik bilong tete.

Mipela i lukim sampela biknem musik atis bilong ol arapela kantri tu i kam sua long PNG.

Namba wan biknem musik sta bilong Canada, Yasmine i bin kam na tromoi nek bilong em long helpim Miss Warehouse long resis bilong Miss PNG, Ashwin Samason long resim mani.

Yasmine i bin singsing na pulim iau bilong ol manmeri na Ashwin i bin winim Miss PNG resis.

Tasol bikpela stori i bin kamap long gospel musik bihainim tingting bilong CHM long strongim gospel musik insait long kantri.

Wantok Niuspepa i bin toktok wantaim CHM na kisim stori olsem ol i laik strongim gospel musik insait long Papua Niugini bai em i ken kamap bikpela olsem ol arapela stail bilong musik.

Long dispela sait, CHM i bin saptim raun bilong tupela biknem gospel grup bilong ovasis i kam long PNG.

Hillsongs Australia givim skul long musik

Namba wan biknem gospel grup bilong kam raun long Mosbi long dispela yia em Hillsongs bilong Australia.



Dispela grup i gat bikpela nem tru insait long Papua Niugini yet we planti manmeri i save bihainim musik na ol singsing bilong ol husat i save laik lukim 'Praise na Worship' musik program we CHM yet i mekim na i save kamap long EMTV long olgeta Mande nait.

Moa long 50 manmeri bilong Hillsongs Australia i bin kam raun long PNG long mekim musik na preis konset bilong ol.

Long Septemba 7, ol i bin kamap long Pot Mosbi. Tasol raun bilong ol i no long singsing na pilai musik tasol. Ol i bin kam na givim stia tok long ritim buk Baibel, skulim ol yangpela long pilai musik na autim tok bilong God.

Das i kirap wantaim Makoma

Tasol ating bikpela samting tru long kamap insait long PNG musik em raun bilong gospel ben bilong Ripablik ov Congo husat i stap long Netherlands nau, Makoma.



Twisties nem bilong Goodman Fielders International, i bin wok bung wantaim Nesenel AIDS Kaunsel Sketeriet long kisim ol i kam long PNG.

Biknem lit singa bilong Makoma, Nathalie Makoma i bin kam raun em yet long mun Septemba bilong sekim ples na stretim rot bilong ol brata susa bilong em husat i kam kamap long PNG long namba tu wik bilong mun Novemba.

Ol i bin mekim namba wan so bilong ol long Pot Mosbi Kantri Klub long Pot Mosbi, bihain ol i go long mekim namba wan publik konset bilong ol long Sir Ignatius Kilage Stadium long Lae pastaim long ol i kam bek long Mosbi na pilai long Sir John Guise Stadium.

Tupela konset wantaim i bin pulim planti manmeri tru. Dispela de bilong musik konset bilong Makoma i bin pulim long ol yangpela pikinini na famili husat i amamas tru long lukim Duma, Martin, Annie, Pengaine, Nathalie na Patrick.

Olgeta yangpela i save long ol nem bilong wan wan long olgeta momba bilong Makoma.

Raun bilong dispela tupela biknem gospel grup i bin apim nem bilong gospel musik insait long kantri na i bin pulim tu ai bilong planti manmeri i go long gospel musik insait long PNG.

Long dispela yia tasol, nem bilong gospel musik i bin kamap bikpela, mak bilong PNG musik i bin kamap strong moa wantaim planti yangpela musik atis i kamap wantaim stail bilong musik bilong ol yet, na planti nupela musik rekoding studio i bin stat long mekim nem bilong ol.

Ice Discovered


Wanpela arapela bikpela samting we i bin stat long dispela yia insait long musik em i wanpela TV program we SP Breweri yet i statim na ol i kolim 'Ice Discovered'.

Dispela TV program em ol manmeri na famili wantaim i bin laikim tru taim em i save kamap long olgeta Sande nait.

Dispela program em wanpela resis long painim ol nupela musik atis insait long PNG. Sampela handet samting manmeri i bin resis long winim bikpela prais mani na sans bilong luksave long driman bilong ol long kamap wanpela musik rekoding atis.

Dispela so i bin pulim ai bilong olgeta manmeri long kantri na wan wan long ol lain yangpela husat i bin go kamap long fainels bilong dispela musik resis em PNG i save gut tru long nem bilong ol.

Sapos yu askim wanpela yangpela man o famili manmeri husat i bin winim dispela resis, ol i ken kolim stret nem bilong dispela yangpela meri Lucille husat i bin win. Ol i ken tokim yu olsem ol i ting Isaac na Andiopa wantaim Samson, Betty na Sophie i bin i gat sans, na ol i ken kolim nem bilong tripela jas husat i bin stap long skelim strong bilong wan wan manmeri insait long dispela resis.



• Haus Boi



• Vanessa Quai & Soul Harmony



• Ice Discovered

Nesanel Wikli Hit Pareid TOP 100 - 2004

100	Gleffy Lalokau	Hobby Mates
99	Fule Gawi	Willie Tropu
98	Kuasisi	Dorothy
97	Sem Bilong Em	Lista Serum
96	A Kini	Patti Potts Doi
95	Isa Qua Nanumiau	Fiji's Brown Sugar
94	My Nambawan	Multitribes
93	Gedena	Tim Semeka
92	Sad Feelings	Gideon Kepas
91	Sugar Meri	Kuri Rup
90	Yapma	Bosi Souls
89	Lus Man	Begani
88	Gasiro	Pasiwa Boys
87	Lewa	Hausboi
86	PNG Ples Blong Mi	Alison & Giro
85	A Vaira	Patti Potts Doi
84	Memories	Tidem
83	Pepa Moni	Slim Buda
82	Spak Tasol	Fox Originators
81	Golden Beach	Westail
80	Meri Siwi	K-Mala
79	Never Let You Go	Straky
78	Dimugura	Bits & Pieces
77	Gala Kese Sara	Vanessa Quai
76	Mekeo Reggae	Camp 7
75	Promis	Phi-Jay
74	Eigatute	West Kadah
73	Liromauke	Phi-Jay
72	Kela Musmus	Sagothorn
71	Gungun Yeo	Slumz Of Simbu
70	Papua New Guinea	Hollie Maea
69	Kina.com.pg	Simbary
68	MK Faia Lait	Rabbie Gamenu
67	Selena no Staka	Third World Crew
66	Numba Ragwa	Sagothorn
65	Ravaku	Jnr Iroakele
64	Tangi Varea	Isles De-Sound
63	K-Town	Jnr Insects
62	Power Blackout	Leonard Kania
61	Sikul Sepik	Julius Moab
60	Jay Pee	Doggies
59	Sekol Das	Julius Moab
58	Wum Kaman	Hausboi
57	A Warmari	Uralom Kania
56	Natute	Westail
55	Ples Wau	Patti Potts Doi
54	Malira Pawa	Zong Hits
53	Lusim Ples	Camp 7
52	Miya	Sharzy & Barnzie
51	Christina	Crew 5
50	Nama Vavine	Martin Rawali
49	Cruising	Sav-X
48	Kanage Kantri	Eskimo
47	Miok Medley	Mark Soweni
46	Ketz Mulai	X-Anats
45	Bucket	Doggies
44	Baby Yet	Slim Buda
43	Pes Nogut	Med Wagi
42	20 Toea	West Kadah
41	Angie Lewa	Manny
40	Larem Mi	Slumz Of Simbu
39	Miumiu	Zong Hits
38	Can I Be The One	O-shen
37	Mama	X-Anats
36	Upengi	Wembis Of Lae
35	Street Mangi	X-Azzimbah
34	TTB	Moses Tau
33	Ranawei I Kam	Slim Buda
32	Kisim Bus	Luke Banag
31	Sunshine	O-shen
30	Maunten Lewa Mori	Julius Moab
29	Luv Bait	K-Mala
28	Kiri	Hausboi
27	Nasa	D2 Band
26	Hard Life	X-Anats
25	JB Borondi	Jimmy Blue Mt Rangers
24	Last In Line	Edwin Baffe
23	A Bul Tairos	Patti Potts Doi
22	Sigi Mangi	Grumo Masalai
21	Aroma	Hobby Mates
20	Tasi	Niu Age Band
19	E Tamange	Niu Age Band
18	Tsomni Alia	Niu Age Band
17	Raitman	Niu Age Band
16	Iti Bayama	Armstrong Gomara
15	Naika	Hausboi
14	Hagen Meri	Spectators
13	Daon Anda	West Kadah
12	Sharon	Uralom ft Rokas
11	Jombie Kunex	New Painim Wok
10	Lewa	Phi-Jay
9	Gutsomi	Niu Age Band
8	Buimo Road	Camp 7
7	Kalivuvur	Patti Potts Doi
6	Mr Boombastic	Slim Buda
5	ToBes	Westail ft Patti Doi
4	Zero Balance	Julius Moab
3	Hanua Maurina	O-shen
2	704 (A Lok Lok NCR)	Jnr Insects
1	Nellien	Uralom ft Moses Tau

Save long musik i strong moa long 2004

Neville Choi i raitim

LONG pinis bilong olgeta yia, wantok redio stesen bilong mipela YUMI FM i save givim luksave long 100 top singsing i bin kamaut long redio na ol manmeri bilong PNG i bin laikim tumas.

Dispela singsing em ol i makim strong bilong ol insait long dispela 100 na bai yu ken skelim strong bilong ol o laik bilong ol manmeri long ol.

2004 i lukim planti nupela musik atis na musik grup i kamap. Sampela nupela lain husat i bin kamap wantaim ol namba wan musik albam

bilong ol i mekim gut liklik wantaim nupela stail musik bilong ol.

Sampela biknem musik atis bilong bipo i soim strong bilong ol yet, na sampela i kamapim ol nupela tok pisin tu.

Tasol wanpela samting we i klia long olgeta dispela singsing na kain kain stail musik em strong bilong save bilong ol musik manmeri bilong yumi i wok long go bikipela moa.

I gat ol singsing bilong ol atis bilong arapela kantri insait long Pasifik rijon tu i stap, tasol bai yu ken lukim olsem ol PNG musik yet i strong tumas long laik bilong ol manmeri insait long kantri.



EMTV GAID

5.00	CREFFLO DOLLAR	5.00	CREFFLO DOLLAR
5.30	JOYCE MEYER MINISTRY	5.00	JOYCE MEYER MINISTRY
6.00	TODAY SHOW	6.00	TODAY SHOW
9.00	2ND TEST AUST V PAKIS	9.00	2ND TEST AUST V PAKIS
11.10	THE CRICKET SHOW	11.00	THE CRICKET SHOW
11.30	DR PHIL	12.00	2ST TEST AUST V PAKIS
12.00	2ND TEST AUST V PAKIS	4.57	EMTV TOKSAVE
4.57	EMTV TOKSAVE	5.00	THE PRICE IS RIGHT
5.00	THE PRICE IS RIGHT		MONSTER SHOW CASE
	\$100,000 SUPER SHOWCASE	6.00	NATIONAL EMTV NEWS
6.00	NATIONAL EMTV NEWS	6.30	A CURRENT AFFAIR
6.30	A CURRENT AFFAIR	6.58	TOK PISIN NEWS UPDATE
6.59	LOTTO DRAW	7.00	LOTTO DRAW
7.00	CHM SUPER SOUND	7.01	PRaise
7.57	EMTV TOKSAVE	8.00	INSAIT
8.00	FEAR FACTOR	8.30	APPRENTICE
9.00	WITHOUT TRACE	9.30	C.S.I CRIME SCENE
10.00	KING OF QUEENS		INVESTIGATION
10.30	EMTV NEWS REPLAY	10.30	NEWS REPLAY
11.00	WALKER TEXAS	11.00	CHM SUPER SOUND
00.00	NIGHTLINE	12.00	NIGHTLINE
0.30	STATION CLOSE	12.30	CLOSE

Tunde 4/01/05

Fraide 3/11/04

5.29	STATION OPEN	6.29	STATION OPEN
5.30	JOYCE MEYER MINISTRY	5.30	JOYCE MEYER MINISTRY
6.00	TODAY SHOW	6.00	TODAY SHOW
9.00	2ND TEST AUST V PAKIS	9.00	2ND TEST AUST V PAKIS
11.30	THE CRICKET SHOW	11.30	THE CRICKET SHOW
12.00	2ND TEST AUST V PAKIS	12.00	2ND TEST AUST V PAKIS
4.57	EMTV TOKSAVE	4.57	EMTV TOKSAVE
5.00	THE PRICE IS RIGHT	5.00	THE PRICE IS RIGHT
6.00	NATIONAL EMTV NEWS	6.00	NATIONAL EMTV NEWS
6.30	A CURRENT AFFAIR	6.30	A CURRENT AFFAIR
6.58	TOK PISIN NEWS UPDATE	6.58	TOK PISIN NEWS UPDATE
6.59	LOTTO DRAW	6.59	LOTTO DRAW
7.00	BACK YARD BLITZ	7.00	BACK YARD BLITZ
7.30	HOLIDAY SHOWDOWN	7.30	HOLIDAY SHOWDOWN
8.27	EMTV TOKSAVE	8.27	EMTV TOKSAVE
8.30	JAG	8.30	JAG
9.30	THIRD WATCH	9.30	THIRD WATCH
10.30	EMTV NEWS REPLAY	10.30	EMTV NEWS REPLAY
11.00	ER	11.00	ER
00.00	NIGHTLINE	00.00	NIGHTLINE
00.30	STATION CLOSE	00.30	STATION CLOSE

Tunde 5/01/05

7.00	IT'S HI-5 CHRISTMAS	6.00	NATIONAL EMTV NEWS
7.30	JAYJAY THE JET PLANE	6.30	A CURRENT AFFAIR
8.00	PLANET FANTA	6.57	TOK PISIN NEWS UPDATE
9.30	DOWNLOAD	6.59	LOTTO DRAW
10.00	SO FRESH	7.00	WORLD OF WILD LIFE
11.30	MOVIE: THE SECRET OF GIVING	7.30	WIFE SWAP- NEW SERIES
1.00	CAROLS BY CANDLE LIGHT	8.57	EMTV TOKSAVE
3.30	COMMISSIONERS CHRISTMAS CAROLS	9.00	WEDNESDAY NIGHT MOVIE: LITTLE NICKY
5.00	ESCAPE WITH E.T	11.00	SOUTH PACIFIC MUSIC
5.30	FISHING AUSTRALIA	11.30	EMTV NEWS REPLAY
6.00	NATIONAL NEWS EMTV	12.00	NIGHTLINE
6.30	SPY TV	12.30	STATION CLOSE
7.30	AIRLINE		
8.00	SOUTH PACIFIC MUSIC		
8.57	EMTV TOKSAVE		
9.00	XENA WARRIOR PRINCES		
10.00	HECULES		
0.10	KING OF QUEENS		
00.40	CLOSE		

Sande 2/01/05

6.59	STATION OPEN	7.00	IT IS WRITTEN
7.30	WORLD OF WILDLIFE	7.30	WORLD OF WILDLIFE
8.00	RAMESH RICHARDS	8.00	RAMESH RICHARDS
8.30	ESCAPE WITH E.T	8.30	ESCAPE WITH E.T
9.00	3RD TEST AUST V PAKIS	9.00	3RD TEST AUST V PAKIS
11.30	CRICKET SHOW	11.30	CRICKET SHOW
12.00	AUST V PAKIS CONT...	12.00	AUST V PAKIS CONT...
5.30	THE PACIFIC WAY	5.30	THE PACIFIC WAY
6.00	NATIONAL EMTV NEWS	6.00	NATIONAL EMTV NEWS
6.30	TOUCH BY AN ANGLE	6.30	TOUCH BY AN ANGLE
7.30	PREMIER SPECIAL: DON'T THERE SOUTH AMERICA	7.30	PREMIER SPECIAL: DON'T THERE SOUTH AMERICA
8.27	EMTV TOKSAVE	8.27	EMTV TOKSAVE
8.30	MOVIE: THE CIRCLE OF DECEIT	8.30	MOVIE: THE CIRCLE OF DECEIT
10.30	EMTV NEWS REPLAY	10.30	EMTV NEWS REPLAY
11.30	PRaise	11.30	PRaise
00.00	STATION CLOSE	00.00	STATION CLOSE

Brian Bell
Shop with a friend



EXTENDED CHRISTMAS TRADING HOURS

SATURDAY	DECEMBER 18TH, 2004	8:00 AM - 2:00 PM
SUNDAY	DECEMBER 19TH, 2004	9:00 AM - 1:00 PM
MONDAY	DECEMBER 20TH, 2004	8:00 AM - 5:00 PM
TUESDAY	DECEMBER 21ST, 2004	8:00 AM - 8:00 PM
WEDNESDAY	DECEMBER 22ND, 2004	8:00 AM - 5:00 PM
THURSDAY	DECEMBER 23RD, 2004	8:00 AM - 8:00 PM
FRIDAY	DECEMBER 24TH, 2004	8:00 AM - 5:00 PM
SATURDAY	DECEMBER 25TH, 2004	CHRISTMAS DAY
SUNDAY	DECEMBER 26TH, 2004	BOXING DAY
MONDAY	DECEMBER 27TH, 2004	PUBLIC HOLIDAY
SATURDAY	JANUARY 1ST, 2005	NEW YEAR'S DAY
SUNDAY	JANUARY 2ND, 2005	

PLAZA, HCC LAE & HCC GORDONS
 PLAZA, HCC LAE & HCC GORDONS
 NORMAL
 PLAZA & HCC LAE ONLY
 NORMAL
 PLAZA & HCC LAE ONLY
 NORMAL
 CLOSED
 CLOSED
 CLOSED
 CLOSED
 CLOSED



Merry Christmas & a Happy New Year

CHRISTMAS NIGHT SHOPPING

TUESDAY DECEMBER 21ST & THURSDAY DECEMBER 23RD
UNTIL 8PM ONLY AT PLAZA BOROKO AND HOMECENTRE CITY LAE

SPEND K50 AND GO INTO THE DRAW TO

WIN

OF KIW HOME

KB2-35 LOWSET 2 BEDROOM HOUSE & K6,000 BRIAN BELL SHOPPING VOUCHER

PLUS 6 WEEKLY SHARP PRIZES TO BE WON!

- DVD STEREO SYSTEM
- 21" COLOUR TV
- VCD STEREO SYSTEM
- RCR 940
- QT96 RCR
- QT 22RCR

MAJOR DRAW DEC 23rd 2004

Condolence Message:



The Chairman, Members of the Council, Management and staff of the Bible Society of Papua New Guinea would like to take this opportunity to bid a most heartfelt farewell to the longest serving and most faithful employer **Mahiro Maivila** who's untimely death on the 24th of December 2004 has come as a shock to the Executive Secretary, Mrs Leontine Tamate and all who dearly knew him as a colleague and active brother in Jesus Christ.

We also wish to convey our deepest sympathy to his wife Lucy, only daughter Nita, sister and relatives for their loss.

The late Mr Maivila assumed recreational leave on the 16th of November together with his only daughter Nita and young wife and was to return on the 24th of December the day we learnt of his passing on.

Late Mr Maivila had served the Bible Society for 33 years starting as the Tea boy in 1971 and reached the managers level assuming the position of Distribution manager.

Late Mr Maivila suffered a long illness which lead to his death. He was born on the fifth of December, 1955 and died on the 24th December



The late Mr Mahiro



2004, at the age of 49 years.

Late Mahiro is from Ihu in the Gulf province. On December 16, 1960 at the age of five he was admitted to Gemo Island Hospital.

On March 1966 he was discharged and left for Ihu where he attended primary school and completed grade six. In 1967 he started his secondary education at Kerema High School where he, grade ten.

On May 10 late Mahiro sighted the address of the Bible Society of Papua New Guinea on the front cover of his Bible and that is when he decided to write to seek employment.

On the 15th of January, 1971, he joined the Bible Society of PNG as a staff and worked humbly and faithfully until his untimely death.

We salute you brother Mahiro (My Hero) as Arthur's bubu says.

May our heavenly Father have mercy on you and take you into HIS Paradise. He will be sadly missed by all of us here.

Our prayers are with his family as they strive to find peace and strength in our LORD Jesus Christ during this festive season.

Long nem bilong gutpela sindaun

OL i karamapim bokis bilong em long flag na karim i go long balus bai karim bodi bilong em igo.

Baksait bilong ol i stret, tasol strongpela bel sore bilong ol i soim aut wantaim krai long pes bilong ol long soim las rispek bilong ol.

Na taim ol i kisim bodi bilong emi go klostu long dispela traipela ami balus, insait long ples balus, ol wanwok i soim las gutbai bilong ol, wokim sekel, het igo daun na lokim han bilong raun olgeta.

Sanap long tupela lain na lukluk long balus. Dispela ami balus RAAF 737 jet isi isi lusim ples balus na ron igo antap long klaut na go hait olgeta.

Poromanim daiman bokis long go bek long ples em Minista bilong Jastis bilong Australia Senato Chris Ellison and Oposisen mausman bilong Hom Afeas Senator Robert McClelland.

Tasol long Fairbairn Amy Bes long Canberra, we RAAF 737 i pundaun klostu tasol long 6 kilok long apinun, ol famili bilong Dunning, tupela papamama bilong em Michael na Christine, tupela susa bilong em Sarah na Emma na gelfren bilong em Elise Wiscombe, husat kamapim gat ov hona, holim han bilong ol yet taim 8-pela polisman bilong Australia Federal Polis i karim bodi bilong em i kam aut long balus.

Ol famili bilong em i sanap sori, tasol susa bilong em Emma, husat i save rispektim bikpela brata bilong em i krai bikpela long han bilong mama bilong em. Papamama bilong em i sanap stret long wanpela lain taim wanpela pikinini bilong ol bai ol i karim em i go long mog.

Krai bilong ol manmeri long ples balus i strong taim ol wanwok bilong Adam Dunning i kisim bodi bilong em long balus na i kam aut. Tasol ol wanwok i sanap strong taim ol apim kofin bilong wanwok i kam.

Ol wanwok bilong em husat ol i bin wok wantaim long lukautim haus palamen bilong ol, nau bai go kisim malolo.

Ol i daunim kofin bilong en igo daun long kar i redi long kisim bodi igo. Baksait long kofin, narapela wanwok i karim hat bilong em na bihainim em. Na bihain ol i karim bodi bilong em igo wantaim plis eskot.

Papa mama bilong em i lukluk i stap taim tupela i no inap lukluk moa long ol lain i pulim lain wantaim bodi bilong pikinini bilong tupela.

Mama bilong em i rausim sampela ai wara long ai bilong en na igo long helpim ol narapela long givim ol sapot, wankain olsem em i bin wokim long pikinini man bilong em.

Ol bikman bilong polis bilong Australia, wantaim Komisina Mick Keelty sanap bihain long ol famili. Senato Ellison na McClelland tu i joinim em na sanap bihain long ol famili.

Na baksait olgeta, ol wan skol, ol pren na ol poroman bilong em i bikmaus na krai.

Dispela em stori long wanem samting kamap long karim bokis bilong wanwok Adam Dunning, husat i gat 26 krismas long Honiara ples balus long Solomon Ailan na Canberra Ami Bes long last wik.

Ol raskol i sutim em long gan taim em i wok nait long wanpela

Bustin Anzu long Honiara i raitim

hap ples insait long siti ol i kolim Bodalain. Ol i bin sutim em long baksait bilong em wantaim tupela katres long samting olsem 3 kilok long moning bilong Trinde 22 dei. Em i dai stret long dispela taim.

Tasol long moning taim, long hetkota bilong Regional Assistance Mission bilong Solomon Ailan (RAMSI), ol wan-

Polis i bin putim tupela sas antap long wanpela 31 yia man, wanpela em long dai bilong Dunning na narapela long klostu kilim narapela wanwok bilong Dunning, husat i bin draivim em long nait.

Yangpela piskipa, wankain olsem ol narapela yangpela long olgeta hap graun, em i bin gat driman na plen bilong en long bihain



Toksori long dai bilong Dunning
(l-r)Ol wanwok i karim bokis bilong Adam Dunning 26, (r) na aninit, ol fren bilong em i krai long i dai bilong Dunning.

wok polismanmeri na ol soldia manmeri i soim las rispek bilong ol.

Long dispela bung, ol i bin lotu, we ol Pasifik Ailan i go pas long dispela bung wantaim song na prea.

Long dispela bung, planti wanwok bilong em i krai long soim rispek long wanem ol i bin stap na wok wantaim long dispela sotpela taim bilong en long wok long Solomon Ailan.

Praim Minista bilong Solomon Ailan Sir Allan Kemakeza, Minista bilong Jastis bilong Australia Senato Chris Ellison, Oposisen mausman bilong Hom Afeas Robert McClelland na AFP Polis Komisina Mick Keelty i bung wantaim ol RAMSI famili.

Long dispela bung Keelty i tok Dunning em i dai long kamapim gutpela sindaun insait long Solomon Ailan.

Sir Allan i tok: "Dispela yangpela man i bin helpim kantri bilong mipela we i bin pulap wantaim kainkain problem. Mipela ino inap lus tingting long em."

Royal Solomon Ailan Police (RSIP) Deputi Komanda na bosmeri bilong wok bung polis o PPF (Participating Police Force) Sandi Peisley i tok long wiken olsem ol i bin holim wanpela yangpela man pinis long i dai bilong Dunning na sasim. Wok painim aut i wok long go het yet.

"Dispela wok painim aut tim i wok hat nogut tru na dispela i soim sampela kain sapot, ino long ol PPF na RSIP tasol em bilong olgeta memba bilong RAMSI," Komanda Peisley i tok.

taim. Tasol dispela ol driman na promis bilong em i lus nating long tupela katres bilong bulet.

Emi bin tingting long go bek long Canberra, Australia long namba wan mun long neks yia na baim wanpela haus bilong em yet long ol mani em i sevim long wok misin long Solomon Ailan na maritim gel fren bilong em.

Tasol dispela strongpela yangpela mangi bilong Canberra i no festaim long bungim ol hevi kamap long Solomon Ailan long dispela tripela mun em i bin stap, papa bilong em i tok. Em i bin helpim wanpela man long lusim gan bilong en long sampela taim igo pinis. Tupela papamama bilong en i tok sori igo long wanpela pikinini bilong tupela tasol.

Tupela i kisim stori nogut bihain long Komisina Keelty i bin toksave long tupela long indai bilong pikinini bilong tupela long 7 kilok long Trinde moning 4-pela aua bihain long dai bilong Dunning.

"Em igat strongpela bel long wok," papa bilong em i tok.

"Em i wanpela isipela mangi na em i wanpela fit mangi. Em i save pilai kikkoksing tu," em i tok.

Adam i wok wantaim Australia Protective Service long tukautim palamen haus. Na pastaim long dispela, em i bin wok long Is Timor olsem piskipa olsem graun kru long nambawan taim ol Australia Ami bin pundaun long hap long 1999.

Mama bilong em i tok: "Em i strong na fit."

"Tasol wanpela gutpela samting long Adam em olsem em i gat gutpela tingting, pasin bilong rispek

na bel isi." Mama bilong em i bin tokim A Current Affair.

Tupela wik igo pinis, Adam i bin kisim wanpela setifiket long bosmeri bilong ol long wanpela gutpela wok long rausim dispela gan long dispela man. Papa bilong Adam i tok em i bin ring long ples na tokim ol long dispela samting tupela mun i go pinis.

Na dispela em pes na las taim em i bin ring. Bihain long dispela,

lus tingting insait long RAMSI famili na bai lukluk long em olsem wanpela top man bilong mipela.

Planti man i bin sori tru long dispela dai bilong Adam.

Praim Minista bilong Australia John Howard, Foren Afeas Minista Alexander Downer na PNG Foren Afeas Minista Sir Rabbie Namaliu bungim tingting na tok dispela kain pasin em rabis tru.

Mista Howard i tok taim planti i amamasim krismas, sampela i ken sori na wari tu long kain taim olsem. Long dispela em i tok sori igo long ol sampela gutpela wok ol lain bilong ol i wokim olsem ol wok bilong ol welfare ogenaesisin long ol kain taim olsem long helpim ol narapela komyuniti long taim bilong ol long hevi.

"Ol memba bilong Australian Ami na Federal Polis i wokim planti helpim long ol narapela hap kantri long pait bilong terorism na korapsen na helpim kantri bilong mipela long Iraq, Solomon Ailan na arapela hap tu insait long wol.

"Wan wan bilong ol dispela lain i wok long kamapim gutpela nem bilong mipela na mi laik olgeta Australian long givim tingting long ol dispela lain wantaim ol famili bilong ol long spendim Krismas long narapela hap.

"I dai bilong plis opisa Adam Dunning tupela dei igo pinis i soim sampela hap mak we ol Australian i save bungim long olgeta dei.

"Mipela i wokim planti ol gutpela wok long Solomon Ailan na mipela i no ting kain hevi olsem bai bungim mipela," em i mekim dispela toktok olsem Krismas toksave bilong em long ABC televisen.

Long pasim tok sori bilong PNG igo long dai bilong polisman las wik, Sir Rabbie i tok: "I no gutpela pasin long rausim laip bilong yangpela polis opisa long wanem em i givim laip bilong em yet long ol pipel bilong Solomon Ailan."

Em i askim olgeta gutpela man na meri bilong kantri Solomon Ailan long helpim ol lo man na putim dispela trabel man igo long han bilong lo long mekim save long em.

Em i tok tu olsem dispela dai bilong polisman i no inap poretim wok bilong RAMSI long wok bilong ol, long kamapim gutpela sindaun insait long kantri na strongim wok bilong lo na oda insait long kantri.

Long dai bilong polisman, samting olsem 100 soldia bilong Australia nau istap pinis long Solomon Ailan long lukautim ol polisman na polismeri long wok bilong ol. Dispela em long soim olsem ol ino inap pret long dispela ol pasin birua i wok long kamap.

Senato Ellison i tok sekyuriti bilong ol polis husat i wok long dispela RAMSI program bai ol i lukluk na stretim long wanem dispela wok bilong ol i mas i go het yet.

Royal Solomon Ailan Polis Bill Morrell i tok dispela narapela namba bilong ami bai skruim wok bilong RAMSI na toksave long ol komyuniti olsem dispela kain hevi em wanpela birua we planti ino ting bai kamap long em. Na dispela ino join wantaim wanem samting i bin kamap long taim bilong belhat.

Mista Downer i tok ol i no pret long dispela birua long wanem mipela bai wok strong long daunim dispela hevi long painim ol trabelman.

Lukluk igo bek long 2004 wantaim Jada...





Bisnis bilong Groim Diwai insait long PNG - Ol hevi bilong renfores menesmen

Ol hevi bilong polisi

Foresta husat i save menesim ol renfores i gat hevi bilong teknikal na ikononik sait (ol diwai oli no inap long salim, ol samting i save kamapim bagarap na hevi bilong gutpela gro bilong diwai), tasol i gat sampela hevi tu long gavman polisi.

Ol Gavman polisi i gat ol hevi i karamapim ol hevi we i ken stret kwiktam na i gat hevi we i mas i gat plening long longpela taim bihain bai i ken stret.

Holim graun em i wanpela arapela hevi. Long planti kantri insait long tropiks ol politikel unit insait long kantri em bikpela bilong ol kain kain pisin bilong bipo we ol i save pait long graun. Graun i save stap wantaim ol lain i bin sindaun long graun long bipo yet. Olsem na sapos gavman i laik makim hap graun i go long forestry, ol i mas baim o ol i mas askim ol wanwan hauslain o pisin long makim graun bilong stap renfores. Menesmen long ol dispela hap renfores nau i stap wantaim gavman forestri sevis.

Dispela kain hevi bilong graun i save pasim wok long ol bikpela hap graun i gat renfores long en.

Long ol kantri we gavman i baim bikpela hap graun, ol hevi i save painim menesmen bilong diwai insait long renfores i save kam long rait bilong ol as ples manmeri bilong mekim wok gaden, painim abus na bungim ol liklik na bikpela samting tu.

Insait long ol kantri we i gat bikpela hap renfores yet, ol i save bungim yet hevi i stap taim ol i laik mekim wok fores menesmen taim hap bilong fores i save op bilong ol man bilong sindaun long en. Taim dispela kain developmen i save bagarapim ol renfores risev, olgeta lain i wok insait long forestri i mas wok bung long fukautim hap renfores i stap inap bihain taim we ol lain i ken yusim. Tasol maski i nogat hevi i pundaun antap long ol renfores risev, taim namba bilong ol

timba i go antap, namba bilong diwai i ken i go daun na bikpela hevi moa bai kamap na bagarapim wok menesmen bilong yu.

I gat ol arapela bikpela hevi bilong polisi i stap tu. Long sait bilong taim bihain, i luk olsem moa renfores hap bai i kam aninit long menesmen olsem ol plantesen. Laik bilong graun bilong wok agrikalsa na strong bilong wanwan kain diwai i save groa insait long ol plantesen bai kamapim dispela senis. Askim nau em long taim bilong senisim ol dispela samting insait long renfores menesmen long netsereel groa bilong diwai yet i go long menesim groa bilong ol diwai.

Netsereel rijeneresen tritmen i ken kamap long mani i kam long ol diwai ol i katim long nambawan bikpela renfores. Sanapim bilong plantesen i gat bikpela hat wok long en na mani yu ken kisim bai i mas stap long mak bilong groa bilong plantesen.

Mipela i mas skelim gut hevi long mani na mak bilong winmani bilong groim bek diwai long laik bilong em yet na pasin bilong groim long plantesen bilong wanem namba bilong ol manmeri i wok long go antap nau na askim bilong timba na long taim makim bilong ples bilong groim diwai na sanapim plantesen.

Bungim toktok

I mas i stap long tingting tu long painim rot bilong stretim ol hevi bilong renfores menesmen (olsem politikel, ikononik, teknikal na silvikaisarel) olgeta dispela samting i save apim prais bilong katim timba i kam long ol menesmen renfores eria, maski timba i kamaut i wok long strongim developmen bilong kantri na apim mak bilong mani i kam long eksport.

• Neks wik - Diwai Bisnis bai statim wanpela nupela hap paitim toktok long planim na strongim bek ol renfores eria.

McCarthy & Associates (Forestry) Pty. Ltd.

National & International Forest Consultants

mccaf@datec.net.pg

"Long kisim tok stia long olgeta wok diwai"

Helpim ol projek



• Wanpela mausman bilong PNGSDP (lephan) i lukluk long mausman bilong wanpela grup i kisim helpim i sainim pepa. Foto: MAISAN PAHUN

Maisan Pahun i raitim

PAPUA Niugini Sustainable Development Program Limited (PNGSDP) i wanpela non gavman ogenaiesen (NGO) we i save givim helpim mani i go long ol developmen wok helpim insait long ol komyuniti long kantri.

Long dispela yia (PNGSDP) i givim mani mak klostu olsem K539, 000 i go long helpim tripela ogenaiesen long kamapim ol projek na sapatim wok bilong sevimi ol pipel.

Long wanpela saining seremoni Sief Eksekutiv Opisa bilong PNGSDP, Robert Igara, i bin sainim ol pepa agrimen wantaim ol mausman bilong Pot Mosbi Jenerel Haus Sik we PNGSDP i givim K98, 430 bilong stretim bilong "Mateniti Wing" long haus sik.

Badili Vokesinel Senta i bin kisim K199, 545.36 long mekim wanpela klasrum na long wankain taim helpim ronim skul bilong ol. Fred Hollows

Foundation i kisim K241, 400 we i go long "PNG Eye Program" we ol bai i yusim long baim wanpela masin bilong stretim ai bilong ol manmeri husat i gat sik long ai, insait long kantri.

Mista Igara i tok dispela ol projek bai i bikpela na i gutpela we bai i helpim ol pipel long kamapim gutpela sindaun long laip bilong ol. "Long promotim gutpela sindaun bilong ol komyuniti insait long kantri PNGSDP i kamapim wanpela developmen program we bai givim K50, 000 i go K250, 000 long ol projek wantaim ol komyuniti ogenaiesen na developmen long komyuniti level," Mista Igara i tok.

Dispela wok mani bai PNGSDP i givim aut neks yia taim ol ogenaiesen i salim proposel na ol pepa we i soim ol i laikim mani long kamapim wanpela projek o samting we i ken helpim olgeta manmeri insait long komyuniti.

PNGSDP i wanpela kampani we i bes long Pot Mosbi na i gat 7-pela bod of dairektas husat i save ronim na mekim disisen bilong kampani.

Nu Silan Hai Kot rausim hap han kampani bilong RH

Maisan Pahun i raitim

Hai Kot long Nu Silan i rausim kontrak bilong wanpela hap han kampani bilong wanpela bikpela kampani we i save katim na salim diwai, Rimbunan Hijau (RH) long Nu Silan long no ken kisim ol diwai i kam long Papua Niugini.

Kampani LumberBank i no bin inap long tanim New Zealand Timber Importers Association (NZTIA) disisen long rausim membasip bilong ol.

Man bilong kempen long Greenpeace, Stephen Campbell, i sapatim dispela kot disisen na i tok, "Dispela stop kot long Nu Silan i putim long kisim diwai bai givim hevi long ol RH husat i save kisim timba long Papua Niugini.

Las mun Fores Minista bilong Australai i tok orait long Greenpeace stopim wanpela Brisbane bes

RH kampani long kism ol fores long PNG we ol kampani na fores atoriti long PNG i no save bosim gut long laik bilong ol papagraun.


Long Netherlands insait long Yurop, RH i bin salim wanpela pas i go long Greenpeace Intanesenel long kotim ol long bagarapim nem bilong RH kampani.

Long dispela pas RH i laikim Greenpeace tok sori long wanpela ripot ol i kolim "The Untouchable-Rimbunan Hijau's World of Forest Crime and Political Patronage." RH i laikim Greenpeace rausim dispela ripot long go long ol pablik na givim RH nem bilong ol lain husat i kisim dispela ripot pinis.

"Ol RH i mas luksave long ol rong ol i wokim long fores na noken traim long sutim tok long Greenpeace," Campbell i tok.

Cat D3G, D4G, D5G, Track-Type Tractors

Rugged construction, outstanding reliability - everything you expect from Caterpillar and more!



Outmanoeuver every job you tackle.

A single lever joystick controls speed, direction and steering on Cat® "G" Series III Hystat Track-Type Tractors. Full powerturn capability is made possible by maintaining power to both tracks at any ground speed or turning radius.

- **Power Train** - Offering powerful six-cylinder Cat® 3046 engine that provides the power you expect from Cat tractors, and the productivity you need to increase your profitability.
- **Undercarriages** - Undercarriages are rugged with strong, durable components for long wear life and lower costs.
- **Operator Stations** - Excellent visibility down to the cutting edge, ergonomically designed controls and fully adjustable armrests for optimum comfort and productivity.

Hastings Deering



PORT MORESBY
Phone: 300 8300
Fax: 325 0141

LAE
Phone: 472 2355
Fax: 472 1477

TABUBIL
Phone: 548 9045
Fax: 548 9155

RABAU
Phone: 982 1244
Fax: 982 1129

Wantok Niuspepa Kalaring Kompetisen Toksave

Yu mas kalarim dispela piksa long ol arapela pikinini bilong narapela kantri. Atis bilong mipela i helpim yu pinis na kalarim yangpela meri Sajna. Nau em taim bilong yu long pinisim ol arapela piksa.

Taim yu pinis, raitim nem bilong yu, pos opis bokis adres bilong yu na krismas bilong yu na salim i kam long:

WANTOK NIUSPEPA
P. O. Box 1982
Boroko 111
NCD
Papua New Guinea

YUMI FM
Locked Bag 93
Port Moresby, NCD

Ol jas bilong *Wantok Niuspepa* na *Yumi FM* bai skelim sapos piksa i makim stret o i kam klostu long wanem piksa i makim. Yu bai gat sans long winim ol gutpela prais bilong yu long skul neks yia. Mama papa bilong yu i ken helpim yu long givim bekim long ol askim daun bilo.

Bihain long yu pinis, mipela i taikim helpim bilong yu. Plis givim bekim long ol dispela askim:

- Ples mama karim yu?
- Nau yu stap long wanem provins?
- Husat i baim niuspepa?
- Ol i baim niuspepa long wanem hap? (stua, maket, bas stop?)
- Yu laikim wanem samting insait long *Wantok Niuspepa*?
- *Wantok Niuspepa* i lukluk long statim wanpela pes bilong ol pikinini long neks yia. Nau mipela i laik save, yu laik lukim wanem samting insait long ol dispela pes bilong pikinini?

Lo bilong dispela resis:

- Yu mas aninit long 18 Krismas
- Yu yet i mas kalarim dispela piksa
- Yu ken yusim kala pensil o wanem samting wantaim naispela kala
- Yu mas katim na salim i kam long opis bilong *Wantok Niuspepa* na *Yumi FM* pastaim long Janueri 13, 2005.
- Bihain long yu kalarim dispela piksa, yu mas bekim ol askim antap bilong helpim *Wantok Niuspepa*.
- Yu i ken harim *YUMI FM* o lukim nem bilong yu long *WANTOK NIUSPEPA* long Janueri 20th, 2005 long laiv draw sapos yu win o nogat.
- *WANTOK* na *YUMI FM* yet bai glasim olgeta entri long dispela resis na makim ol wina.

UN RALCLDR SD

Hey ol KALARING KOMPETISEN pikinini!

Yu gat sans long winim wanpela SKUL BEG wantaim ol buk na pensil, ruler i stap insait na i kam long ...



...Na tu yu gat sans tu long winim moni bilong skul fi I KAM LONG...



So kamon ol pikinini, em de bilong yupela "INTANESENEL DE BILONG OL PIKININI" Em de bilong amamas!!
Ol pikinini ananit long 18 krismas i ken stap long dispela resis.



NEM.....KRISMAS.....

SKUL.....PLES:.....

ADRES:.....TELEPON:.....

Ol winas bai ol i anaunsim long taim bilong laiv draw long YUMI FM na WANTOK NIUSPEPA long 20th Mun Janueri, 2005

Salim kalaring kompetisen i kam long:
WANTOK NIUSPEPA P.O.Box 1982, Boroko,
NCD,Papua New Guinea

YUMI FM, Locked Bag 93, Port Moresby, NCD

Wantok Niuspepa i lukluk long statim wanpela pes bilong ol pikinini long neks yia. Nau mipela i laik save, yu laik lukim wanem samting insait long ol dispela pes bilong pikinini?



• Ol meri Trenspot na Leba Dipatmen i traim strong long Nesanel Kapitel Distrik Pablik Sevens Netbol Kompetisen. Dispela Sarere ol dispela pilai bai i no inap kamap long wanem em Niu Yia De.



• Aia mama mi ya! Dispela Joha i tok taim em i kisim han long narapela pait-man long taim tupela pait long Lamana Gol Klab las wik.




• Ol Bears i soim nupela yunifom bihain long nupela sponsa, Airways Hotel, i sponsaim ol. Lukaut long ol wantaim kain sapot ol i kisim.



• Bai yu go we! Leba meri i traim olgeta rot long noken larim Trenspot meri i sutim bal i go insait long ring bilong em.



• Morata Eagles pilaia (lephan) i pasim olgeta rot bilong Gaden Hill pilaia long pilaim bal. Tupela i pilai long Okkaihen ov sisen ragbi lig resis.



• Givim siksti- Airways Bears pilaia i ron bihain long em i hamarim gut bal bilong Elcom long Pot Mosbi sofbol resis.

Pakistan stap long mak bilong hevi

OL HANGRE Australia i was tasol long winim narapela Tes siris bihain long ol i wok hat long kam bek na nekim gut Pakistan long namba tri de bilong pilai.

Tupela i go pinis i luk olsem Australia bai lus long wanem Pakistan i hamarim ol gut. Tasol kikbek bilong em Pakistan i kisim taim.

Ripot i tok olsem olgeta gutpela wok bilong Pakistan i pinis long nau taim we Australia i wok long kam gut wantaim kepten Ricky Ponting husat i go pas long ol. Nau yet Pakistan i go pas wantaim 2-0 siris.

Tupela gutpela batsman bilong Australia Damien Martyn na Adma Gilchrist i kamapim sampela ol gutpela pilai we long taim Martyn i bung wantaim Gilchrist namba bilong ron i sanap olsem 5-203.

Gilchrist i pilai gut inap taim lek spina bilong Pakistan Danish Kaneria i autim em taim em i mekim 48 ron. Tasol poroman bilong em Martyn i mekim gut inap taim em i kamap na abrusim 100 ron inap long em i mekim 142.

Dispela em i namba 6 taim bilong Martyn long mekim 100 ron.

Long taim Martyn i wok long paitim gut bal na Jason Gillespie i boul gut olgeta rot bilong Australia i luk orait long win.

Long sait bilong ron Australia i go pas wantaim 38 ron. Taim Australia i mekim 379 wantaim faivpela wicket Pakistan wantaim 5-peta wicket i mekim tasol 85 ron.

Long kain pilai olsem planti manmeri i bilip strong bilong Pakistan i pinis.

"Dispela em i bikpela de long lukluk bilong tim. Dispela i save helpim taim ol teilender i ken sanap strong wantaim ol batsman we mipela i ken kamapim gutpela wokbung. Em i hat long ol. Mipela i laik kamap long mak we ol i stat na traim long abrusim mak bilong ol. Sapos mipela i mekim olsem em i gutpela moa," Martyn i tok.



• Kepten bilong Australia, Ricky Ponting, i tromoi bal i go antap bihain long em i holim pas bol kepten bilong Pakistan Yousuf Youhana i paitim.

Olgeta dispela taim Australia i wok long ting olsem Pakistan bai rekim olgeta samting long sait bilong ol na win.

Na sapos ol i win dispela i min olsem ol bai mas yusim olgeta gutpela pilai bilong ol. Sapos dispela tingting i tru ol i inap long win. Tasol abrus na sampela bagarap i kamap long kem bilong ol we i lukim Abdul Razzaq i sik na Shoaib Malik i kisim bagarap long han bilong em.

Dispela kain hevi i mekim Pakistan i stat long go daun.

Bikos long kain hevi i kamap long Pakistan dispela i min olsem Australia i go stret na i no inap bungim hevi nau long

dispela taim we tupela boula Glenn McGrath na Shane Warne i wok long tromoi bal gut.

"Yu oltaim go long hap long putim bilip long yu yet long strong yu gat na long wanem samting yu redi long em," narapela Australia boul meri Jason Gillespie i tok.

"Mi save wanem samting bai kamap oltaim mi go long bet, bilong stap na long wok bung wantaim wan pilai. Taim yu mekim olsem yu ken lukim klia het bilong ol birua pilai bilong yu bai go daun," em i tok. Em wok bilong Pakistan long traim pilai gut gen long go pas.

Hatwok karim kaikai

EUAN Walters i no wanpela biknem pilai bilong golf long Australia tasol bihain long planti hatwok na ol wok i karim kaikai.

Long las wik tasol em i winim Aus\$1 milien taim em i pilai long Jacob's Creek Open tonamen long Kooyonga long Australia.

Nau em i tingting long go pilai long US (Amerika) PGA tua. Dispela US PGA tua i save mekim planti manmeri i save kamapim milienea long wanwan yia.

Pastaim long dispela Walters i save pilai long ol tonamen we prais mani bilong ol i stap tasol long Aus\$250,000.

Walters i traipela man na hevi bilong em i stap olsem 126 kilo grem tasol long taim em i laik pilaim dispela Jacob's Creek Open em i daunim dispela hevi i kam daun long 86 kilo grem.

"Stap turangu (noken kaikai) i wanpela gutpela wei bilong daunim wet," Walters i tok taim em i tok long hevi bilong em long skel.

Tasol nau yet hevi bilong em i go antap gen long 95kg tasol em i tingting long mekim sampela samting long daunim long narapela tripela wik bipo long em i statim namba wan pilai long Amerika Open.

Em bai statim dispela wokabaut bilong em long ol pilai bilong Amerika long Hawaii Open long namel bilong mun Januari, 2005.

Long pinis namba tu bihain long wina

bilong Australia Open Richard Green..

Long pilai long ol bikpela golf pilai bilong Amerika pilai i mas winim ol pilai we prais bilong ol i stap long milien dola na dispela Walters i no bin winim inap las wik em i winim na dispela i givim em tok orait long pilai.

Em i gat plen long ol pilai em i laik mekim long 2005.

"Mi lukluk long stap namel long top 30 pilai we dispela i ken helpim mi long pilai long ol tua," Walters i tok. "Mi mas pilai gut moa long wei mi save pilai bipo."

Walters i stat long mekim nem long golf long 2000.

Em i wok long pilaim Saut Australia Open taim meri bilong em Viktoria i go long karim pikinini. Em i kisim balus na go bek long Melbourne, lukautim meri bilong em na bihain palai i go bek long Adelaide we em i mekim namba tu ti-ov we sevenpela minit i stap yet long pilai i pinis.

Bihain em i go bek long Melbourne we em i lukim pikinini boi bilong em, Joshua husat mama i karim long 4 kilok apinun.

"Mi kisim blessing long mi gat naispela meri na tripela naispela pikinini," Walters i tok.

"Mi kisim olgeta samting mi laikim long en maski wanem samting i pasim mi. I moa gutpela mi olsem turangu wantaim ol moa long mi no stap wantaim ol, tasol em i gutpela tu sapos mi mekim sampela gutpela mani," em i tok.

Farina gat bikpela wok long mekim

AUSTRALIA socceros kosa Frank Farina i gat bikpela wok long mekim.

Nau yet planti ol pilai bilong Australia i gat hevi.

Australia i no kwalifai yet long go insait long wol kap na em i bikpela driman bilong ol long go insait.

Na wantaim ol gol kipa, fulbek na ol fowet i no mekim gut planti manmeri i wari sapos Farina inap long mekim gut wantaim kain tim we ol pilai i gat hevi long ol.

Tasol maski long dispela ol wari bikpela tingting bilong ol manmeri em long lukim olsem Farina i mas traim tim bilong em na senisim ol pilai.

Tasol long senisim ol pilai dispela em kain man olsem Farina i no inap mekim long wanem taim i sot tumas.

Long em long stap insait long nesenelel skwat pilai i mas stap insait long skwat klsotu wanpela yia. Dispela bai i no inap tru sapos em i laik senisim ol pilai nau. Ol bikpela pilai long tukim ol kantri i kwalifai long go insait long 2006 Wol Kap pilai bai stat long Febuari, 2005 na go.

Wol Kap pilai bai kamap long Jemeni. Nau yet ol manmeri i ting Farina i mas i gat bilip long 4-pela midfila pilai em-Marco Breciano, Tim Cahill, Josip Skoko na Jason Culina.

Dispela 4-pela pilai em ol manmeri i ting i ken stap wantaim ol nupela pilai.

Ragbi lig pilaia kisim tambu marasin

TUPELA Ingran ragbi lig pilaia husat i stap long Leeds Rhinos ragbi lig klab we ol i save pilai long Ingran Supa Lig na long dispela sisen i winim gren fainol em ol opisel i painimaut olsem ol i kisim tambu marasin na pilai long sait bilong Ingran wantaim Australia.

Dispela marasin em ephedrine.

Keith Senior na Ryan Bailey em ol opisa i sasim tupela long baim asua bilong ol long Aus\$3750. Long dispela tupela i mas baim hariap Aus\$1500.

Long taim ol opisa i wok long askim tupela long wanem we tupela i kisim tupela i bekim na tok tupela i kisim long was long tupela long noken kisim kus.

Wanpela bilong tupela em ol opisa i save taim em i wok long pilai long Supa Lig na narapela long taim Ingran i pilaim Tes siris wantaim Australia na Niu Silan.

Long taim ol opisel i wok long lukluk long ol wei wea ol bai mekimsave long tupela na lukluk long ol lo bilong Intenesenelel Ragbi Lig dispela i soim olsem i tru ephedrine i marasin i gat tambu long em tasol i no min olsem ol pilaia i mas pinis long pilai olsem mekimsave bilong ol sapos ol i kisim.

Mekimsave bilong kisim dispela marasin em ol opisa bai givim tok lukaut na sapos ol pilai i mekim gen orait ol opisa i ken mekim narapela kain mekimsave ol i kamapim tingting long mekim.

Sapos stori bilong ephedrine i min olsem em i wanpela tambu marasin orait ol pilaia bilong Australia bai stap long trabel long wanem Australia i no lukim ephedrine olsem em i stap aninit long nem bilong tambu.

Senior em i wanpela man husat i kempein strong trai-nesen siris na Bailey i pilaim foapela bilong ol faivpela gem olsem senis pilai.

Stephen Rutherford, yangpela Gateshead Thunder olsem fowet i yusim wankain banis long ronowe long mekimsave bilong Nesenel Ragbi Lig resis.

Ingran Ragbi Futbol Lig eksekutiv siaman Richard Lewis i tok dispela tripela asua i soim olsem ol lig i mas mekim planti ol kempein long mekim ol pilai i luksave long ol kain marasin we ol i no ken kisim.

Navratilova bai pilai long Australia

MARTINA Navratilova i kamap long Australia long Tunde we em bai statim 30 intenesenelel profesinol tennis pilai bilong em.

Navratilova nau i gat 48 krismas.

Pastaim long dispela em i pasim ol plen long pinis long pilai tennis moa gen bihain long Olimpik Gems tasol nau i senis na i laik pilai.

Em bai pilai wantaim Daniela Hantuchova bilong Slovakia husat i gat 21 krismas.

Navratilova i winim 58 Gren Slem taitol we long narapela wik em bai pilai long Gold Coast 2005 singel taitol.

"Em i tok las yia em laspela yia bilong em, tasol em i pilai yet long wanem em laikim tennis na em i pilim olsem em i gat sans long win," Gold Coast tonamen dairekta, Liz Smylie i tok.

Hantuchova i wok long pilaim Hopman Kap long Perth, tasol bai bungim Navratilova long Sydney Intenesenelel stat long Januari 10 na Australia Open stat long Januari 17.

Navratilova bai pilaim dabol na miks dabol wantaim meri India, Leander Paes long Australia Open.

Long 2003 Paes wantaim Navratilova i bin pilaim Australia Open na win na Wimbledon miks dabol taitol.

Dispela em i 20 win bilong Navratilova long winim Wimbledon taitol.

Long dispela yia em i winim wanpela taitol na dispela taitol em winim wantaim Lisa Raymond long Vienna, Austria.

Long Gold Coast Navratilova bai dabol wantaim Nathalie Dechy bilong Frans.

Dechy i wina bilong 2003 Gold Coast singel taitol.

Planti manmeri bai kamap long lukim Navratilova husat wanpela taim i gat bikpela nem long tennis long ol planti win em i save mekim.

Tambu na kosa i bung wantaim Apo famili gen

James Kila i stori long wanpela olupela ragbi lig kosa na tambu man bilong Goroka.

WANPELA spesel famili bung-wantaim i bin kamap long Seigu Ples insait long Goroka taun las wik i go pinis.

Kumul kepten na star pilaia bilong PNG nau i stap pilai long Ingran, Stanley Gene, i bin stap tu long dispela liklik famili bung. Gene i amamas tru long stap na bung wantaim wanpela olupela kosa bilong Goroka husat i gat nem long bringim kamap gem bilong ragbi lig i go strong long ol yia olsem 1970s.

As tru bilong dispela bung em long tok welkam na amamas long kam bilong wanpela tambu o man husat i bin stap wantaim wanpela famili bilong Seigu longpela taim insait long 1970 taim dispela man i bin stap wok long Goroka taun.

Nem bilong dispela tambu man bilong Nu Saut Wels long Australia em Doug Nuy. Dispela man i marit long Rita Black, pikinini meri bilong wanpela strongpela kolonial masta John Black husat i bin kirapim Goroka na Isten Hailans provins long ol yia insait long 1950s na 1960s. John Black i stap long rekot olsem wanpela strongpela man wantaim ol lain olsem Jim Taylor na Jim Leahy husat i go pas long kamapim bisnis na kirapim Hailans rijon.

Dispela man Doug Nuy i bin go wok long Goroka olsem wanpela ilektrisen o man bilong stretim ol pawa lain na ol wok long ol haus bilong ol kirap na kolonial edministresin long Goroka. Taim em i bin stap long Goroka em i bin pilai ragbi lig wantaim Norths. Long dispela taim planti waitman i bin pilai long tim na sapot long ragbi lig i bin bikpela tru long dispela taim.

Taim Doug Nuy i bin stap long Goroka em i bin maritim Rita Black. Dispela pikinini meri em wanpela bikman tru bilong Isten Hailans provins pastaim, Apo Genori i bin lukautim i



• Doug i putim han antap long Stanley long Seigu ples long Goroka long tupela wik i go pinis.

Ol foto: JAMES KILA

go bikpela na i kamap olsem pikinini meri bilong em. Rita i save long tokples bilong Goroka em Gahuku gut tru. Taim Rita i bilas long pasin tumbuna bilong ples em i save kamap

smat tru.

Planti ol mama long Seigu Ples i save stori yet olsem Rita em olsem wanpela meri Papua Niugini stret bikos em i save tok ples gut tru dispela tokples bilong Goroka hap em Gahuku na planti lain i save laikim em tru.

Taim Doug Nuy na Rita Black i marit ol i bin gat tupela pikinini. Wanpela em pikinini man na nara-pela em pikinini meri. Pikinini man bilong Rita wantaim Doug em nem bilong em David na em wanpela ragbi yunien pilaia long Balmain klostu long Sidney, Australia.

Doug Nuy i stori olsem long dispela taim ragbi em olsem wanpela bikpela samting namel long ol lain wait komyuniti na tu ol lokel man insait long Goroka taun.

Bihain long em i pilai wantaim Norths Doug i bin go kamap olsem kosa bilong Brothers Klub long Goroka. Long dispela taim Doug i bin gat nem long kamapim sampela ol biknem pilaia husat i bin go na makim kantri long PNG Kumuls. Sampela bilong ol dispela biknem pilaia em Paul Kombinari, Himoni Lapiso, Joppa Gomia na tu ol lain olsem Mewie Launa.

Planti lain i stori olsem Doug em wanpela strongpela na hatpela kain kosa husat i save givim fea disisen long makim husat i ken pilai. Long dispela taim tim bilong em Brothers i bin wanpela pawa haus tim insait long Goroka na PNG tu wantaim.

Bung wantaim Kwin Elizabeth
Long 1974 taim Kwin Elizabeth

wantaim man bilong em Prins Philip (Duke Of Edinburgh) i bin kam mekim lukluk raun bilong ol long Goroka ol bikpela lain long gavman haus long Mosbi i bin salim wanpela spesel pas o invitesin i go long Goroka long tok-save olsem dispela bikman bilong Isten Hailans Apo Genori i mas go sindaun na kaikai wantaim Kwin. Tasol turangu long dispela taim lapun Apo i bin dai pinis

Long makim Apo famili, Doug Nuy yet i ogenaisim na baim siot na trau-sis na su na i karim pikinini man bilong Apo nem bilong em Jackson long go na bung na kaikai wantaim ol dispela lain Royal famili bilong Ingran. Nau yet Jackson Apo em wanpela speselis dokta long Goroka Bes Haus Sik long Goroka. Jackson i stap yet lukautim ol samting bilong papa Apo long Seigu.

Stori bilong Apo Genori

Wanpela feveret meri bilong Apo Genori husat nau i stap yet mama Emma i stori olsem man bilong em Apo em wanpela kain spesel man namel long olgeta meri bilong em long kain gutpela pasin em i save mekim.

Tasoi wanpela bikpela samting tru long Mista Apo em olsem em i nambawan man tru insait long Hailans rijon long go insait tru long wok bilong kopi bisnis. Em i bin kirapim nambawan kopi plentesen bilong em yet na kisim mani long en.

Dispela plentesen pastaim i bin stap long hap graun nau ol Hausing Komisen haus long Seigu i stap Strit long Goroka taun nau i stap long en.



• Doug i sindaun na lukluk long ol hap ples we bipo em i raun long em. Em i amamas long bungim gen ol olupela poroman.

2004, gutpela yia bilong spot

...Planti stail pilai, planti rekot bruk, tasol i gat ol hevi tu i stap yet

Paul Zuvani i raitim

LONG lukluk bek long 2004 spot yia mipela i ken tok dispela yia i bin gutpela. Planti ol manmeri i amamas long ol kain wok na pilai i bin kamap. I nogat planti ol hevi. Tru i gat sampela ol hevi olsem PNG Kumul i no kamapim gut pilai wantaim Australia Kangaroo na dispela i no asua bilong ol. I gat ol hevi tu long sait bilong edministresen we i as bilong dispela. Klostu olgeta spot i gat hevi bilong mani na dispela hevi bilong mani em kantri i gat long em. Tasol putim dispela ol samting long sait long bikpela lukluk yumi ken tok 2004 i bin gutpela yia bilong spot. Long stat long toktok yumi lukluk long sampela ol bikpela pilai:

Ol pilai: Olimpik Gems- Aten, Gris

Liklik Olimpik tim bilong yumi we i gat wetlifita Dika Toua, swima Ryan Pini, ronmeri Mae Koime na hedola Mowen Boino i stap long em i bin brukim ol rekot na kamapim ol nupela mak. Bihain long dispela pilai Toua husat i apim ain long 53kg divisen i bin brukim PNG nesanel rekot, Osenia na i sanap namba wan long Komenwel Gems long divisen bilong em. Dispela em bihain long Indian Sanamacha Chanu husat i go pas long Komenwel rekot em Olimpik Komiti i painim asua long em i kisim marasin we i tambu long kisim. Toua i wanpela bilong namba wan bes 13 lifta long divisen bilong em. Bihain long Olimpik Gems em i sanap

bikpela resis we em i save soim tru strong bilong em.

Em i namba wan taim PNG i no inap salim planti spotmanmeri long wanem ol pilai i no kwalifai long go. Moayet em i namba wan taim PNG i salim yangpela tim. Dispela 4-pela etlit em krismas bilong ol i stap long 24 na kam daun.

Gavana Jenerel Sir Paulias Matane i makim Gavman na ol pipel we em i tok welkam na givim tok amamas i go long dispela 4-pela etlit long Gavman Haus.

Ragbi lig Tes Mes

Australia Kangaroo pilaim PNG Kumul

Dispela pilai i bin kamap long Oktoba 9 long Townsville, Australia, we i lukim Kangaroo i brukim han bilong Kumul 70-22. Planti manmeri i wari tu long ol pilai i stap long Kumul skwat long wanem i nogat ol biknem pilai olsem Marcus Bai, Adrian Lam, David Wesley o John Wilshere i stap na tu pastaim long ol pilai i kamap i gat ol toktok olsem Kangaroo i no ken pilaiam Kumul long wanem standet o mak bilong Kumul i daun bilo. Tasol maski long dispela pilai i go het we i lukim Australia i win. Long dispela pilai tu tupela brata i kosa - bikpela brata Wayne Bennett i lukautim ol Kangaroo na Bob Bennett i lukautim ol Kangaroo. Bihain long pilai Wayne i tok PNG inap kamapim ol gutpela sapos em i em i kamap planti long ol kain bikpela pilai.



• PNG Olimpik tim wantaim Gavana Jenerel Sir Paulias Matane na meri bilong em Ledi Claudia long Gavman Haus. Baksait long lephan em Mowen Boino na Ryan Pini. Fran em Dika Toua na Mae Koime.



• Kumul prop Andrew Norman i sambai long helpim wan pilai bilong em long pasim Brendon Tate bilong Kangaroo. Kangaroo win 70-22.

nau long namba 7 ples.

Na swima Ryan Pini i sanap namba 4 ples long 100m bataflai resis long Komenwel Gems. Pini i brukim nesanel na Saut Pasifik Gems rekot long 100m bekstrok na 100m bataflai resis. Long Olimpik mak long 100m fristail Pini i stap 39 ples na long 100 bataflai em i stap long 18 ples.

Na PNG 100m ronmeri Mae Koime i brukim PNG rekot namba 4 taim long dispela yia we em yet i bin kamapim dispela ol rekot. Koime i kamap long 12.00 sekens long Olimpik resis bilong em. Em i kamap namba siks ples long hit bilong em. Ol olpela rekot bilong Koime em 12.16 seken long Thailand, Australia 12.14 na Hangeri 12.12.

Hedolman Boino i kamap long 50.97 sekens long resis bilong em.

Ekting Presiden bilong PNG Etlek Yunion, Tony Green, i tok husat pastaim long resis i ting Boino bai painim hat long ron tasol bihain long resis i tok Boino i save larim gutpela ol samting inap long laspela

Kikboksing

Bipo Wol Amata Supamidol Wet Kikboksing Sempion, Stanley "Headhunter" Nandex, i lus long Chris "Whitesniper" Johnson bilong Nu Silan long wol profesinel kikboksing taitol long Crowne Plaza. Tasol bihain long dispela pait Nandex i mekim apil na olsem tupela bai bung gen long salens long dispela taitol.

Long wankain taim manki Morobe Katu Arang i winim David Hoy long kisim Wol Feda Wet taitol. Tasol em i lusim gen long pait bilong em long las mun long Australia.

2004 spotman na spotmeri

Dispela tupela taitol i go long swima Ryan Pini na wetlifita Dika Toua. Em i namba tu taim biling tupela man na meri long winim dispela tupela taitol.

Spot polisi

Bikpela spot polisi em long lukim PNG Komisen i bung wantaim PNG Spot Federesen na kamap wanpela bodi. Dispela em long lukim olsem olgeta grup insait long

spot i kisim helpim long Gavman long baset bilong em. Nau yet Komisen tasol i gat ples long kisim mani long baset.

Bihainim tingting bilong Yunaitet Nesen we i tok spot em i samting bilong kamapim dvelopmen na wanbel pasin, Papua Niugini i kamapim nupela spot polisi.

Dispela nupela polisi i lukim long ol pipel long ol i mas i gat gutpela helt, go long skul, i gat bel isi sindaun na i gat tingting long stap long strong bilong ol yet.

Dispela spot polisi- Spot Polisi 2004 na Plen 2004-2008 em Minista blong Komuniti Afeas na Spot Ledi Carol Kidu i tokaut long em taim ol i ridim toktok bilong em long nait bilong 2004 SP Spot Awod.

Long toktok bilong Ledi Carol em i tok kain sindaun long kantri we ol manmeri i pas long ol pasin olsem spak, kisim smuk nogut na i no was gut long bodi bilong ol we ol i kisim sik HIV AIDS isi dispela i givim bikpela wari long kantri.

Long dispela as Dipatmen bilong em i wok bung wantaim ol spot grup na kamapim nupela polisi. Dispela polisi i bilong helpim ol pipel.

"Pasin bilong stap insait long pilai i dvelopim ol yangpela long kamapim gutpela helt long bodi na tingting na mekim ol i wok bung wantaim narapela narapela," Ledi Carol i tok.

"Spot i kamapim sans we ol manmeri i pilai na soim strong, save na opim tingting bilong ol. Moa yet em i tok spot i helpim manmeri long ol i ken painim pasin bilong skelim tingting, wok bung wantaim ol narapela manmeri na rispektim ol yet na ol narapela.

Edministresen


Gavman i makim gen PNG Spot Komisen eksekutiv dairekta John Kambouo stap dairekta gen long narapela 10 pela yia. Kambouo i stat wok long 1992 long dispela opis.

Na long PNG spot Federesen ol opisel i makim gen Sir John Dawanincura olsem jenerel seketeri bilong federesen. Long wankain taim ol i ilektim nupela presiden em Sir Henry ToRobert. Bipo presiden Henry Kila i risain long wok.


Em tasol na Meri Krismas na Gutpela 2005.



• PNG Spot Federesen Presiden, Sir Henry ToRobert, i kisim spot ikuipmen long Australia Hai Komisen mausmeri Louise Freeman. OL FAIL POTO



WANTOK Spots



Morata ragbi lig statim Stet ov Orijin salens

Andrew Molen i raitim

MORATA ov-sisen ragbi lig kompetisen insait long Pot Mosbi i kisim ragbi lig resis bilong ol long narapela level.

Dispela Sande ol bai statim Morata Lig "Stet ov Orijin."

Dispela pilai bai lukim Morata 1 Maroons na Morata 2 Blues i kirapim das long Kone Tigers oval. Long opim dispela ol pilai em bipo memba bilong palamen na spika John Pundari bai mekim.

Ol i gat tripela gem long pilai. Patron bilong lig Rex Paki i tok wina bai kisim wining tropi wantaim K1000 prais moni. Namba tu wina bai kisim ranap trofi na K600 na tim husat i kamap namba tri bai kisim K400.

"Mipela i laik traim strong na save bilong mipela yet insait long Morata long lukim husat i gat strong na inap winim dispela ol pilai," vais presiden bilong lig John Mauwi i tok.

"Oigeta yia mipela i save gat ol krismas pilai we ol lain long ol narapela hap insait long siti i save kam salensim mipela tasol nau mipela i laik senisim na traim mipela yet insait long Morata," em i tok.

Mauwi i tok ol i mekim seleksen bilong tupela tim pinis bilong ol pilaia, kosa na ol narapela ofisel. Husat ol i kisim bagarap o i no pilai gut bai ol i senisim ol wantaim ol narapela pilaia.

Dispela pilai i kirap long tingting bilong presiden bilong lig Billy Yaki na ol narapela ofisel i lukim olsem em i wanpela gutpela tingting na olsem ol i go het long kamapim.

"I gat wanpela wara i brukim dispela tupela ples na husat ol i stap hapsait tasol i save pilai long wanpela tim long sait em i stap o kam long em," Mauwi i tok.

Planti bilong ol pilaia insait long dispela lig em ol i save pilai insait long Pot Mosbi ragbi lig (PRL) kompetisen na long ov-sisen ol i save pasim taim long Morata long strongim.

Sampela pilaia olsem bipo Pot Mosbi Vipers na Lae Bombers pilaia Cedrick Belo bilong Morata 1 Maroons na Presidens 13 ful-bek Nixon Suckling bilong Morata 2 Blues i karim planti eksperiens wantaim ol i kam insait long dispela gem.

"Planti bilong ol pilaia insait long Pot Mosbi kompetisen i lainim ragbi lig long Morata ragbi lig olsem na dispela kompe-



¥Mama mi ya... Moitaka Hawks pilaia i tok taim em i kisim takol long Morata Bullets long Hohola Okkaihens ov-sisen ragbi lig pilai. Kain pilai bai kamap long Morata Stet ov-Orijin pilai long Kone Tigers pilai graun.

Foto: JOE IVAHARIA

tisen i strong tru taim ol i save kam bek na pilai long ov-sisen pilai," Mauwi i tok.

Ol pilaia bilong tupela tim em- Morata 1 Maroons: James Nohou, Mark Timis, Enosi Gewa (Knights), George Kapul (West K.), Bruce Guyer, Allan Titus, Jobby Kay (Raiders), Gola John, Cedrick Belo (Tigers), Peps Johnny, Francis Korowa (Hawks), Jayson Timbi (Warriors), Felix Afuti, Fata


Mugaiso (Eets), Robin Laken (Rangers), Abraham Yobale, Andrew Sigi, Anthony Foi (Talapia), David Nul (kosa), Noni Purite (menesa).

Morata 2 Blues: Nixon Suckling, Peter Ramson, Allan Dicks, Dapsy Buru, Joshua Lapa, Peter Mond, Roland Kalupai, Wesley Jeffrey, Joshua Pore, Thomson Kama, David Waim, Suckling Danage, Ware

Metofa, Kevin Kepas, Paul Tambiaco, Stanley Douglas, Nick Sibi, Robert S-Loo, Koi Wek, Stanley Yakop, Jefferey Luso (Kosa), Benjamin Topaki (meneja).

Mauwi i singaut long ol sapota na ol pilaia long lukautim ol yet long dispela taim bilong Krismas na Niu Yia. Em i tok ol i mas kam sapotim dispela gem we i gat promis long kamap bikipela na gutpela moa.

WIDE VARIETY OF HYBRID VEGETABLE SEEDS



IDEAL TIME FOR PLANTING YOUR FAVOURITE VEGETABLE SEEDS

Brian Bell Shop with a friend

PLAZA 325 5411 HOME CENTRE CITY, GORDONS 325 8459 LAE HOMECENTRE CITY 472 3200

DISCOUNT HAUS 472 3805 GOROKA 732 1622 KOKOPO 982 9027 MT HAGEN 542 1999 MADANG 852 1399

Published by Jeremy Burgess, at Allotment 2, Section 209, Hohola and Printed by Pacific Star Limited, at Allotment 13, Section 38, Waigani Drive.